

ማርቆስ ፃፊዳ ሚሺራቸዋ ቃላ ጌሉዋ

ማርቆስ ፃፊዳ ሚሺራቸዋ ኮይር ደሚዲካ፣ «ሃዌ ያሳ ናዓ ዩሱሲ ኪሪሰቶሳ ሚሺራቸዋ ቃላው ደሚዳ» ያጌ። ሃ ሚሺራቸዋ ቃላ ጊደን ዩሱሲ ኦሱዋ ኣሳኔ ማታይ ዳዒያ ኣሳ ጊዲዳ ሸቄዳ። ዩሱሳ ማታይ ኣ ቲሚርቲያን፣ ፃላሂያ ጨታ ቦላ ኣው ዳዒያ ዋልቃኒኔ ኣሳ ናጋራ ኣቶ ጊያዋን ቤዔቲዳ። ዩሱሲ፣ «ታኒ ኣሳ ናዓይ ዩዳዌ፣ ኣሳ፣ ናጋራ ኣይሌቲላፕ ላዓ ኬሳናው ታ ዴዑዋ ኣላዴ ኢማናሳ» ያጌዳ ኢ ባሬ ሁጳው ሃሳዩዳ።

ማርቆስ ዩሱሳ ታሪኪያ ሱሬኔ ዋልቃ ኩሜዳ ኦጊያን ኦዳዳ። ኢ ጋናው ኮዮ ቆፋይካ ዩሱሳ ቃላኔ ቲሚርቲያ ጊዳናን ኢ ኦሌዳ ማላሊሲያ ኦሳቲዋ ቦላና። ፃማቂያ ዮሃኒሳ ታሪኪያ፣ ዩሱሳ ዲንቃታኔ ፓጩያ ቃንላን ኤሪሲ ሰሚዳ፣ ዩሱሳ ቲሚርቲያኔ ፓሱዋባ ኣሲዳ ኦዳዳ። ዋዲያፕ ጉዪያን ዩሱሳ ካሊያዋንቲ ኣ ሎይሊ ኤሪ ቤዳዋ ኬና ኣናና ኤቄቲያዋንቲ ኣ ሎይሊ ኢፃዲኖ። ወርሴላ ሸምፓቲ ዩሱሳ ዴዑዋን ወርሴላ ሳሚንታ ጊደን ፖሌቲዳ ኦሳቲዋ፣ ሄዋንቲካ ኣ ካቄሳባኔ ኣ ዴንዲዋባ ኦዲያዋንታ።

ማርቆሳ ሚሺራቸዋ ወርሴላን ቂንፊያ ጊደን ዳዒያ 16:9-20 ፓይዳቲ ጌሻ ቃላ ኢቲ ኢቲ ቢሌላ ፃላላን ዳዒያዋንታ።

ሸምፓቲዋ ኡባቲዋሲ ኢሜቲዳ ቃንላ ቆፋቲዋ

- ሚሺራቸዋ ደሚዳ (1:1-13)
- ዩሱሲ ኦሱዋ ጋሊላን ደሚዳዋ (1:14-9:50)
- ዩሱሲ ዩሩሳላሜን ኦሶዋ (10:1-52)
- ዩሩሳላሜኒኔ ኢዚ ዩሹዋን ዩሱሳ ወርሴላ ሳሚንታ (11:1-15:47)
- ጎዳ ዩሱሳ ዴንዲዋ (16:1-8)
- ሃይቄዋፕ ዴንዲዳ ጎዳ ቆንጩላኔ ሳሉዋ ቡሳ (16:9-20)

ፃማቂያ ዮሃኒሳ ኣዋጁዋ
(ማት 3:1-12፣ ሉቅ 3:1-18፣ ዮሀ 1:19-28)

1 ያሳ ናዓ * ዩሱሲ ኪሪሰቶሳ ዋንጋላ ሚሺራቹዋ ደሜላ።
 2 ናቢያ ኢሲያሲ ፃፊዳ ማፃፋን ያሳይ።
 «ቤዓ፤ ታ ከቲያዋ ታኒ ኔፔ ሲንጻው ዩዳና።
 ኢ ኔው ኦጊያ ከሳናዋ።
 3 ኢቲ ቢታኒ ቢታ ባዙዋን ባሬ ኮሻ ቶቁ ኦሊዳ።
 ሳዳ ኦጊያ ገቢሲቲ።
 ኢ ሃሜታና ሎሱዋካ ኣው ሱሪሲቲ። ጌዳዋዳን»
 ሃኔዳ።

4 ፃማቂያ ዮሃንሲ ኣሳ ፃማቂዳ፤ «ያሳይ ሂንቲ ናገራ ኣቶ ገና ማላ። ሂንቲንቲ ናገራፔ ሲሚዳ ፃማቂቲቲ» ያገቢ ቃላ ኦዲዳ ቢታ ባዙዋን ከሲ ዋዴዳ። 5 ዩሁዳ ገዲያን ዴዲያ ኣሳይ ኡባይኔ ዩሩሳላሚ ካታማ ኣሳይ ኡባይ ዮሃንሳኮ ዩዲኖ። ባሬንቲ ናገራካ ፓዲና። ዮሃንሲ ሄ ኣሳ ዮርዳኖሳ ሻፋን ፃማቂዳ።

6 ዮሃንሲ ጋሉዋ ኢሰኪያፔ ዳዴቲዳ ማዩዋ ማዩዳ። ባሬ ዪሳን ዳፋዋ ዳንጩዳ፤ ቃሲ ቦሊያኔ ዋራ ኤሳ ሜዳ። 7 ዮሃንሲ ቃላ ኦዲዳ። «ታፔ ጉዩና ዳሮ ሚኒያዌ ዩ፤ ሃራይ ኣቶ። ኣ ጫማካ ጌዲያፔ ከሳ ቶካናው ታኒ ቤሲኬ። 8 ታኒ ሂንቲንታ ሃላን ፃማቂዳ፤ ሺን ኢ ሂንቲንታ ጌሻ ኣያናን ፃማቂናዋ» ያጌዳ።

ዩሱሲ ፃማቂቲዳዋኔ ፓጩቲዳዋ
 (ማት 3:13-17፤ 4:1-11፤ ሉቅ 3:21-22፤ 4:1-13)

9 ዩሱሲ ሄ ዋዴ ጋሊላ ገዲያን ዴዲያ ናዚሬቲ ካታማፔ ዪና። ዮሃንሲ ዮርዳኖሳ ሻፋን ኣ ፃማቂዳ። 10 ዩሱሲ ሃላፔ ከሶሳና ሳሉ ደዩቲሺናኔ ጌሻ ኣያናይ ባሬ ቦላ ሃራጲያዳን ዋዲሺን ቤዔዳ። 11 ቃሲ ሳሉዋፔ። «ታኒ ሲቂያ ታ ናዓይ ኔና፤ ታና ኔባይ ናሹቹ» ያገገያ ቃላይ ሲሴቲዳ።

12 ኤሌካ ጌሻ ኣያናይ ኣሳይ ባዩና ሜላሳ ኣ ዩዳዳ። 13 ዩሱሲ ኣሳይ ባዩናሳኒ ባሬና ሴፃናይ ፓጩሺን። ኦይታሙ ጋላሳ ጋሌዳ፤ ዲናናካ ዴዔዳ፤ ኪታንቻቲካ ዩዳ። ኣው ኦሌዲኖ።

ዩሱሲ ዋሊያ ኦይቂያ ኦይዱ ኣሳቲዋ ዪሴዳ
 (ማት 4:12-22፤ ሉቅ 4:14-15፤ 5:1-11)

14 ዮሃንሲ ቃሹቶዋፔ ጉዩያን። ዩሱሲ ያሳ ካዉቲላ ዋንጋላ ሚሺራቹዋ ኦዲዳ። ጋሊላ ገዲያ ቢዳ። 15 «ዋዲ ጋኬዳ፤

* 1:1 ያሳ ናዓ። ቤኒ ፃፊቲዳ ኢቲ ኢቲ ቢሌላን ሃዌ ባዋ። 1:2 ሚል 3:1
 1:6 2ካት 1:8 1:11 ዶዎ 22:2፤ ማዝ 2:7፤ ኢሳ 42:1፤ ማት 3:17፤
 12:18፤ ማር 9:7፤ ሉቅ 3:22

ፆሳ ካወቁላይካ ማታቱዳ። ሂንቱንቱ ናጋራፔ ሲሚዳ። ዋንጋላ ሚሽራቸዋ አማኒቲ» ያጌዳ።

16 ዩሱሲ ጋሊላ አባ ላንቂያና አዲዳ። ሞሊያ ኦይቂያዋንታ። ሲሞና ኦ ኢሻ ኢንዲራሳ። ባሬንቱ ዳባ አባን ዩጊያዋንታ ቤዔዳ። 17 ያቲዳ ኡንቱንታ። «ታና ካሊቲ፤ ታኒ ሂንቱንታ ሞሊያ ኦይቂያዋዳን አሳ ታኮ አሂያ ኦጊያ ታማሪሳና» ያጌዳ። 18 ሄዋፔ ጉዩያን ኡንቱንቱ ኤሌካ ባሬንቱ ዳባ አጊዳ። ዩሱሳ ካሌዲኖ።

19 ዩሱሲ ጉላ ሲንሳወኮ ቢዳ። ዛቢዲዮሳ ናና ላዑ አሻቱዋ። ያዩቆባኔ ዮሃንሳ ዋንጊሪያ ጊደን ባሬንቱ ዳባ ጊጊሲያዋንታ ቤዔዳ። 20 ኢ ቤዖሳንካ ኡንቱንታ ፆሲና። ባሬንቱ አወዋ። ዛቢዲዮሳ። አ ኦሳንቻቱዋና ዋንጊሪያ ጊደን አጊዳ። ዩሱሳ ካሊዳ ቤዲኖ።

ኢታ አያናይ ኦይቂዳ ቢታኒ ፓፆዳ
(ሉቅ 4:31-37)

21 ኡንቱንቱ ቂፊሪናሆማ ጌቲቲያ ካታማ ዪዳ ጌሌዲኖ፤ ዩሱሲ ሳሞባታ ጋላሳይ ጋኮ ዋዳ። አዪሁዳ ዋሳ ጎሌ ጌሊዳ። ታማሪሱዋ ደሚ አጌዳ። 22 ባሬው ማታይ ዴዒያ አሳዳን፤ አሳ ኢ ታማሪሲያዋፔ ኦቲን፤ ሂጊያ ታማሪሲያዋንቱዳን ታማሪሴና ዲራው። አሳይ አ ቲሚርቲያን ማላሌቲዳ።

23 ሄ ዋዳ ኢታ አያናይ ዴዒያ ኢቲ ቢታኒ አዪሁዳ ዋሳ ጎሌ ጌሎሳናካ ባሬ ኮሻ ጶቁ ኦሊዳ። 24 «ናዚሬቲያ ዩሱሳ፤ ኔኒ ኑፔ አያ ኮያይ? ኑና ጳዩሳናው ያዲ? ኔኒ ኦኔንቶ ኤራይ፤ ኔኒ ዖሳፔ ከቲቲዳ ጌሻ ጊዲኪ!» ያጌዳ።

25 ዩሱሲ ሄ ኢታ አያና፤ «ሃይዛ፤ ቢታኒያፔ ኬሳ» ያጊዳ አዛዜዳ።

26 ኢታ አያናይ ቢታኒያ ቡጩራሉ፤ ዳሪ ዋሲሲዳ፤ አፔ ኬሲ አጌዳ። 27 አሳይ ኡባይ ማላሌቲዳ፤ «ሃዌ አዬ? ሃ ቢታኒ ባሬ ማታኒ ሃራይ አቶ፤ ኢታ አያናቱዋካ አዛዜዳ፤ ኡንቱንቱካ ቃሲ አው አዛዜቲኖ፤ ሃዌ አይቤ ኦራላ ቲሚርቲ?» ያጊዳ፤ ባሬ ጊደን ኢቲ ኢቲዋ ኦቸዳ።

28 ጋሊላ ጋዲያን ዴዒያ ሄራይ ኡባይ ኤሌካ ዩሱሳ ዋሪያ ሲሴዲኖ።

ዩሱሲ ዳር ሃርጋንቻቱዋ ፓሌዳ
(ማጥ 8:14-17፤ ሉቅ 4:38-41)

29 ዩሱሲ አዪሁዳ ዋሳ ጎሊያፔ ኬሶሳን፤ ያዩቆባናኔ ዮሃንሳና ኢቲፔ ሲሞና ኢንዲራሳ ሶይ ቢ አጌዳ። 30 ሲሞና ቦሎታታ ቆፀዋ ሃርጋዳ ጊሴዳዉኒባ ኢ ያ ጋኮሳናካ አው ኦዲ አጌዲኖ።

31 ኢ ኢዚኮ ሸቂዳ፣ ኢዚ ኩሺያ ኦይቂዳ፣ ኢዘ ዴንሉ ኤሴዳ፤ ቆፀ ኢዘ ኣገና፣ ኢዘ ኡንቲንቶ ኦላዲ።

32 ሃርጌዳ ኣሳ ኡባኔ ኢታ ኣያናቲ ኦይቂዳ ኣሳ ኡባ ኦማርሲ ኣዋይ ወሌዳዋፔ ጉዩያን፣ ኣሳይ ኣኮ ኣሄዲኖ። 33 ካታማን ዴዒያ ኣሳይ ኡባይ ሄ ካሪያ ሸቂዳ። 34 ዩሱሲ ዲማ ዲማ ሃርጌያን ኦይቂቲዳ ጮራ ኣሳ ፓሊዳ፣ ጮራ ፃላሃቲዋካ ኬሴዳ። ኢ ከሪሰቶሳ ጊዲያዋ ኢታ ኣያናቲ ኤሬዳ ዲራው፣ ኡንቲንታ ሃሳዪሴናጊ ዲጌዳ።

**ዩሱሲ ጋሊላን ታማሪሴዳ
(ሉቕ 4:42-44)**

35 ዩሱሲ ጉራ ዋንቲማላኒ ዴንዲዳ፣ ሶዪፔ ኬሲዳ፣ ኣሳይ ባይናሳ ቢዴ ያኒ ያሳ ዋሴዳ። 36 ሲሞኒኔ ኣናና ዴዒያዋንቲ ኣ ኮዪዴ ቤዲኖ። 37 ኡንቲንቲ ኣ ዴሚዳ፣ «ኣሳይ ኡባይ ኔና ኮዬ» ያጌዲኖ።

38 ሄዋፔ ጉዬ ዩሱሲ ቃሲ ኡንቲንታ፣ «ሄዋ ሄራን ዴዒያ ሃራ ካታማቲዋ ቦይቲ፤ ታኒ ሄዋን ቃላ ኦዲናው ቤሴ፤ ኣዪሲ ጎፔ፣ ታኒ ዩዳዊ ሄዋሳ» ያጌዳ። 39 ኣዪሁዳ ዋሳ ጎሊቲዋን ቃላ ኦዲዲኔ ኢታ ኣያናቲዋ ኬሴዳ፣ ጋሊላ ጋዲያ ኡባ ዩዩዳ።

**ዩሱሲ ኦሉ ኦይቂዳ ቢታኒያ ፓሌዳ
(ማጥ 8:1-4፤ ሉቕ 5:12-17)**

40 ኦሉ ኦይቂዳ ኢቲ ቢታኒ ዩሱሳኮ ዩዳ፣ ኣ ሲንላን ጉልባቲዳ፣ «ኔኒ ኮዮፔ፣ ታና ጌሻ ፓላናው ተ ዳንዲያ» ያጌዴ ዋሴዳ።

41 ዩሱሲ ኣው ቃሪቲዳ፤ ባሪ ኩሺያ ዩዲ፣ ኣ ቦቺዳ፣ «ታኒ ኮያይ፤ ጌያ፤ ፓፃ!» ያጌዳ። 42 ኤሌካ ኦሉ ቢታኒያ ዩዲ ኣገና፣ ቢታኒ ጌዩ ፓፂ ኣጌዳ። 43 ዩሱሲ ዳሪ ሃንቂቲዳ፣ ኤሌካ ኣ ኬሲ ዩዳዳ። 44 ኢ ቢታኒያ፣ «ኔና ኤራ! ሃዋ ኦሲኔ ኦይፓ፤ ሺን ባዴ ኔ ቦላ ቂሳ ቤሳ፤ ቃሲ ኔኒ ሃዒ ጌሻ ጊዴዳዋ ኣሳ ኤሪሳናው፣ ሙሴ ኣዛዜዳ ያርሹዋ ያርሻ» ያጌዳ።

45 ሺን ቢታኒ ቢዳ፣ ዩወዋ ኡባሳን ኣሳ ኡባው ኦዲዋን ላሌላ ዴሚዳ፤ ሄዋ ዲራው፣ ዩሱሲ ቆንጨያ ኬሴዳ፣ ካታማ ጌላናው ዴንዳዪሴና፤ ሺን ኣሳይ ባዪናሳ ጋፃን ዴዒዳ፤ ቃሲ ኣሳይ ኡባሳፔ ኣኮ ዩዲኖ።

† 1:40 ታና ጌሻ ፓላ፣ ሃዋ ጉሳይ፣ ሃ ሃርጌ ቆፊቲዳዊ ላማታናው ዳንዳዬና ኤሬቲዳ ጋዴ ዋጋኔ ማራኒ፣ ሃራ ኣሳ ቆፋን ኢቲ ኣሳይ ጌሻ ጊዳና ጋና ማላ ኦዲያዋ።

2

ዩሱሲ ቦላይ ሲሌዳ ቢታኒያ ፓሌዳ

(ማጥ 9:1-8፤ ሉቅ 5:17-26)

1 አማራጭ ጋላሳ፤ ገደብን ገደብን፤ «ዩሱሲ ቀጠሪናሆማ ጉዳይ ሲሆን፤ ሶዴን ዳዊ» ገና ሃሳያይ ሲሆኑ። 2 ጎሊ አከናን ኢዲና፤ ሃሪይ አቶ፤ ካሪካ ኡንዳና ጋካናሲ ጮራ አሳይ ሸቄዳ፤ ሃዋንቲሲ ዩሱሲ ቃላ ኦዴ። 3 ኦዴዲ አሳቱ ቦላይ ሲሌዳ ኢቲ ቢታኒያ ቶኪዳ፤ አኮ አሃዲና። 4 አሳይ ጮራዳ ዲራው፤ ቢታኒያ ዩሱሳኮ አፋናው ኡንቲንቶ ዳንዳዬ፤ ኢዲና፤ ዩሱሲ ዳዊያ ባገና ጎሊያ ቃሪዳ፤ ካሪ ሉኩዲና፤ ሄ ሉኩዲናና ቢታኒያ ኢ ገሴዳ ሻንቻማና ዲጌ ዋሌዲና። 5 ዩሱሲ ኡንቲንቲ አማኑዋ ቤዲዳ፤ ሄ ቦላይ ሲሌዳ ቢታኒያ፤ «ታ ናወ፤ ኔ ናጋራይ አቶ ጌቴቴዳ» ያጌዳ።

6 ሂጊያ ታማሪሲያዋንቲ፤ ሃዋን ኡቴዳ ኢቱ ኢቱ ባሪንቲ ዋዛና፤ 7 «ላ ሃ ቢታኒ ሃዋ ማላ ኢታባ ያሳ ቦላ አደሲ ሃሳዪ? ያሳ ያላላ፤ አቲን፤ ሃሪይ ኦኔ ናጋራ አቶ ጋናው ዳንዳዪያዎ?» ያጊዳ ቆፕዲና።

8 ኡንቲንቲ ባሪንቲ ዋዛናን ሃዋዳን ቆፖዋ ዩሱሲ ኤሌካ ባሪ አያናን ኤሪዳ፤ ኡንቲንታ «ሂንቲንቲ ሂንቲ ዋዛናን አደሲ ሃዋዳን ቆፕቴ? 9 ቦላይ ሲሌዳ ቢታኒያ፤ «ኔ ናጋራይ አቶ ጌቴቴዳ» ገናዎ ማቴዎ? ዎይ፤ «ዳንዳ ኤቃዳ ኔ ሻንቻማ ቶካዳ ሃሜታ» ገናዎ ማቴ? 10 ሺን ታኒ፤ አሳ ናወ፤ ሳዓ ቦላን ናጋራ አቶ ጋናው ማታይ ዳዊያዎ ታኒ ሂንቲንታ ኤሪሳና» ያጊዳ ሄ ቦላይ ሲሌዳ ቢታኒያ፤ 11 «ኔና ጋይ፤ ዳንዳ ኤቃ፤ ያታዳ ኔ ሻንቻማ ቶካዳ ኔ ሶይ ባ» ያጊዳ።

12 ቢታኒ ኤሌካ ዳንዲ ኤቄዳ፤ ባሪ ሻንቻማ ቶኪዳ፤ አሳይ ኡባይ ያሊሺን ቢና አሳይ ኡባይ ማላሌቴዳ፤ «ኦኒ ሃዋ ማላባ ኡባካ ቤዲ ኤሮኮ» ያጊዳ ያሳ ጋላቴዲና።

ዩሱሲ ለዊያ ያሲዳ

(ማጥ 9:9-13፤ ሉቅ 5:27-32)

13 ዩሱሲ ጉጃካ ጋሊላ አባ ዶና ቤዳ፤ አሳይ ኡባይ አኮ ዩዳዋንታ ታማሪሴዳ። 14 ሃዋና አጂዳ፤ ኢላፕኮሳ ናዓ ለዊያ፤ ገናዎ ቃራፃ ቃንዲያሳን ኡቴዳዋ ዳሚዳ፤ «ታና ካላ» ያጌዳ። ሃዋ፤ ጉዬ ለዊ ዳንዲ ኤቄዳ፤ አ ካሌዳ።

15 ዩሱሲ ቁማ ማናው ለዊያ ሶዴን ኡቴዳ ዎይ፤ ቃራፃ አኪያ ጮራ አሳይ ናጋራንቻቱ አናና ኢ ካሊያዋንቲና ኢቲ፤ ኡቴዲና። አ ካሊያዋንቲ ጊዳን ሃዋንቲ ማላ አሳቱ ዳሪዲና። 16 ሂጊያ ታማሪሲያ ኢቲ ኢቲ ፓሪሳዋቱ ዩሱሲ ናጋራንቻቱዋና ኔ ቃራፃ

አኪያዋንቱና ቁማ ሚሺን ቤዲዳ፡ «ኢ አዩሲ ናጋራንቻቱዋናኔ ቃራፃ አኪያዋንቱና ቁማ ሚ?» ያጊዳ፡ አ ካሊያዋንታ ኦቼዲኖ።

17 ዩሱሲ ኡንቱንቱ ጊያዋ ሲሲዳ፡ «ሃርጋንቻቱዋ፤ አቲን፡ ፓፃ አሳው አኪሚ ኮሼና፤ ታኒ ናጋራንቻቱዋ ያሳናው ዩዳዋ፤ አቲን፡ ያላቱዋ ያሳናው ያቤይኬ» ያጊዳ ኡንቱንቶ ዛሬዳ።

ፆማባ ኤራናው ሺቄዳ ኦሻ
(ማት 9:14-17፤ ሉቅ 5:33-39)

18 ፆማቄያ ዮሃንሳ ካሊያዋንቱኔ ፓሪሳዋቱ ፆሚኖ፤ አማሬዳ አሳቱ ዩሱሳኮ ዩዳ፡ «ዮሃንሳ ካሊያዋንቱኔ ፓሪሳዋቱዋ ካሊያዋንቱ ፆሚኖ፤ ሺን ኔና ካሊያዋንቱ አዩሲ ፆሚኪኖ?» ያጊዳኖ።

19 ዩሱሲ ኡንቱንታ «ቡላቻ ዩዳ አሳቱ ማቻቶ አኪያዌ ባሬንቱና ዳዒሺን፡ ፆማናው ዳንዳዩኖ? ማቻቶ አኪያዌ ኡንቱንቱና ዳዒሺን፡ ፆማናው ዳንዳይኪኖ። 20 ሺን ማቻቶ አኪያዋ ኡንቱንቱ ማታ፤ አፋና ዋዲ ያናዋ፤ ኡንቱንቱ ሄ ዋዳ ፆማናዋንታ።

21 «ኤጫ ማዩዋ ቦላ ኦራላ ዴፊያ ዋሊ ሲኪያ አሳይ ባዋ፤ ኤጫ ዋሊ ሲኮ፤ ኦራላ ዴፊ ኤጫ ማዩዋ ፔዴሬጼ፤ ፔዴላይካ ኮይሮዋ፤ ራራና። 22 ቃሲ ሆዎ ዋዩኒያ ኤሳ ኤጫ ኦጎሩዋን ናዒያ አሳይ ባዋ፤ ሺን ናዎ፤ ሄ ዋዩኒያ ኤሳይ ኦጎሩዋ ዳኬ፤ ባሬወካ ዋፊቱ፤ ኦጎሩካ ባዩ፤ ሺን ሆዎ ዋዩኒያ ኤሳ ኦራላ ኦጎሩዋን ናዒቱ» ያጊዳ።

ሳምባታባ ኤራናው ሺቄዳ ኦሻ
(ማት 12:1-8፤ ሉቅ 6:1-5)

23 ዩሱሲ ኢቲ ሳምባታ ጋላሲ ቲሻ ባንጋ ጊዶና አዲሺን፡ አ ካሊያዋንቱና አናና ቢዳ፡ ባንጋ ቲሻ፤ ዲሳ ዶሜዲኖ።

24 ፓሪሳዋቱ ዩሱሳ፡ «ቤዳ፤ ኔና ካሊያዋንቱ ሳምባታ ጋላሲ ሂኔ ጊዳናባ አዩሲ ኦሊኖ?» ያጊዳኖ።

25 ዩሱሲ ኡንቱንታ፡ «ዳዊቱ ኮሻቲዳ፡ ሚያባ ኮዬዳ ዋዳ፡ ባሬናና ዳዒያዋንቱና ኦሌዳዋ ኡባካ ናባቢቤይኪቱ?

26 አቢያታሪ ቄሳቶ ኡባቶ ካፖ ጊዳዳ ዋዳ፡ ዳዊቱ ያሳ ጎሊያ ጌሊዳ፡ ቄሳቱዋ ያላላይ ማና፤ አቲን፡ ኦኒኔ ማናው ሂኔ ጊዳናዋ ጎዳ ሲንላን ዋሌዳ ቁማ ሚዳ፡ ባሬናና ዳዒያዋንቶካ ኢሜዳ» ያጊዳ።

27 ቃሲካ ዩሱሲ ኡንቱንታ፡ «ሳምባታይ አሳው ማደጃቲዳዋፔ አቲን፡ አሳይ ሳምባታው ማደጃቲቤና። 28 ሄዋ ዲራው፡ ታኒ፡ አሳ ናዓይ፡ ሃራይ አቶ፡ ሳምባታውካ ጎዳ» ያጌዳ።

3

ኩሺ ሲሌዳ ቢታኒያ
(ማት 12:9-14፤ ሉቅ 6:6-11)

1 ዩሱሲ አዩሁዳ ዋሳ ጎሊያ ሺሬቲካ ጌሌዳ፤ ሄዋን ኩሺ ሲሌዳ አቲ ቢታኒ ዳዔ። 2 አቲ አቲ አሳይ ዩሱሳ ሞታናው ኮዪዳ፡ ኩሺ ሲሌዳ ቢታኒያ ሳምባታን ኢ ፓላፔ ቤዓናው ናጌ። 3 ዩሱሲ ሄ ኩሺ ሲሌዳ ቢታኒያ፡ «ዳንዳ ኤቃዳ ሲንሳው ሃ ያ» ያጌዳ። 4 ሄዋፔ ጉዪያን አሳ፡ «ሳምባታን ሎዎባ አሊያዌ ዋጌዬ ኢታባ አሊያዌ ዋጌ? አሳ ሽምቸዋ አሺያዌ ዋጌዬ ዋዲያዌ ዋጌ?» ያጌዳ ኦቼዳ።

ሺን አሳይ ጮው ጌዳ። 5 ዩሱሲ ሃንቄቲዳ፡ ኡንቱንታ ዩሺ አሊ ያሊዳ፡ ኡንቱንቱ ኦዲና ሲሴናዋንታ ጌዲያ ዲራው፡ ኡንቱንቶ ዳሪ ካዮቲዳ፤ ሄ ቢታኒያ፡ «ኔ ኩሺያ ፒዲ አላ» ያጌዳ፤ ቢታኒ ፒዲ አሊና፡ አ ኩሺ ፓዲ አጌዳ። 6 ፓሪሳዋቱ አዩሁዳ ዋሳ ጎሊያፔ ካሬ ኬሲዳ፡ ዩሱሳ ዋቲ ዋዳኔንቶ ሄሮዲሳና ዳዒያዋንቱና ማቄቲዲና።

አሳይ አባ ላንቄያን ዩሱሳኮ ሺቄዲኖ

7 ዩሱሲ ባሬና ካሊያዋንቱና ጋለላ አባ ቤዳ፤ ጋለላፔ ጮራ አሳይ አ ካሌዳ። 8 ቃሲካ ጮራ አሳይ ዩሁዳፔ፡ ዩሩሳላሜፔ፡ ኤዶሚያሳፔ፡ ዮርዳኖሳ ሻፋፔ ሄፊንሳ ባጋፔ፡ ዲሮሳ ካታማፔኔ ሲዶና ካታማፔ ዩሱሲ አሌዳዋ ሲሲዳ፡ አኮ ዩዳ። 9 ዩሱሲ ጮራ አሳይ ባሬና ሱጊ ኡንዔሌና ማላ፡ ባሬና ካሊያዋንታ ዋንጊሪያ ባሬው ጋሚዔላና ማላ አዛዜዳ። 10 ዳር አሳ ኢ ፓሌዳ ዲራው፡ ሃርጊያ አሳይ ኡባይ አ ቦቻናው ሱጌሬቲ። 11 ኢታ አያናይ ዳዒያ አሳቲካ አ ቤዔዳ ዋዳ ኡባን አ ሲንሳን ጉፋኒዳ፡ ባሬንቱ ቃላ ቋቁ አሊዳ፡ «ኔን ያሳ ናዓ ጌዲኪ!» ያጌዲኖ።

12 ዩሱሲ ሄ ኢታ አያናቱ ባሬባ አሳው ኦዲዳ፡ ባሬና ቆንጩያ ኬሴና ማላ፡ ኡንቱንታ ሚኒሲዳ አዛዜዳ።

ዩሱሲ ባሬ ከቲያዋንታ ዶሬዳ
(ማት 10:1-4፤ ሉቅ 6:12-16)

13 ዩሱሲ ዳሪያ ቦላ ኬሲዳ፡ ባሬ ኮዪዳ አሳቲዋ ባሬኮ ያሴዳ፤ ሄዋፔ ጉዬ አኮ ቤዲኖ። 14-15 ኡንቱንቱ ባሬናና ዳዓና ማላኔ ቃላ

ኦዳናው ኤንቴንታ ኪታና ማላ፣ ኢታ ኣያናቱዋ ኣሳፔ ኬሳናው ኤንቴንቶ ማታይ ዳዓና ማላ፣ ታማኔ ላዑ ኣሳቱዋ ደሬዳ።

16 ኢ ደሬዳ ታማኔ ላዓቱ ሃዋንታ፡ ጳጳሮሳ ያጊዳ ሱንጹዳ ሲሞና፣ 17 ቦዓኔርጌሳ ያጊዳ ሱንጹዳ ዛቢዲዮሳ ናና ያዩቆባኔ ያዩቆባ ኢሻ ዮሃኒሳ። «ቦዓኔርጌሳ» ጊያዌ «ዋልቃማ ኣሳቱዋ» ጊያዋ። 18 ኢንዲራሳኔ ፒሊጶሳ፣ ባርታላሞሳኔ ማቶሳ፣ ቶማሳኔ ኢልፒዮሳ ናዓ ያዩቆባ፣ ታዶሳኔ ባሬ ቢታው ሴሌቲያ ሲሞና፣ 19 ዩሱሳ ኣሉ ኢሜዳ ዩሁዳ ኣሰቆርታ።

ዩሱሳኔ ቢዔል-ዘቡላ
(ማት 12:22-32፤ ሉቅ 11:14-23፤ 12:10)

20 ዩሱሲ ሶይ ቤዳ፤ ላዒንሉዋካ ቃሲ ጮራ ኣሳይ ሸቂና፣ ኢኔ ኣ ካሊያዋንቱና ሃራይ ኣቶ፣ ቁማ ማናውካ ዳንዳይቤይኪና፤ 21 ኣሳይ ኣ፣ «ኅዌ» ጊያ ዲራው፣ ኣ ዳባቱ ሄዋ ሲሲዳ፣ ኣ ኣካናው ቤዲና።

22 ሂጊያ ታማሪሲያ ኢቲ ኢቲ ኣሳቱ ዩሩሳላሚፔ ዩዳ፣ «ዩሱሳ ቦላ ቢዔል-ዘቡላ ዳዔ» ያጌዲና፤ ቃሲ፣ «ፃላሃቱዋ ካፑ ባሬው ዋልቃ ኢሚና፣ ኢታ ኣያናቱዋ ኬሴ» ያጊዳ ሃሴዩዲና።

23 ዩሱሲ ኣሳ ባሬኮ ፃሲዳ፣ ለሚሱዋ ኦዲዳ፣ «ሴፃናይ ሴፃና ዋቲ ኬሳናው ዳንዳዩ? 24 ኢቲ ካዉቲላይ ባሬ ጊዶን ሻኬቶፔ፣ ሄ ካዉቲላይ ኤቃናው ዳንዳዩና፤ 25 ቃሲ ኢቲ ኅሌ ኣሳይካ ባሬ ጊዶን ሻኬቶፔ፣ ሄ ኅሌ ኣሳይካ ኤቃናው ዳንዳዩና። 26 ሴፃናይ ባሬናና ዋላቂቲዳ ሻኬቶፔ፣ ባያናፔ ኣቲን፣ ዳዓና ዳንዳዩና።

27 «ሺን ዋልቃማ ኣሳ ኅሌ ጌሊዳ ካሴቲዳ ኣ ቃቼናን ዳዒዳ፣ ኣ ሚሻ ቦንቃናው ዳንዳዩያ ኣሳይ ባዋ፤ ቃቼዳዋፔ ጉዩያን፣ ኣ ኅሊያ ቦንቃናው ዳንዳዩ።

28 «ታኒ ሂንቴንቶ ቱሙዋ ጋይ፤ ያሳይ ኣሳ ናናው ናጋራ ኡባኔ ኤንቴንቱ ቦሪያ ቦሪያ * ኡባ ኣቶ ጋና፤ 29 ሺን ጌሻ ኣያና ቦላ ኢታ ቦሪያ ሃሳዩያ ኦሲኔ ማዲናው ናጋራ ጊዳናፔ ኣቲን፣ ያሳይ ኡባካ ኣቶ ጌና» ያጌዳ። 30 ዩሱሲ ሄዋ ጌዳዌ፣ ኢቲ ኢቲ ኣሳቱ፣ «ዩሱሳ ቦላ ኢታ ኣያናይ ዳዔ» ያጌዳ ዲራሳ።

ዩሱሳ ዳዮኔ ኢሻቱዋ
(ማት 12:46-50፤ ሉቅ 8:19-21)

31 ዩሱሳ ዳያኔ ኣ ኢሻቱ ዩዳ፣ ካሬን ኤቂ ኣኮ ኣሳ ኪቲዳ፣ ኣ ፃሲሴዲና። 32 ጮራ ኣሳይ ኣ ማታን ኡቲዲና፤ ሄ ኪቲቲዳዌ ኣ፣

3:19 14:10 3:22 ማት 9:34፤ 10:25 * 3:28 ቦሪያ ቦሪያ፣ ጉሳይ ያሳ ቦላን ኣሳይ ሃሳዩያ ኢታ፣ ባላኔ ጌላ ሃሳያ። 3:29 ሉቅ 12:10

«በዓ፤ ኔ ዳያኔ ኔ አሻቱ ካሬን ኤቂዳ፣ ኔናና ጋኩታናው ኮዩኖ» ያጌዳ።

³³ ዩሱሲ ዛሬዳ፣ «ታ ዳያ ኦኔ? ቃሲ ታ አሻቱ ኦኔ?» ያጌዳ።

³⁴ ባሬ ማታን ኡቲዳ አሳ ዩሺ አሊ ያሊዳ፣ «በዒቲ፤ ታ ዳያኔ ታ አሻቱ ሃዋንቱሺ። ³⁵ ያሳይ ኮዩያዋ ኦሊያ ኡባይ ታ አሻ፣ ታ ሚቻቶኔ ታ ዳዮ» ያጌዳ።

4

ዜሬላ ዜሬያዋ ለሚሱዋ (ማት 13:1-9፤ ሉቅ 8:4-8)

¹ ዩሱሲ ሺሬቲካ ጋሊላ አባ ማታን ታማሪሱዋ ደሜዳ፤ ጮራ አሳይ ባሬ ሚዩያን ዩዩ አጲዳ ሸቂ ኡቲና፣ አባን ዳዒያ ዋንጊሪያ ጊዶ ጌሊዳ፣ አኒ ኡቲዳኖ፤ ቃሲ ሄ አሳይ ኡባይ አባ ሚዩያን ዳዒ። ² ኢ ኡንቱንታ ዳሮባ ለሚሱዋን ታማሪሲዳ፣

³ «ሲሲቲ፤ ኢቲ ቢታኒ ዜሬላ ዜሬናው ኬሴዳ። ⁴ ኢ ዜሬሺን፣ ኢቲ ኢቲ ዜሬላይ ኦጊያ ዶናን ዋጲዳ፤ ሄዋ ካፉ ዩዳ ሜዳ።

⁵ ኢቲ ኢቲ ዜሬላይ አንጮ ቢታ ቦላ ዋጲዳ፤ ዳሮ ቢታይ ባይና ዲራው፣ ሄ ዜሬላይ ኤሌካ ሞኬዳ። ⁶ አዋይ ኬሴዳ ዋዳ ሹሌዳ፤ አዲሳ ዓጲዋ ዩዲቤና ዲራው፣ ሜሊ አጌዳ። ⁷ ኢቲ ኢቲ ዜሬላይ አጉንላ ጊዶን ዋጲዳ፤ ሄዋን ሞኬዳዋ አጉንላይ ዲጩዳ ጨለና፣ አይፊናን አቲዳ። ⁸ ኢቲ ኢቲ ዜሬላይ ቱዔ ቢታን ዜሬቲዳ ሞኬዳ፤ ዲጩዳ ኢቲ ሃታሙዋ፣ ኢቲ ኡሱቱን ታሙዋ አይፊና፣ ኢቲ ያቲዋ አይፊዳ።» ⁹ ቃይካ ዩሱሲ፣ «ሲሳናው ሃይላይ ዳዒያ ኡራይ ሲሶ» ያጌዳ።

ዩሱሲ ለሚሱዋን ኦዳዳ ጋሱዋ (ማት 13:10-17፤ ሉቅ 8:9-10)

¹⁰ ታማኔ ላዑ ዩሱሳ ካሊያዋንቱኔ ኢ ኦዳዳዋ ሲሴዳ ሃራ አሳቱ ኢ ባሬካ ዳዒሺን አኮ ሸቂዳ፣ ሄ ለሚሱዋ ቢሌላ ኦ ኦቼዲና። ¹¹⁻¹² ዩሱሲ ኡንቱንቱሲ፣ «ሂንቱንቶ ያሳ ካዉቲላ ፀራ ዩዉዋ ኤራይ ኢሜቲዳ፤ ሺን ሃራቱ ካዉቲላ፣ ካሬና ዳዒያዋንቱ፣ ያላ ያሊዳ በዔና ማላ፣ ቃሲ ሲሳ ሲሲዲካ አኬኬና ማላ፣ ኡንቱንቱ ሺሬቲዳ ያሳኮ ሲሚና፣ ኢ ኡንቱንቱ ናጋራ አቶ ጌና ማላ፣ ኡንቱንቶ ኡባባይ ለሚሱዋን ኦዳቲ» ያጌዳ።

ዜሪያዎ ለሚሱዋ ቢሌላ
(ማጥ 13:18-23፤ ሉቃ 8:11-15)

13 ዬሱሲ ከንቱንታ፡ «ሃ ለሚሱዋ ከሪኪቱ? ያተና፡ ለሚሱዋ ኡባ ዋቲ ኤራኒቱ? 14 ዜሪያዌ ያሳ ቃላ ዜራ። 15 ቃላይ ዜሪቲያ ኪያ ደናን ደዒያዋንቱ ሃዋንታ፤ ከንቱንቱ ቃላ ሲሲያ ዎዴ፡ ስፃናይ ኤሌካ ዪዴ፡ ከንቱንቱ ዎዘናን ዜሪቲዳ ቃላ ኣፊዲጌዳ። 16 ሃዋዳንካ ቃሲ ኣንጮቲያ ቢታን ዜሪቲዳዋንቱ ሃዋንታ፤ ከንቱንቱ ቃላ ሲሲዴ፡ ኤሌካ ናሼቻን ኣኪኖ። 17 ከንቱንቱ ሃረው ደዒኖፕ ኣቲን፡ ከንቱንቶ ሚኖ ፃጹ ባዋ፤ ጉዬፕ ቃላ ጋሱዋን ዎዪ ዎይ ዬዳርሱ ዪያ ዎዴ፡ ከንቱንቱ ኤሌካ ቆቤቲ ኣገኖ። 18 ቃሲ ኣጉንላ ገደን ዜሪቲዳዋንቱ ሃዋንታ፤ ከንቱንቱ ቃላ ሲሲያዋንታ። 19 ሺን ሃ ሳዓ ዴያ ሂርጊያዌ ዳራቴላ ደሲያዌኔ ሃራባ ኣሞቲያዌ ከንቱንቱ ዎዘናን ጌሊዴ፡ ቃላ ጩሊና ኣይፊናን ኣቲ ኣጌዳ። 20 ሺን ቱዔ ቢታን ዜሪቲዳዋንቱ ቃላ ሲሲዴ ኣኪያዋንታ፤ ኣቲ ሃታሙዋ፡ ኣቲ ኡሱፕን ታሙዋ ኣይፊና፡ ኣቲ ፃቱዋ ኣይፊዳ» ያጌዳ።

ያምፒያ ለሚሱዋ
(ሉቃ 8:16-18)

21 ዬሱሲ ጉጂዴ፡ «ያምፒያ ኣሂዴ፡ ገላፕ ዎይ ኣርሳፕ ጋርሳና ዎሊያ ኣሳይ ደዒ? ቶቃሳን ዎሌኔ? 22 ኣዪሲ ጎፔ፡ ቆሴዳባይ ኡባይ ቆንጩያ ከሳናዎ፤ ቃሲ ጌማን ዎሌዳባይ ኡባይ ቤቲናን ኣቲና። 23 ሲሳናው ሃይላይ ደዒያ ኡራይ ዴፖፕ ሲሶ» ያጌዳ። 24 ቃሲካ ከንቱንታ፡ «ሂንቱንቱ ሲሲያዎ ኣከኪዴ ሲሲቲ፤ ያሳይ ሂንቱ ማኬዳ ቁንዓን ሂንቱንቶ ማካናዎ። ኢ ሂንቱንቶ ዳሪሲዴ ኣማና፤ 25 ደዒያ ኡራው ጉጂ ኣማና፤ ባይናዎፕ ሃራይ ኣቶ፡ ኣው ደዒያ ሄ ጉላቶካ ኣኪዲጋና» ያጌዳ።

ዲጩያ ዜሪላ ለሚሱዋ

26 ዬሱሲ ቃሲካ፡ «ያሳ ካዉቲላይ ጋዴን ካላ ዜሪያ ኣሳ ማላ። 27 ሄ ቢታኒ ቃማ ጌሚሲሼ፤ ጉራ ዴንዴ፤ ኢ ባሪ ሁጹው ዋኒንቶ ኤሪናን፡ ሄ ዜሪላይ ሞኬኔ ዲጩ። 28 ቢታይ ካላ ባሪካ ሞኬኔ ኣይፊ፤ ኮይር ጫርሻይ ጫሬ፤ ጉዬፕ ኣይፋናው ኩኩሚ፤ ቃሲ ወርሴላን ኩሚንላ ኣይፊያ ኣይፊ። 29 ሺን ካላይ ጋኪያ ዎዴ፡ ካላ ሺሺያ ዎዲ ጋኬዳ ዲራው፡ ቢታኒ ኤሌካ ባጫን ጫኩዋ ጌሊ ኣጌዳ» ያጌዳ።

ሳናፊጪያ ዜሬላ ለሚሱዋ

(ማት 13:31-34፤ ሉቅ 13:18-19)

30 ዩሱሲ፡ «ኑኒ የሳ ካዉቱላ ኣያ ማላቲ ንኔ? ዋይ ኣያና ለሚሳኔ? 31 የሳ ካዉቱላይ ሳናፊጪያ ኣይፋቶ ማላቲ። ሄ ኣይፋታ ዜሪያ ዋዴ፡ ሳናን ዴዒያ ሚላ ኣይፊያ ኡባፔካ ጉፃው፤ 32 ሄኖ ዜሪና ሞካዴ ሃራ ኣታኪልቲያ ኡባፔ ዳራው፤ ዳሮ ዳሻ ዳሻው። ካፉ ኢዚ ቃንካ ኩዋን ጎሊያ ኬፃና ዳንዳዬ» ያጌዳ።

33 ዩሱሲ ሃዋ ማላ ዳሮ ለሚሱዋን ኣሳይ ሲሳናው ዳንዳዪያዋ ከና፡ ባሬ ቃላ ኦዴዳ። 34 ኣሳው ለሚሱ ባይናን ኦዴና፤ ሺን ዩሱሲ ባሬና ካሊያዋንቱ ፃላላና ዴዒያ ዋዴ፡ ኡንቱንቶ ኡባባ ቢሊዴ ኦዴ።

ዩሱሲ ቤታ ጮው ኦሴዳ

(ማት 8:23-27፤ ሉቅ 8:22-25)

35 ሄ ኃላሲ ሳዓይ ኦማርሲና፡ ዩሱሲ ባሬና ካሊያዋንታ «ኣባፔ ሄፊንላ ፒኖይቲ» ያጌዳ። 36 ኣ ካሊያዋንቱ ኣሳ ኣጊዴ፡ ዩሱሲ ካሴ ጌሊ ኡቲዳ ዋንጊሪያን ጌሊዴ፡ ዩሱሳ ባሬንቲና ኣፌዲኖ፤ ሃራ ዋንጊራቱካ ሄዋን ዴዒኖ። 37 ዋልቃማ ጎቱ ዴንዲና፡ ቤታይ ዋንጊሪያ ሾጪና፡ ሃላይ ኩማና ጋካናው ዋንጊሪያ ጊዶ ጌሌዳ። 38 ሄ ዋዴ ዩሱሲ ዋንጊሪያን ጉዬ ባጋና ቦርኮላ ቦርኮቲዴ ጌሚዒሼዳ። ዩሱሳ ካሊያዋንቱ ኣ ዴንሲዳ፡ «ታማሪሲያዎ፡ ኑኒ ጳዪያ ዋዴ ጮው ጋዴ ፃላይ?» ያጌዲኖ።

39 ኢ ቤጎቲዴ ጎቱዋ፡ «ጮው ጋ» ጊዴ፡ ኣባካ፡ «ዋፑ ጋ» ጌዳ፤ ጎቱካ ጮው ጊና፡ ኡባባይካ ዋፑ ጌዳ። 40 ዩሱሲ ባሬና ካሊያዋንታ «ኣዪሲ ሃዋዳን ያዪቲ? ሂንቲንቱ ዋኒ ኣማኒኪቲ?» ያጌዳ።

41 ኡንቲንቱ ዳሮ ያዪዴ ባሬንቱ ጊዶን፡ «ሃዌ ላ ሃራይ ኣቶ፡ ጎቱኔ ኣባይ ኣዛዜቲያዌ ኦኔ?» ያጌዲኖ።

5

ዩሱሲ ኢታ ኣያናይ ኦይቄዳ ቢታኒያ ፓሌዳ

(ማት 8:28-34፤ ሉቅ 8:26-39)

1 ዩሱሲኔ ኣ ካሊያዋንቱ ኣባፔ ሄፊንላው ፒኒዴ፡ ጌርጌሴኖና ጌቲቲያ ጋዲያ ጋኬዲኖ። 2 ኣሳ ሞጊያ ዲፋ ዴዒያሳፔ ኢታ ኣያናይ ዴዒያ ኢቲ ቢታኒ ኬሲዴ፡ ዩሱሲ ዋንጊሪያፔ ኬሴዳ ዋዴ፡ ዩሱሳና ጋኬቲዳ። 3 ቢታኒ ሄ ዲፋ ዴዒያሳን ኣቂ ፔሺዴ፡ ያኒ ዴዒ፤ ኣ ኦኒኒ ሃራይ ኣቶ፡ ሳንላላታን ቃቻናዉካ ዳንዳይቤና።

4 አዲስ ጎፎ፣ ኢ ዳር ዎዴ ኡቁናኒኔ ሳንላላታን ቃሹቲዴ ዴዔ፤ ሺን ሳንላላታ ዲሴራሌዳ፤ ኡቁናኒኒ ማንሌራሌዳ፤ አ ያናናው ዳንዳዬዳዌ ኦኒኔ ባዎ። 5 ኢ ኡባ ዎዴ ጋላሲኔ ቃማ፣ ሄ ዲፋ ዴዒያሳኒኔ ዴሪያ ቦላ ዋሴ፤ ባሪ ቦላካ ሹቻን ጋሪ።

6 ዬሱሳ ሃኩዋን ቤዔዳ ዎዴ፣ አኮ ዎዲ ዪዴ አው ጎዪኔዳ።

7 ሄ ቢታኒ ባሪ ኮሻ ጶቁ አሊዴ፣ «ኡባፔ ቦላ ያሳ ናባው፣ ዬሱሳ፣ ኔናኔ ታና አዬ ጋሊ? ታና ሙሪና ማላ፣ ታኒ ኔና ያሳ ሱንላን ዎሳይ» ያጌዳ። 8 ኢ ሄዎ አዲሲ ጌዴ ጎፎ፣ ዬሱሲ አ፣ «ላ ሃ ኢታ አያናው፣ ሃ ቢታኒያፔ ኬሳ» ያጌዳዋሳ።

9 ዬሱሲ አ፣ «ኔ ሱንላይ ኦኔ?» ያጌዴ ኦቹዳ።

ኢ፣ «ኦኒ ጮራ ጊዲያ ዲራው፣ ታ ሱንላይ ለጊዮና» ያጌዳ።

10 ኢታ አያናቱዎ ሄ ጋዲያፔ ኬሲ ዬዴና ማላ፣ ዬሱሳ ማኒሲዴ ዎሴዳ።

11 ሄ ዴሪያ ቦላን ጮራ ጉዲንላ ዉዲ ሄማቴ፤ 12 ኢታ አያናቱ ዬሱሳ፣ «ኦና ሂኒ ጉዲንላ ዉዲያኮ ዬዳርኪ፤ ኡንቱንቱን ቢዴ ጌላና» ያጌዴ ዎሲና፣ 13 ዬሱሲ፣ «ቢቲ» ያጌዳ። ኢታ አያናቱ ቢታኒያፔ ኬሲዴ፣ ጉዲንላቱዋን ጌሌዲኖ፤ ላዐ ሻዓ ጊዲያ ጉዲንላ ዉዲ ካካ ሁጲያና ካጆቲዴ፣ አባን ጌሊዴ፣ ማቲቲ አጌዳ።

14 ጉዲንላ ዉዲያ ሄማያዎንቱ ባቃቲዴ፣ ሃኔዳዎ ካታማኒኔ ካታማፔ ጋፃ ጋዲያን ኦዴዲኖ፤ ሄዎ ቤዓናው አሳይ ዬዳ።

15 አሳይ ዬሱሳኮ ዪዴ፣ ጮራ ኢታ አያናቱ ቤኒ ኦይቄዳ ቢታኒ ባሪ ዎዛናይ ሰሚና፣ ማዩዎ ማዪዴ፣ ሄዎን ኡቲዳዎ ቤዒዴ፣ ኡባይ ያዬዳ። 16 ሄዎ ቤዔዳ አሳቱ ኢታ አያናቱ ኦይቄዳ ቢታኒ ሃኔዳዎኔ ቃሲ ጉዲንላ ዉዲያባ ሄ አሳሲ ኦዴዲኖ። 17 ሄዎ ዲራው፣ አሳይ ባሪንቱ ጋዲያፔ ዬሱሲ ባና ማላ፣ ዎሳ ደማዳ።

18 ዬሱሲ ዎንጊሪያን ጌሊሺን፣ ኢታ አያናቱ ኦይቄዳ ቢታኒ ዬሱሳና ዴዓና ማላ፣ ዬሱሳ ዎሴዳ። 19 ሺን ዬሱሲ ኢዳዴ አ፣ «ኔ ሶይ ሲማዴ፣ ጎዳይ ኔው አይ ማላ ዎልቃማባ ኦሊዴንቶኔ ቃሲ ኢ ኔው አይ ማላ ኬኬንቶ ኔ ሶይ አሳው ኦዳ» ያጌዳ። 20 ቢታኒ ቢዴ፣ ታሙ ካታማ * ጊያሳን ዩዪዴ፣ ዬሱሲ ባሪው አይ ማላ ዎልቃማባ ኦሊዴንቶ፣ ኦዲዎ ደማዳ፤ ኢ ኦዴዳዎ ሲሴዳ አሳይ ኡባይ ማላሌቲዳ።

* 5:20 ታሙ ካታማ፡ ሃዎንቱ ኢቲ ጨታ ጊዴዳ ካታማቱ ሳማሪያፔኔ ጋለላ ጋዲያ አዎይ ደሊያ ባጋና ዴዒያዎንታ ጊዲዴ፣ ሄዎንቱን ዴዒያ አሳቱዎ ኡሻይካ ግሪኬ አሳቱዎ ዴዐዎ ኦጊያ ካሊያዎ ቤሴ።

ያዲሮሳ ናቶኔ ዩሱሳ ማዩዋ ቦቹዳ ሚሺራቶ
(ማጥ 9:18-26፤ ሉቃ 8:40-56)

21 ዩሱሱ ሲሚዳ፡ ዋንጊሪያን ጌሊዳ፡ አባ ፒኔዳዋፕ ጉዩያን፡ ጮራ አሳይ አባ ማታን አኮ ዩዩ አጲዳ ሺቄዲኖ። 22 ያዲሮሳ ጊያዌ፡ አዩሁዳ ዋሳ ጎሊያ ካፓቱዋፕ ኢቱ፡ ዩሱሳ ቤዔዳ ዋዳ አኮ ዩ አ ጌዲያን ኩንዲዳ። 23 «ታ ናታ ሃርጋዳ ሃይቃና ሃናው፤ ኢዛ ፓፃዳ ሎፆ ዳዓና ማላ፡ ያዳ ኔ ኩሺያ ኢዚ ቦላ ዋላሪኪ» ያጊዳ ዩሱሳ ሚኒሲዳ ዋሴዳ።

24 ዩሱሱ ያዲሮሳና ቤዳ፤ ኢ ቢሺን ጮራ አሳይ አ ካሊዳ ማቶሌዲኖ።

25 ታማኔ ላዑ ላይላ ኡባ ኢዚ ቦላፕ ሱላይ ጎጊያ አቲ ሚሺራታ ዳዓው። 26 ጮራ አከማቱ ኢዛ አከሚሺንካ፡ ኢዛ ፓፃ ካዔታዲ፤ ባሬ ሚሻ ኡባ ዉርሲናካ ኢዚው ሃ አቲዳዋፕ አቲን፡ አይኔ ኢዛ ማዲቤና። 27 ሄ ሚሺራታ ዩሱሳ ሲሳዳ፡ አሳ ጊዶና ዩሱሳፕ ጉዬና ያዳ፡ አ ማዩዋ ቦቻዲ። 28 አዩሲ ጎፔ ኢዛ፡ «ታኒ ሃራይ አቶ፡ አ ማዩዋ ቦቻፕካ ፓፃና» ያጋዳ ቆፓዲ።

29 ኢፕ ጎጊያ ሱላይ ኤሌካ ኤቁ አጌዳ፤ ኢዛ ባሬ ዋዩያፕ ፓፃዳዋ ባሬ ቦላን ኤራ አጋዲ። 30 ዩሱሱ ባሬፕ ዋልቃይ ኬሴዳዋ ባሬ ሁጳው ኤሪዳ፡ ኤሌካ ጮራ አሳ ጊዶን ጉዬ ሲሚዳ፡ «ታ ማዩዋ ቦቹዳዋ ኦኔ?» ያጌዳ።

31 ዩሱሳ ካሊያዋንቱ አ፡ «አሳይ ኔና ሱጊያ ዋዳ ቤዓዳ፡ ታና ኦኔ ቦቹዳዋ?» ያጋይ?» ጌዲኖ።

32 ዩሱሱ ሄዋ ኦኔ ኦሌዳንቶኔ ቤዓናው ዩሺ አሊዳ ያሌዳ፤

33 ሺን ሚሺራታ ባሬው ሃኔዳዋ ኤራዳ፡ ያሻ ኮኮራዳ ያዳ ዩሱሳ ሲንሳን ጉፋናዲ፤ ቃሲ ቱማቲሳን ሃኔዳዋ ኡባ አው ኦዳዲ።

34 ዩሱሱ ኢዛ፡ «ታ ናቱ፡ ኔና ኔ አማኑ ፓሌዳ፤ ሳሩዋን ባ፤ ኔ ዋዩያፕኔ ፓፃ» ያጌዳ።

35 ዩሱሱ ቢር ሄዋ ጊሺን፡ አዩሁዳ ዋሳ ጎሊያ ካፕዋ ሶዩፕ ከቲቱዳ አሳቱ ዩዳ፡ «ኔ ናታ ሃይቃዲጋዲ፤ ሲሚ ታማርሲያዋ አዩሲ ዳቡርሳይ?» ያጌዲኖ።

36 ሺን ዩሱሱ አንቱንቱ ጊያዋ ሲሲዳ፡ አዩሁዳ ዋሳ ጎሊያ ካፕዋ፡ «አማኖ ፃላላ አማናፕ አቲን፡ ያኖፓ» ያጌዳ። 37 ዩሱሱ ጳደርሳፕ፡ ያዩቆባፕኔ ያዩቆባ ኢሻ ዮሃንሳፕ ሃራይ ኦኒኔ ባሬና ካሊና ማላ ዲጌዳ። 38 አንቱንቱ አዩሁዳ ዋሳ ጎሊያ ካፕዋ ሶይ ጋኬዳ ዋዳ፡ ዩሱሱ አሳይ ሎይሉ ዩኪያዋን ዚላሊያዋ ቤዔዳ።

39 ጌሊዳ አሳ፡ «አዩሲ ሎይሉ ዩኪቱ? ናታ ጌሚሳሻዲፕ አቲን፡ ሃይቃቤይኩ» ያጌዳ።

40 ህዋፔ ጉዬ አሳይ አ ሰላ ሚጩዳ፤ ሺን አሳ ኡባ ካሪ ኬሲዳ፣ ናቲ አወዋኔ አቶ ህዋን ባሪናና ደዲያ አ ካሊያዋንታኔ አኪዳ፣ ናታ ደዲያሳ ጌሌዳ። 41 ዩሱሲ ናቲ ኩሺያ ኦይቁዳ፣ «ፃሊታ፣ ቁሚ» ተ ያጌዳ፤ ህዋ ቢሌላይ፣ «ጉላ ናቲ፣ ታኒ ኔና ደንዳ ጋይ» ጊያዋ።

42 ናታ ኤሌካ ደንዳ ኤቃዳ ሃሜታዲ፤ ኢዛ ታማኔ ላዑ ላይላ ናቶ፤ ህዋ ሃኒያዋን አሳይ ዳሮ ማለሌቲዳ። 43 ዩሱሲ ህዋ ኡንቱንቱ ኦሲኔ ኦዳና ማላ፣ ኡንቱንታ ሚኒሲ አዛዚዳ፣ «ኢዚው ሚያባ አሚቲ» ያጌዳ።

6

ዩሱሳ ናዚሬቲን አኬናን ኢጻዲኖ (ማት 13:53-58፤ ሉቅ 4:16-30)

1 ዩሱሲ ህዋፔ ኬሲዳ፣ ባሪ ጋዲያ ናዚሬቲ ካታማ ቤዳ፤ አ ካሊያዋንቱካ አ ካሊዳ ቤዲኖ። 2 ሳምባታ ጋላሲ አዩሁዳ ዋሳ ጎሊያን ታማሪሱዋ ደሜዳ፤ ኢ ታማርሲያዋ ሲሴዳ ጮራ አሳይ ማላሌቲዳ፣ «ሃዌ ሃ ኡባባ ሃቃፔ ደሜዳ? ሃ አው አሜቲዳ አቶ ኤራቲላይ አዩ? ያሳይ ኦሊያ ማላታ ኢ ዋቲ ኦሊ?» 3 ሃዌ አናጻያ * ጌዴኔ? ማይራሚ ናባ፣ ያዩቆባ አሻ፣ ዮሳ አሻ፣ ዩሁዳ አሻ፣ ሲዋና አሻ ጌዴኔ? አ ሚቻቲ ኦናና ህዋን ደዲያዋንታ ጌዲኪኖ?» ያጌዳ፣ ኢ ጊያዋ አኬናን ኢጻዲኖ።

4 ዩሱሲ ህ አሳሲ፣ «ናቢ ባሪ ጋዲያን፣ ባሪ ዳባቲዋኒኔ ባሪንቲ ሶይ አሳን ቦንቲቲናዋፔ አቲን፣ ኡባሳን ቦንቲቲ» ያጌዳ።

5 ኢ ህዋን ባሪ ኩሺያ አማራዳ አሳቲዋ ሰላ ዋሊዳ፣ ኡንቱንታ ፓሌዳዋፔ አቲን፣ ጮራ ማላታ ኦላናው አይኔ ዳንዳይቤና። 6 አሳይ አማኒቤና ዲራው ማላሌቲዳ።

ዩሱሲ ታማኔ ላዑ ባሪና ካሊያዋንቱ ታማሪሳናዳን ኪቲዳ (ማት 10:5-15፤ ሉቅ 9:1-6)

ህዋፔ ጉዬያን፣ ዩሱሲ ህዋ ሄራን ደዲያ ቄሪ ካታማቲዋን ዩዩ ዩዩዳ፣ አሳ ታማርሱዳ። 7 ዩሱሲ ታማኔ ላዑ ባሪና ካሊያዋንታ ባሪኮ ጸሲዳ፣ ላዑዋ ላዑዋ ኪቲዳ፤ ቃሲ ኡንቱንቶ ኢታ አያናቲዋ ኬሲያ ማታ አሜዳ። 8 ኡንቱንታ፣ «ኦጊያ ፃምባፔ አቲን፣ ቁማ፣

† 5:41 ፃሊታ፣ ቁሚ፣ ሃ ቃላቲ አራማዩኬ ጌቲቲያ ቃላን ዩሱሳ ዋዲያን ፓሌሰቲኔ ጋዴን ሃሳዩቲያዋ። ፃሊታ ጊያዌኔ ቁሚ ጊያዌ አማራጭ ቃላ ጌዴና። ሺን ግሪኪያ ቃላ። * 6:3 አናጻያ፣ ግሪኬ ቢሌላን ሹቻ ዋይ ኤርቃ ሚሊሲዳ ሜዲያ አሳ ጌዴ ጎሳቲ።

ቃርጨቲያ፡ ሂንቲው ሚሻ አያኔካ ኦይቆፒቴ። 9 ሂንቲንቱ ጌዲያን ጫማካ ዋሊቴ፤ ሺን ላዑ ማዩዋ ማዮፒቴ» ያጌዳ። 10 ቃሲካ ኡንቱንታ፡ «ሂንቲንታ ኣሳይ ሃቃን ሞጦፔኔ፡ ሃዋፔ ኬሳና ጋካናው፡ ሄ ጎሊያን ኡቲ ኣገቴ። 11 ሂንቲንታ ኣሳይ ሞከናሳ ዋይ ሂንቲ ኡዲያባ ሲሴናሳ ሃቃ ገደፔካ፡ ሄ ጋዲያን ዴዲያ ኣሳው ሃዋ ማርካ ገደና ማላ፡ ሃዋፔ ኬሲዴ፡ ሂንቲ ጌዲያፔ ባና ሾጩቴ» ተ ያጌዳ።

12 ታማኔ ላዑ ኣ ካሊያዋንቱ ቢዴ፡ ኣሳይ ባሬንቱ ናጋራፔ ሲማናዳን፡ ቃላ ኦዴዲኖ። 13 ኡንቲንቱ ኣሳፔ ዳር ኢታ ኣያናቱዋ ኬሲዴ፡ ሃርጊያ ኣሳ ጮራ ዛይቲያ ኦኪዴ ፓሌዲኖ።

ፃማቂያ ዮሃንሳ ሃይቁዋ

(ማጥ 14:1-12፤ ሉቅ 9:7-9)

14 ኣሳይ ዬሱሳ ሱንጻ ዴንሊያ ዲራው፡ ካቲያ ሄርዲሴ ሃዋ ኡባ ሲሴዳ፤ ኢቲ ኢቲ ኣሳይ፡ «ፃማቂያ ዮሃንሲ ሃይቁዋፔ ዴንዴዳ፤ ሃዋሲ ኣው ዋልቃማ ማላታ ኦሊያ ዋልቃይ ዴዔ» ያጌዳ።

15 ሺን ሃራንቱ ኣ፡ «ሃዌ ኤላሳ» ያጌዲኖ።

ሃራንቱ ቃሲ፡ «ሃዌ በኒ ዋዴ ናባቱዋ ማላቲያ ናቢያ» ያጌዲኖ።

16 ሺን ሄርዲሴ ሃዋ ሲሴዳ ዋዴ፡ «ሃዌ ታኒ ቆጲያ ሙጨሲዳ ፃማቂያ ዮሃንሳ፡ ኢ ሃይቁዋፔ ፓፄዳ» ያጌዳ።

17 ኣዩሲ ጎፔ፡ ሄርዲሴ ባሬ ኢሻ ፒሊጶሳ ማቻቶ ሄርዲያዶ ኣኪ ዋሌዳ፤ ሄርዲሴ ኢዚ ዲራው፡ ባሬ ሁጳው ኣሳ ኪቲዴ፡ ዮሃንሳ ኦይሊዴ፡ ቃሺሲ ዋሌዳ። 18 ኣዩሲ ጎፔ፡ ዮሃንሲ ሄርዲሳ፡ «ኔኒ ኔ ኢሻ ማቻቶ ኣካናው ቤሴና» ያገ ዋሌዳ።

19 ሄርዲያዳ ዮሃንሳው ኡሉዋን ሞርኪያ ኦይቃዴ ኣ ዋጲሳናው ኮያዲ፤ ሺን ዳንዳያቤይኩ። 20 ዮሃንሲ ፃሎ ኣሳኔ ጌሻ ኣሳ ገዴዳዋ ሄርዲሴ ኤራዳ ዲራው፡ ኣው ያዩዴ፡ ሎይሊ ናጊ ዋሌዳ፤ ዮሃንሲ ጊያዋ ሲሲዴ፡ ባሬ ዋዛናን ዳሪሲ ሜቶቲዴካ ኣባ ናሼቻን ሲሴዳ።

21 ሄርዲሴ ባሬ ዬሌቴዳ ጋላሲ፡ ጋዲያ ኣዩሲያዋንቶ፡ ሻላቃቱዋሲኔ ጋሊላን ዴዲያ ዋልቃማ ኣሳው ሾቢያ ገጊሴዳ ዋዴ፡ ወርሴላን ሄርዲያዳ ኢንጃ ጋላሳ ዴማዲ። 22 ሄርዲያዲ ናታ ኢማላ ሞኪያሳ ጌላ ዲራዴ፡ ሄርዲሳኔ ኣ ኢማላቱዋ ናሼቻዲ፤ ሃዋፔ ጉዬ ካቲ ናቲው፡ «ኔና ሎዔዳዋ ኣያ ገደፔኔ ታና ኦቻ፤ ታኒ ኔው ኢማና» ያጌዳ። 23 ቃሲ ኢዚው ዳሪ ጫቂዴ፡ «ኔኒ

† 6:11 ሂንቲ ጌዲያፔ ባና ሾጩቴ፡ ሃዌ ኣሳይ ኢጻዳዋ ቤሲያዋ። 6:13 ያይ 5:14

ኦፊደር አያ ገደፔካ፣ ታኒ ኔው ኢማና፤ ሃራይ አቶ፣ ታ ካወቴላፔ ባጋ ገደፔካ፣ ታኒ ኔው ኢማና» ያጌዱ።

24 ናታ ካሬ ከሳዴ ባሬ ዳዮ፣ «አያ ኢማ ጎ?» ያጋዴ ኦቻዱ።

ኢ ዳያ፣ «ፃማቂያ ዮሃንሳ ሁጲያ ኢማ ጋ» ያጋዱ።

25 ናታ ኤሌካ ካቲያኮ ባዴ አ፣ «ፃማቂያ ዮሃንሳ ሁጲያ ዋጪቲያን ዋሳዴ፣ ኔኒ ሃዒ ታው ኢማናዳን ኮያይ» ያጋዱ።

26 ሄዋፔ ጉዬ ካቲ ዳሪ ቃሬቲዳ፤ ሺን ባሬ ጫቁዋ ዲራውኔ ባሬ ኢማላቲዋ ዲራው ኢዚው ጫቁዳ ጫቁዋ ኮላናው ኮዪቤና።

27 ሄዋ ዲራው፣ ኤሌካ ናጊያዋ ከቲዴ፣ ዮሃንሳ ሁጲያ አሃና ማላ አዛዜዳ፤ ናጊያዋ ቃሽ ጎሌ ቢዴ፣ ዮሃንሳ ቆጲያ ሙጩዳ። 28 ሄ ሙጩዳዋ ዋጪቲያን ዋላ አሂዴ፣ ናቲው ኢማዳ፤ ናታ ቃሲ ባሬ አቲው ኢማዱ። 29 ዮሃንሳ ካሊያዋንቱ ሄዋ ሲሴዳ ዋዴ ዪዴ፣ አ ኣጎ አፊዴ ሞጌዲና።

ዩሱሲ ኢቼሹ ሻዓ አሳ ሚዚዴ ካልሴዳ ታሪኪያ
(ማት 14:13-21፤ ሉቅ 9:10-17፤ ዮሀ 6:1-14)

30 ዩሱሲ ከቴዳዋንቱ ሲሚዴ፣ ዩሱሳና ጋኬቲዴ፣ ባሬንቱ ኦሌዳባኔ ባሬንቱ ታማርሴዳባ ኡባ ዩሱሳሲ ኦዴዲና። 31 ቢያ አሳይኔ ዪያ አሳይ ዳሪና፣ ሃራይ አቶ ቁማ ማናዉካ ኡንቱንታ ጋሌናን ኢዳዳ ዲራው፣ ዩሱሲ ኡንቱንታ፣ «ኦሬካ ጉላ ሸምፔ አካናው አሳይ ባይናሳ ቦይቲ» † ያጌዱ። 32 ዩሱሲኔ ኡንቱንቱ ባሬንቱ ፃላላ ዋንጊሪያን ኡቲዴ፣ አሳይ ባይናሳ ቤዲና።

33 ኡንቱንቱ ቢሺን፣ ጮራ አሳይ ኡንቱንታ ቤዒዴ ኤሬዳ፤ ካታማ ኡባፔ ጌዲያን ዋዲዴ፣ ኡንቱንቱ ቢያሳ ኡንቱንቱፔ ካሴቲዴ ጋኬዲና። 34 ዩሱሲ ዋንጊሪያፔ ከሲዴ፣ ጮራ አሳ ቤዒዳ፤ አሳይ ሄሚያ አሳይ ባይና ደርሳ ማላ ጊዴዳ ዲራው፣ ቃሬቲዴ አሳ ዳርባ ታማሪሱዋ ደሚዳ።

35 ሳዓይ ኦማርሲያ ዋዴ፣ ዩሱሳ ካሊያዋንቱ አኮ ዪዴ፣ «ሃዋ ሳዓይ አሳይ ባይና ሳዓይ፤ ሃዒ ሳዓይካ ቃሚዲጌዳ፤ 36 አሳይ ሄራኔ ቁሪ ካታማቲዋ ጊዶ ቢዴ፣ ባሬንቶ ሚያባ ሻማና ማላ፣ አሳ ሞዪዛ» ያጌዲና።

37 ሺን ዩሱሲ ዛሪዴ ኡንቱንታ፣ «አሳው ሚያባ ሂንቲ ኢሚቲ» ያጌዱ።

† 6:31 አሳይ ባይናሳ፣ ሃዋ ጋለላ ጌቲያ ዋምባፔ ፑዴሃ ዶላ ባጋና ዴዔ። 6:45 ያሊቲ። 6:34 ፓይ 27:17፤ 1ካት 22:17፤ 2ኦድ 18:16፤ ሂዝ 34:5፤ ማት 9:36

ሄዋፔ ጉዬ ኡንቱንቱ፣ «ኮኒ ቢዳ፣ ላዑ ያቱ ቢራ ሳንቲሚያ ስ ቁማ ሻሚዳ፣ አሳይ ማናው ኢማኔ?» ያጊዳ ኣ ኦቹዲኖ።

38 ዩሱሲ ኡንቱንታ፣ «ሂንቱንቶ ኣፑን ዳቡ ዳዒ? ቢዳ ቤዒቱ» ያጊዳ።

ኡንቱንቱ ቤዒዳ፣ «ኢቹሹ ዳቡዋኔ ላዑ ሞሊያ» ያጊዲኖ።

39 ዩሱሲ ባሬና ካሊያዋንታ አሳ ኡባ ጨታን ጨታን ሻኪ ሻኪዳ፣ ማታን ኡቲሳና ማላ ኣዛዜዳ። 40 አሳይ ያቱ ያቱኔ ኢሻታሙ ኢሻታሙ ጨታን ጨታን ኡቱዲኖ። 41 ዩሱሲ ኢቹሹ ዳቡዋኔ ላዑ ሞሊያ ኦይቂዳ፣ ፑዳ ሳሉዋ ያሊዳ፣ ያሳ ጋላቲዳ፤ ዳቡቱዋ ሚንሱዳ አሳው ጊሻና ማላ፣ ባሬና ካሊያዋንቱሲ ኢሜዳ፤ ቃሲ ላዑ ሞሊያካ ኡንቱንቱ ኡባው ሻኪዳ። 42 አሳይ ኡባይ ሚዳ ካሌዲኖ። 43 ሄዋፔ ጉዬ አቲዳ ዳቡቱዋ ደካይኔ ሞሊያ ደካይ ታማኔ ላዑ ዛምቤሊያ ኩሜዳዋ ዩሱሳ ካሊያዋንቱ ዳንሱዲኖ። 44 ዳቡዋ ሚዳ አቱማ አሳይ ኢቹሹ ሻዒ።

ዩሱሲ ኣባ ቦላን ሃሚቲዳ ቤዳ (ማት 14:22-33፤ ዮሀ 6:15-21)

45 ኤሌካ ዩሱሲ ሄ ጮራ አሳ ሞዪዲዳ፣ ባሬና ካሊያዋንቱ ዋንጊሪያን ጌሊዳ፣ ኣባፔ ሄሬንግን ዳዒያ ቤቲሳይዳ ጊያ ካታማ ባሬፔ ሲንግቲዳ ባናዲን ኣዛዜዳ። 46 ኡንቱንታ ሞዪዲዳዋፔ ጉዪያን፣ ያሳ ዋሳናው ዘዚያ ከሴዳ።

47 ሳዒይ ቃሚያ ዋዳ ዋንጊሪ ዋምባ ጊዲዋን ዳዒሺን፣ ዩሱሲ ዋምባፔ ጋፃን ባሬካ ዳዒ። 48 ጫርኩ ኣ ካሊያዋንቱኮ ጫርኪያ ዲራው፣ ባሬና ካሊያዋንታ ዋምባ ቤታይ ሚቶሊያዋ ዩሱሲ ቤዒዳ፣ ኩቱ ዋሳና ሃኒያ ዋዳ ዋምባ ቦላን ሃሚቲዳ፣ ኡንቱንቱኮ ዩዳ፤ ኡንቱንታ ዩጊ ኣጳናው ኮዩዳ። 49 ሺን ዋምባ ቦላን ኢ ሃሚቲሺን፣ ኡንቱንቱ ኣ ቤዒዳ፣ ባሬንቶ ሞይቲሊያ ማላቲና ዋሴዲኖ። 50 ኣዪሲ ጎፔ፣ ኡንቱንቱ ኡባይ ኣ ቤዒዳ፣ ያሻ ኮኮሬዲኖ፤ ሺን ኤሌካ ዩሱሲ ኡንቱንታ፣ «ኣይኔ ባዋ፤ ታናቲኔ ያዮፕቱ» ያጊዳ። 51 ዩሱሲ ኡንቱንቱና ኢቲፔ ዋንጊሪያን ጌሊና፣ ጫርኩ ዋፑ ጌዳ፤ ኡንቱንቱ ዳር ማላሌቲዲኖ። 52 ኣዪሲ ጎፔ፣ ኡንቱንቱ ዋዛናይ ጀሌዳ ዲራው፣ ኡንቱንቱ ኡኪላባ ኣኬኪቤይኪኖ።

§ 6:37 ቢራ ሳንቲሚያ፡ ቢኒ ዋዲያን ኣሳ ጋዲያን ኢቲ ጋላሳ ኡኒያ ኣሊ ፔሹዳ ኣሳው ኢቲ ቢራ ሳንቲሚ ኢሜቲ። ማት 20:2 ያሊቲ።

ዩሱሲ ገንጎሪዳን ሃርጋንቻቱዋ ፓሌዳ

(ማጥ 14:34-36)

53 ኢንቴንቲ ኣባ ፒኒዳ፡ ገንጎሪዳ ጊያ ቢታ ጋኬዲኖ፤ ያኒ ዋንጊሪያ ጋፃ ሺሺ ቃቼዲኖ። 54 ኢንቴንቲ ዋንጊሪያፕ ዋጂያዋን፤ ኣሳይ ኤሌካ ዩሱሳ ኤሪኔ 55 ሄዋ ሄራን ዳዒያ ጋዲያ ኡባን ዋዳራቲዳ፡ ሃርጋንቻቱዋ ሻንቻማን ቶኪዳ፡ «ዩሱሲ ዳዒ» ገና ሲሴዳሳ ኣሁዋ ደመዳ። 56 ዩሱሲ ቤዳሳ ኡባን ቄሪ ካታማን ጊዲና፡ ዋልቃማ ካታማን ጊዲና፡ ሄራ ጊዲን ጊዲናካ፡ ጌያ ዳንባን ኣሳይ ሃርጋንቻቱዋ ኣኮ ኣፌ። ዩሱሲ ባሬ ማዩዋ ማጨራ ጊደፔኔ ሃርጋንቻቱዋ ቦሺሳና ማላ፡ ኣሳይ ኣ ዋሴዳ፤ ቦቹዳ ኡባይ ፓዳዳ።

7

ዩሱሲ ኣሳ ዋጋፔ ኮሺናዋ ጳልቁዳ

(ማጥ 15:1-9)

1 ፓሪሳዋቱኔ ዩሩሳላሜፔ ዩዳ፡ ሙሴ ሂጊያ ታማሪሲያ ኣማራዳ ኣሳቱ ዩሱሳኮ ሺቁዲኖ። 2 ዩሱሳ ካሊያዋንቱፔ ኢቱ ኢቱ ቱና ኩሺያን፡ ሄዋ ጊያዌ ሜጤቴናን ቁማ ሚያዋንታ * ቤዒዲኖ። 3 ኣዩሲ ጎፔ፡ ፓሪሳዋቱኔ ኣዩሁዳ ኣሳይ ኡባይ ባሬንቱ ኣዋቱዋ ዋጋ ናጊዳ፡ ባሬንቱ ኩሺያ ሎይሊ ሜጤቴናን ሚኪኖ። 4 ቃሲ ጌያፔ ዩዳካ ሜጤቴናን ዳዒዳ ሚኪኖ። ቃሲ ኡንቱንቱ ባሬንቱ ኣዋቱዋፔ ኣኬዳ ሃራ ጮራ ዋጋይ ዳዒ፤ ሄዌካ ዋንጫ፡ ኬሪያ፡ ቢራታፔ ሜዴዳ ሚሻኔ ኣርሳ ሜጤያ ዋጋ። 5 ፓሪሳዋቱኔ ሙሴ ሂጊያ ታማርሲያዋንቱ ዩሱሳ፡ «ኔና ካሊያዋንቱ ኣዩሲ ኑ ኣዋቱዋ ዋጋ ካሌናን ኢዲዳ፡ ባሬንቱ ኩሺያ ሜጤቴናን ቁማ ሚኖ?» ያጊዳ ኦቹዲኖ። 6-7 ዩሱሲ ኡንቱንታ ሃዋዳን ያጌዳ፤ «ኢሲያሲ ቲምቢቲያ ኦዳዳ ዋዳ፡ ሂንቱንቱባ፡ ሎዓ ማላቲያ ኢታቱባ ፃፌዳዋዳንካ፡ ሳሳይ፡ «ሃዌ ኣሳይ ታና ባሬ ቦላ ደናን ቦንቹ። ሺን ኡንቱንቱ ዋዛናይ ታፔ ሃኩዋን ዳዒ፤ ኣሳይ ታው ሚላ ጎዩኔ። ኣዩሲ ጎፔ፡ ኣሳይ ኦሌዳ ኣዛዙዋ

* 7:2 ሜጤቴናን ቁማ ሚያዋንታ፡ ኣዩሁዳ ኣሳቱዋ ዋጋን ሜጤቴና ኩሺያን ቁማ ሙሳይ ቱናዳን ፓይዳቱ። ሄዋሲ ቁማ ማናፔ ካሴና ኩሺያ ሜቻ ሎይሊ ሚኒሲኖ።

ጾሳ ሂጊያ ማላቲሲዳ ታማርሴ» ጌዳ።
ያጊዳ ቲምቢቲያ ቱሙቀ ኦዳዳ።

8 «ጾሳ አዛዙቀ ሂንቲ አጊዳ፣ አሳ ዋጋ ሚኒሲዳ ናጊታ»
ያጊዳ።

9 ቃሲካ ዬሱሲ፣ «ሂንቲንቱ ሂንቲ ዋጋ ናጋናው ጾሳ አዛዙቀ
አጊታ። 10 አዪሲ ጎፔ ሙሴ፣ ሳ አባኔ ኔ ዳዮ ቦንቻ» ቃሲ፣
«ባሬ አባኔ ባሬ አቶ ቦሪያዌ ሃይቁቀን ሙሬቶ» ያጊዳ። 11 ሺን
ኢቲ ኡራው ባሬ አዉቀ ዋይ ባሬ አቶ ማዲያባይ ዳዲሺን ኢ፣
«ሃዌ ቁርባኒያ፤ ሃዋ ጉሳይ ጾሳባ ጊያዋ» ጎፔ። 12 ኢ ባሬ አዉቀ
ዋይ ባሬ አቶ ዋይፔ ማዳናዋ አይኔ ኮዪኪታ። 13 ሃ ሃናታን ሂንቲ
ሂንቲንቱ ዋጋ ናጋናው፣ ጾሳ ቃላ ኮሊዳ፣ ሄዋ ማላ ዳርባ ኦሊታ»
ያጊዳ።

አሳ ቱኒሲያዋንታ
(ማጥ 15:10-20)

14 ዬሱሲ ጮራ አሳ ቃሲካ ባሬኮ ያሲዳ፣ «ኡባይ ታኒ ጊያዋ
ሲሲቲኔ አኬኪቲ። 15 አሳፔ ኬሲያዌ አሳ ቱኒሲያዋፔ አቲን፣
ካሬፔ አሳ ጊዶ ጌሊዳ፣ አሳ ቱኒሲያባይ አይኔ ባዋ፤ 16 ሲሳናው
ሃይላይ ዳዲያ ኡራይ ኦኒኔ ሲሶ» ያጊዳ።

17 ዬሱሲ ጮራ አሳ አጊዳ ሶይ ጌሌዳ ዋዳ፣ አ ካሊያዋንቱ
ሄ ለሚሱቀባ አ ኦቼዲና። 18 ኢ ኡንቲንታ፣ «ሂንቲንቶካ ቃሲ
ጌሊቤኔ? ካሬፔ አሳ ዋዛናን ጌሊያባይ አይኔ አሳ ቱኒሳናው
ዳንዳዬናዋ አኬኪቲ? 19 አዪሲ ጎፔ፣ ቁማይ አሳ ኡሉዋ ጊዶ
ጌሊዳ፣ ካሬው ኬሲያዋፔ አቲን፣ አሳ ዋዛና ጊዶ ጌሌና» ያጊዳ።
ሃዋዳንካ ዬሱሲ ቁማ ኡባይ ቱና ጊዳናዋ ኤሪሴዳ።

20 ቃሲካ ዬሱሲ ሃዋዳን ያጊዳ፤ «አሳ ቱኒሲያባይ አሳ ዋዛና
ጊዶፔ ኬሲያባ። 21 አዪሲ ጎፔ፣ አሳ ዋዛና ጊዶፔ ኬሲያዌ ኢታ
ቆፋ፤ ዋሹሚያዋ፤ ዉዲያዋ፤ ዋዲያዋ፤ ጫራቴላ፤ 22 ዮራቴላ፤
ኡዚያ ዋይ ባሬና ዶሲያዋ፤ ኢታቴላ ዋይ ጨሚያዋ፤ ጌኒያ፤
ማጫዋ አሞቲያዋ፤ ቃናቲያዋ፤ ቦሪያዋ ዋይ ዘጊሪያዋ፤ አዩዋ፤
ኤያቴላ። 23 ሃ ኢታባይ ኡባይ አሳ ዋዛና ጊዶፔ ኬሲዳ፣ አሳ
ቱኒሴ» ያጊዳ።

ኢቲ ጊሪኬ ሚሺራቲ አማኑቀ
(ማጥ 15:21-28)

24 ዬሱሲ ሃዋፔ አጊዳ፣ ዓርሳኔ ሲዶና ጊያ ካታማቱዋ ማታን
ዳዲያ ጋዲያ ቤዳ፣ ኢቲ ጎሊያ ጌሌዳ፤ ቃሲ ኢ ያኒ ዳዲያዋ ኦኒኔ

7:6-7 አሳ 29:13 7:10 ኬሰ 20:12፤ 21:17፤ ዋግ 20:9፤ ዛር 5:16

ኤራናዎ ኮዩቤና፤ ሺን ቆሴቲዳ ጋሚዓናው ዳንዳዩቤና። 25 ሺን ባሬ ጉላ ናቲ ቦላ ኢታ ኣያናይ ዳዒያ ኢቲ ሚሺራታ ዩሱሳባ ሰሳዳ። ኤሌካ ኣኮ ያኔ ኣ ጌዲያን ጉፋና ኣጋዲ። 26 ሄ ሚሺራታ ኣዩሁዳ ኣሳ ጊዲኩ፤ ኣ ዩሌቴዳዌካ ሶሪያ ጊያ ጋዲያና፤ ኣ ባሬ ናቲ፤ ፃላሂያ ኬሳና ማላ። ዩሱሳ ዎሳዲ።

27 ሺን ዩሱሲ ዛሪዳ። «ናናይ ካሴቲዳ ቁማ ካሊኖ፤ ኣዩሲ ጎፔ። ናና ቁማ ኣኪዳ። ካናቱዎሲ † ኦሊያዌ ሎዓ ጊዳና» ያጌዳ።

28 ሚሺራታ ዛሪዳ። «ቱማካ ታ ጎዳው። ሃራይ ኣቶ ሳምፓ ሚዩያን ዳዒያ ካናቱካ ናናቱዎ፤ ኣቲዳ ሱፓ ሚኖ» ያጋዲ።

29 ዩሱሲ ቃሲ ኢዞ። «ሃ ኔኒ ሃሳዬዳ ቃላ ዲራው። ፃላሂ ኔ ናቲ፤ ኬሴዳ፤ ሰሚ ኔ ሶይ ባ» ያጌዳ።

30 ሚሺራታ ባሬ ሶይ ቢያ ዎዳ። ኢዚ ናቲ፤ ፃላሂ ኬሲና። ሃፃን ጊሴዳዉኖ ዳማዲ።

ዩሱሲ ቱሌኔ ዲዳ ጊዳዳ ኢቲ ቢታኒያ ፓሌዳ

31 ዩሱሲ ፃሪሳ ጋዲያ፤ ኬሲዳ። ሰዶናና ነ ታው ካታማ ጊያ ጋዲያና ካንሌዳ። ጋሊላ ኣባኮ ቤዳ። 32 ኣሳይ ቱሌኔ ዲዳ ጊዳዳ ቢታኒያ ዩሱሳኮ ኣሂዳ። ባሬ ኩሺያ ኣ ቦላን ዎላና ማላ። ዩሱሳ ዎሴዲኖ። 33 ዩሱሲ ባሬካ ሄ ቢታኒያ ጮራ ኣሳ፤ ጋፃ ኬሲዳ። ባሬ ቢራዲያ ኣ ሃይላን ዩዳዳ፤ ቃሲ ጨቻ ጨቹዳ። ኣ ኢንፃርሳ ቦቹዳ። 34 ሳሉዎ ፑዳ ፃሊዳ። ቶኪ ሸምፒዳ። «ኤፍታሂ» ‡ ያጌዳ፤ ሄዎ ጊያዌ ዶዬታ ጊያዎ። 35 ቢታኒያ ሃይላይ ኤሌካ ዶዬቲ ኣጌዳ፤ ቃሲ ኣ ሃሳዬና ኢንፃርሳይካ ቢሌቲ ኣጌዳ፤ ቢታኒ ኣይኔ ዎዬቴናን ሃሳዩ ኣጌዳ።

36 ዩሱሲ ኣሳው። «ሃዎ ኦሲኔ ኦዶፒቴ» ያጊዳ ኦዳዳ፤ ሺን ኢ ዳሪሲ ሚኒሲ ኦዲና። ኣሳይ ቃሲ ኦዲዎ ያ ዳሪሴዳ። 37 ሄዎ ሲሴዳ ኣሳይ ኡባይ ዳር ማላሌቲዳ። «ኡባባካ ኢ ሎይሊ ኦሌ። ሃራይ ኣቶ ቱሊያካ ሲሴ፤ ቃሲ ዲዲያካ ሃሳዩሴ» ያጌዲኖ።

8

ዩሱሲ ኦይዳ ሻዓ ኣሳ ሚዜዳ

(ማጎ 15:32-39)

1 ሄዎዳ። ጮራ ኣሳይ ቃሲ ዩሱሳኮ ሺቄዳ፤ ኣሳው ሚያባይ ጳዩና። ዩሱሲ ባሬና ካሊያዎንታ ባሬኮ ፃሲዳ። 2 «ሃ ጮራ ኣሳይ

† 7:27 ካናቱዎሲ፡ ሃ ቃላ ኢቲ ኢቲ ኣዩሁዳ ኣሳይ፡ ኣዩሁዳ ጊዳና ኣሳቱዎሲ ጎዴቲያዎ። ‡ 7:34 «ኤፍታሂ»፡ ሃ ቃላይ ዩሱሲ ሃ ኣሳሚያን ዳዒዳ ታማሪሲያ ዎዳ፡ ጎዴቲያ ኣራማዩኬ ያጌቲያ ቃላን ሃሳዩዳዎ።

ታናና ሄዙ ጋላሳይ ጋካናው ጋሚዲዳ፡ ሚያባ አይኔ ዳሚቤና ዲራው፡ ታኒ ኡንቱንቶ ቃሬታይ። 3 ታኒ ኡንቱንታ ኮሻና ሶይ ዬዶፔ፡ ቢዳ ኦጊያን ዳቡሪዳ ኩንዳና፤ አዩሲ ሳፔ፡ ኢቱ ኢቱ ሃኮሳፔ ዬዳ» ያጌዲ።

4 እ ካሊያዋንቱ ዛሬዳ፡ «ሃ አሳይ ባዩና ሳን ሃ አሳ ኡባ ሚዛናው ጊዲያ ቁማ ዳማናው ዳንዳዩያዌ እን?» ያጌዲና።

5 ዬሱሲ ኡንቱንታ፡ «ሂንቱንቶ አፑን ዳቡ ዳዒ?» ያጌዳ ኦቼዲ።

ኡንቱንቱ፡ «ላፑ ዳቡ ዳዒ» ያጌዲና።

6 ዬሱሲ አሳ፡ «ሳዓን ኡቲቱ» ያጌዳ አዛዜዳ፤ ቃሲ ላፑ ዳቡዋ አኪዳ፡ ያሳ ጋላቲዳ፤ ሄ ዳቡዋ ሚንሲዳ፡ አሳው ጊሻና ማላ፡ ባሬና ካሊያዋንቶ ኢሜዳ። ዬሱሳ ካሊያዋንቱ ሄ ጮራ አሳሲ ጊሼዲና። 7 ኡንቱንቶ ቃሲካ አማሬዳ ሱፓ ሞሌቱ ዳዒና፤ ዬሱሲ ሄዋንቶካ ያሳ ጋላቲዳ፡ አሳው ጊሻና ማላ፡ ባሬና ካሊያዋንታ አዛዜዳ። 8 አሳይ ኡባይ ሚዳ ካሊና አቲዳ ደካይ ላፑ ዛምቤሊያ ኩሚዳዋ እ ካሊያዋንቱ ዳንጮዲና። 9 ቁማ ሜዳ አሳይ ኦይዲ ሻዓ ጊዳና፤ ሄዋፔ ጉዩያን፤ ዬሱሲ አሳ ዬዳዳ። 10 ኢ ቃሲ ባሬና ካሊያዋንቱና ኤሌካ ዋንጊሪያን ጌሊዳ፡ ዳልማኑታ * ጊያ ጋዲያ ቤዳ።

ፓሪሳዋቱ ባሬንቶ ማላታይ ኦሴታና ማላ ኦቼዲና
(ማት 16:1-4)

11 ፓሪሳዋቱ ዩዳ፡ ዬሱሳና ፓሉማ ደሚዲና።

ዬሱሳ ፓጫናው ኮዩዳ፡ ሳሉዋፔ ማላታ ባሬንታ ቤሳና ማላ ኦቼዲና። 12 ዬሱሲ ዳሪሲ ቶኪ ሸምፒዳ፡ «ሃ ዋዲያ አሳይ አዩሲ ማላታ ኮዩ? ታኒ ሂንቱንቶ ቱሙዋ ኦዳይ፤ ሃ ዋዲያ አሳው ማላታይ ኡባካ ኢሜቲና» ያጌዳ። 13 ቃሲ ኡንቱንታ ሄዋን ኢጊዳ፡ ዛሬ ዋንጊሪያን ጌሊዳ፡ አባፔ ሄፊንሳ ፔዳ።

ፓሪሳዋቱዋ ኢርሹዋኔ ሄርዲሳ ኢርሹዋ
(ማት 16:5-12)

14 ዬሱሳ ካሊያዋንቱ ቁማ አፋናዋ ደጌዲና፤ ኡንቱንቶ ዋንጊሪያ ጊደን ኢቱ ኡኪላፔ ሃራይ ባዋ። 15 ዬሱሲ ኡንቱንታ፡ «ሂንቱንታ ኤሪቲ፤ ፓሪሳዋቱዋ ኢርሹዋፔኔ ሄርዲሳ † ኢርሹዋፔ ናጌቲቱ» ያጌዳ አዛዜዳ።

* 8:10 ዳልማኑታ፡ ሃዌ ኤሬቲና ሳዓ። † 8:15 ሄርዲሳ፡ ሃዌ ሄርዲሴ አንቲጳሳ ጌቲቲያ ዋጋ ሄርዲሳ ጌቲቲያዋ ናዓ።

16 ኢየሱስ ኢየሱስ ለሆኑት ገደን፡ «ኢህ ሃዋ ገያዌ ኑሲ ቁማይ ባይና ዲራሳ» ያገዴ ሃሳያ ዶሜዲኖ።

17 ዩሱሲ ኢየሱስ ገያዋ ኤሪዴ፡ «ሂንቴንቶ ዳቡ ባዩናዎ አዲሲ ሃሳዩት? ሃሲ ጋካናው ሂንቴው ጌሌኔ? ዎይ አኬኪኪት? ሂንቴ ዎዛናይ ጆሌዴ? 18 ሂንቴንቶ አይፊ ዴዴ፤ ቤዲኪት? ቃሲ ሃይላይ ዴዴ፤ ሲሰኪት? ሂንቴንቶ ሃሳዩትኔ? 19 ታኒ ኢቼሹ ዳቡዎ ኢቼሹ ሻዓ አሳው ማንላ ኢሜዳ ዎዴ፡ አፑን ዛምቤሊያ ኩሜዳ ዶካ ዴንሴዲት?» ያገዴ።

ኢየሱስ፡ «ታማኔ ላዑ ዛምቤሊያ ኩሜዳ ዶካ ዴንሴዴ» ያገዴኖ።

20 «ታኒ ቃሲካ ላፑ ዳቡዎ ኦይዲ ሻዓ አሳው ማንላዴ ኢሜዳ ዎዴ፡ አፑን ዛምቤሊያ ኩሜዳ ዶካ ዴንሴዲት?» ያገዴ።

ኢየሱስ፡ «ላፑ ዛምቤሊያ ኩሜዳ ዶካ ዴንሴዴ» ያገዴኖ።

21 ኢህ ቃሲ፡ «ሃሲካ አኬኪቤይኪት?» ያገዴ።

ዩሱሲ ቤቴሳይዳን ኢቲ ቆቃ ፓሌዳ

22 ዩሱሲኔ አ ካሊያዎንቱ ቤቴሳይዳ ገያ ካታማ ቤዲኖ፤ አሳቱ ቆቃ ቢታኒያ ዩሱሳኮ አሂዴ፡ ሄ ቢታኒያ ቦቻና ማላ፡ አ ዎሴዲኖ። 23 ዩሱሲ ቆቃ ቢታኒያ ኩሺያ ኦይቂዴ፡ ሄራፔ ጋዎ ኬሴዳ፤ አ አይፊያን ጨቺዴ፡ ባሬ ኩሺያ አ ቦላ ዎሊዴ፡ «ኔው አዩንቶ ቤት?» ያገዴ ኦቺዴ።

24 ቢታኒ ዶቂዴ፡ «ታኒ አሳ ቤዓይ፤ ሺን አሳይ ሃማቲዴ፡ ሚላ ማላቲ» ያገዴ።

25 ሄዎፔ ጉዩያን፡ ዩሱሲ ሺሬቲዴ ቢታኒያ አይፊያን ባሬ ኩሺያ ዎሊዴ። አ አይፊ ፓዩዳ፤ ቢታኒካ ሎይሊ ዩሌዳ፤ ቃሲ ኡባባካ ጌሺዴ ቤዔዳ። 26 ዩሱሲ ቢታኒያ፡ «ሄራ ጌሎፓ» ያገ አ ሶይ ዩዴዳ።

ጳውሎስ አማኑዎኔ አ ማርካቲላ

(ማት 16:13-20፤ ሉቅ 9:18-21)

27 ዩሱሲ ባሬና ካሊያዎንቱና ቂሳሪያ ፒሊጶሳ ዴዲያ ቁሪ ሄራቱዎ ቤዳ፤ ኢ ቢሺን ኦሺያን ዩሱሲ፡ «ታና አሳይ ኦና ገ?» ያገዴ ባሬና ካሊያዎንታ ኦቺዴ።

28 አ ካሊያዎንቱ፡ «ኢቲ ኢቲ አሳይ ኦና፡ ሳማቂያ ዮሃኒሳ) ጌ፤ ሃራንቱ፡ «ኤላሳ) ገኖ፤ ቃሲ ሃራንቱ፡ «ናባቱዎፔ ኢቱዎ) ገኖ» ያገዴኖ።

29 ዩሱሲ ኢየሱስ፡ «ሂንቴሺ ታና ኦና ገቲ?» ያገዴ ኦቺዴ።

ጳውሎስ፡ «ኔን ደራቴዳ ከሪስቶስ» ያጊዳ ዛሬዳ።
30 ዮሱስ፡ «ታባ ኦሲኔ ኦደፒቴ» ያጊዳ ኡንቱንታ ኣዛዜዳ።

ዮሱስ ባሬና ጋካና ሜቱዋባኔ ዋዪያባ ኮይሩዋ ሃሳዬ
(ማት 16:21-28፤ ሉቅ 9:22-27)

31 ዮሱስ ባሬና ካሊያዋንታ፡ «ታኒ፡ ኣሳ ናዓይ፡ ዳሪ ዋዪታናው ቤሴ፤ ጨማቱ፡ ቄሳቱዋ ካፓቱኔ ሂጊያ ታማርሲያዋንቱ ታና ኢፃናው ቤሴ፤ ኡንቱንቱ ታና ዎጳናውኔ ታኒ ሄዜንሊያ ጋላሳፔ ጉዩያን፡ ሃይቁዋፔ ዳንዳናው ቤሴ» ያጊዳ ታማሪሱዋ ደሜዳ።

32 ሄዋ ኢ ኡንቱንቶ ጌሺዳ ኦዳዳ፤ ጳውሎስ ኣ ኢቲ ባጋ ዛሬዳ፡ ዛሬታ ደሜዳ።

33 ሺን ዮሱስ ጉዬ ሲሚዳ፡ ባሬና ካሊያዋንታ ጂሊዳ ጳውሎስ፡ «ሃ ሴፃናው፡ ከቻ ታ ማታፔ! ኔን ኣሳይ ቆፒያዋ ቆፓሳፔ ኣቲን፡ ያሳይ ቆፒያዋ ጊዳና» ያጊዳ።

ዮሱስ ካሉሳይ ኦቺያ ጋቲያ
(ማት 10:38-39፤ 16:24-28፤ ሉቅ 9:23-27፤ 14:26-27)

34 ዮሱስ ጮራ ኣሳኔ ባሬና ካሊያዋንታ ባሬኮ ጃሲዳ፡ «ታና ካላና ኮዪያ ኡራይ ዳዎፔ፡ ባሬና ካዳ፤ ያቲዳ ባሬ ማስቃሊያ ቶኪዳ፡ ታና ካሎ። 35 ኣዪሲ ጎፔ፡ ባሬ ሺምፑዋ ተ ኣሻና ኮዪያ ኡራይ ባዪዛናዋ፤ ሺን ታ ዲራውኔ ዎንጋላ ሚሺራቸዋ ዲራው ባሬ ሺምፑዋ ባዪዪያ ኡራይ ኣሻናዋ። 36 ኢቲ ኡራይ ሳዓን ዳዒያ ኡባባ ባሬው ሺሺዳ፡ ባሬ ሺምፑዋ ባዪዛፔ፡ ኣ ኣያ ማዳኔ? 37 ኢቲ ኡራይ ባሬ ሺምፑዋ ዎዛናው ኣያ ኢማና ዳንዳዪ?

38 ያሳ ኣማኔና ሃ ናጋራንቻ ዬሌታ ዎዲያን፡ ኢቲ ኡራይ ታናኒኔ ታ ቃላን ዬላቶፔ፡ ታኒካ፡ ኣሳ ናዓይ፡ ቃሲ ታ ኣዉዋ ቦንቸዋን ጌሻ ከታንቻቱዋና ዪያ ዎዳካ፡ ኣኒ ዬላታና» ያጊዳ።

9

ዮሱስ ማላይ ላሜቱዳዋ ኦዲያ ታሪኪያ
(ማት 17:1-13፤ ሉቅ 9:28-36)

1 ዮሱስ ኡንቱንታ፡ «ታኒ ሂንቱንቶ ቱሙዋ ጋይ፤ ኣማሬዳ ኣሳቱ ያሳ ካዉቱላይ ዎልቃና ዪያዋ ቤዔናን ሃይቄናዋንቱ ሃዋን ዳዒኖ» ያጊዳ።

† 8:35 ሺምፑዋ፡ ግሪኪያ ቃላን ኢዛዋ ዎይ ኣሳ ሺምፑዋ ጌቴቲ ቢሉቴዳ።

2 ዩሱሲ ኡሱፑን ጋላሳ፣ ገደያን፣ ባሬናና ጳጳሮሳ፣ ያዩቆባኔ ዮሃንሳ ኣኪዳ፣ ኡንቱንቱ ፃላላ ዋልቃማ ዳሪያ ቦላ ኬሴዳ፤ ኡንቱንቱ ሲንሳን ላሜቲዳ፤ 3 ኣ ማዩካ ጳሌዳ፤ ሳዓን ማዩዋ ማጪያ ኦኒኔ ጌሻናው ዳንዳዩናዋ ኬና ዳሪ ቦፃዳ። 4 ሄ ሄዙ ዩሱሳ ካሊያዋንቱ፣ ኤላሲኔ ሙሴ ዩሱሳና ሃሲያዋንታ ቤዔዲኖ።

5 ጳጳሮሲ ዩሱሳ፣ «ታማሪሲያዎ፣ ኦኒ ሃዋን ዳዒያዌ ኦሲ ሎዓ፤ ኦኒ ሄዙ ዳሳቱዋ ኢቱዋ ኔው፣ ኢቱዋ ሙሴው፣ ቃሲ ኢቱዋ ኤላሳሲ ኬፃና» ያጌዳ። 6 ኢ ዋጋኔንቶኔ ኤሪቤና፤ ኣዩሲ ጎፔ፣ ኢካ ዮኮንቱካ ዳሪ ያዩዲኖ።

7 ሄዋፔ ገደያን፣ ሻሪ ዩዳ ኡንቱንታ ካሚና ሻሪያፔ፣ «ሃዌ ታኒ ሲቁያ ታ ናዓ፤ ኢ ጊያዋ ሲሲቱ» ጊያ ቃላይ ዩዳ። 8 ኤሌካ ኡንቱንቱ ዩሺ ኣሲ ፃሊያ ዋዳ፣ ዩሱሳፔ ኣቲን፣ ሃራ ኦናኔ ባሬንቱ ማታን ቤዒቤይኪኖ።

9 ኡንቱንቱ ዳሪያፔ ዋዲሺን፣ ዩሱሲ ኡንቱንታ፣ «ታኒ፣ ኣሳ ናዓይ፣ ሃይቁዋፔ ዳንዳና ጋካናው፣ ሂንቱ ቤዒዳባ ኦሲኔ ኦዶፕቱ» ያጌዳ ኣዛዜዳ።

10 ኢ ኣዛዜዳዋ ኡንቱንቱ፣ « (ኤኖ) ጊዳ፣ ሃ ሃይቁዋፔ ዳንዲያዋ ጊያዌ ዋጊያዌ» ያጌዳ፣ ባሬንቱ ጊዶን ሃሳዩቲዲኖ።

11 ኡንቱንቱ ዩሱሳ፣ «ሂጊያ ታማርሲያዋንቱ ኣዩሲ፣ ኤላሳ ካሲቲዳ ያናው ቤሴ) ጊኖ?» ያጌዳ ኦቼዲኖ።

12 ኢ ዛሪዳ ያጌዳ፤ «ቱማካ፣ ኤላሳ ካሲት ዩዳ፣ ኡባባ ጊሊሴ፤ ያቲና፣ ኣዩሲ ያሳ ማፃፋይ፣ ኣሳ ናዓይ ዳሪ ዋዩታናኔ ኢፃታና) ያጌ? 13 ሺን ታኒ ሂንቱንቶ ኦዳይ፤ ኤላሳ ዩዳ፤ ቃሲ ኣባይ ያሳ ማፃፋን ፃፊቲዳዋዳንካ፣ ኣሳይ ኣ ባሬ ኮዩዳባ ኦሌዳ» ያጌዳ።

ዩሱሲ ኢታ ኣያናይ ኦይቁዳ ናዓ ፓሌዳ
(ማጥ 17:14-21፤ ሉቅ 9:37-43)

14 ዩሱሲ፣ ጳጳሮሲ፣ ያዩቆባኔ ዮሃንሲ ዮኮ ዩሱሳ ካሊያዋንቱሮ ሲሚዳ ዩያ ዋዳ፣ ጮራ ኣሳይ ሄ ካሊያዋንቱ ዩሹዋን ኤቁዳዋኔ ሂጊያ ታማሪሲያ ኣማሬዳ ኣሳቱ ኡንቱንቱና ፓሉሜቲያዋንታ ቤዔዲኖ። 15 ሄ ጮራ ኣሳይ ዩሱሳ ቤዔዳ ዋዳ ማላሌቲ ዳጋሚዳ፣ ኤሌካ ኣኮ ዋፂ ዩዳ፣ ኣ ሳሮቲዳ። 16 ዩሱሲ ባሬና ካሊያዋንታ «ኡንቱንቱና ኣያ ፓሉሜቲቱ?» ያጌዳ ኦቼዳ።

17 ሄ ጮራ ኣሳ ጊዶፔ ኢቲ ቢታኒ ዛሪዳ፣ «ታማሪሲያዎ፣ ታ ናዓ ቦላን ሃሳያ ዲጊያ ኢታ ኣያናይ ዳዒያ ዲራው፣ ኣ ኔኮ ኣካዳ

ያዲ። 18 ሃ ኢታ አያናይ አ ኦይቂያ ዋዴ ኡባን፣ አ ኦሌ፤ አ ደናናካ ሆሙ ፓሮቲ፤ ቃሲ አቻ ጋርጨሴ፤ ቦላካ ዘሊሴ። አፔ ሃ ኢታ አያና ኬሳና ማላ፣ ኔና ካሊያዋንቶ ኦዳዲ፣ ሺን ኬሳናው ዳንዳይቤይኪኖ» ያጌዳ።

19 ዬሱሲ ዛሪዳ ኡንቲንታ፣ «አማኔና ሃ ዋዲያ አሳው! ታኒ ሂንቲንቲና አዉዳ ጋካናው ዳዓኔ? ቃሲ ሂንቲንቲባ አዉዳ ጋካናው ዳንዳያኔ? ናዓ ታኮ ሃ አኪ ዪቲ» ያጌዳ። 20 ኡንቲንቲ ናዓ አኮ አሄዲኖ፤ ሄ ኢታ አያናይ ዬሱሳ ቤዔዳ ማንዒያንካ ናዓ ኮኮርሲ አጌዳ፤ ናዓይ ሳዓን ኩንዲዳ፣ ደናና ሆሙ ጎፑ ጊሺን ጎንደራቲዳ። 21 ዬሱሲ ሄ ናዓ አዉዋ፣ «ሃዌ ኔ ናዓ ኦይቆዴፔ ዋይሳ ዋዴ ገዳኔ?» ያጌዳ ኦቹዳ።

ናዓ አቡ፣ «ኢ ናዓቲላን ዳዒያ ዋዲያፔ ደሜዳ። 22 አ ዋቆናው ዳሮ ዋዴ ታማኒኔ ሃላን ኦሌዳ፤ ሺን ኔኒ ዳንዳዮፔ፣ ኦሲ ቃሬታዴ ኦና ማዳሪኪ» ያጌዳ።

23 ዬሱሲ አ፣ «ኔኒ ዳንዳዮፔ ጋይ? አማኒያ አሳው ኡባባይ ዳንዳዮቲ» ያጌዳ።

24 ኤሌካ ናዓ አቡ ባሪ ኮሻ ቶቁ ኦሊዳ፣ «ታኒ አማናይ፤ ሺን ጉጃ አማናናዳን፣ ታና ማዳሪኪ» ያጌዳ።

25 ዬሱሲ አሳይ ዳሪ ዳሪ ቢያዋ ቤዒዳ፣ ኢታ አያና፣ «ናዓ ቱሌኔ ዲዳ ኡዳዳ አያናው፣ ሃ ናዓፔ ኬሳ ጋዴ ኔና ታ አዛዛይ፤ ቃሲ ዛሪላዳ አኒ ጌሎፓ» ያጌዳ።

26 ሄ ኢታ አያናይ ዋሲዳ፣ ናዓ ዳሪሲ ኮኮርሲዳ፣ አፔ ኬሴዳ። ናዓይ ሃይቆዳዋ ማላቲና፣ ዳሮ አሳይ፣ «ናዓይ ሃይቆዳ» ያጌዳ።

27 ሺን ዬሱሳ ናዓ ኩሺያ ኦይቂዳ ዴንሉና፣ ናዓይ ዴንዲ ኤቆዳ።

28 ዬሱሲ ሶይ ጌሌዳዋፔ ጉዪያን፣ አ ካሊያዋንቲ ዬሱሳ ዲማ፣ «ኦኒ ሄ ኢታ አያና ኬሳናው አዪሲ ዳንዳይቤይኮ?» ያጌዳ ኦቹዲኖ።

29 ዬሱሲ ዛሪዳ፣ «ሄዋ ማላይ ዋሳፔኔ ያማፔ አቲን፣ ሃራባን ኬሳናው ዳንዳዬና» ያጌዳ።

ዮሱሲ ባሪና ጋካና ሜቲዋባኔ ሃይቆዋባ ላዕንሉዋ ኦዴዳ (ማት 17:22-23፤ ሉቅ 9:43-45)

30 ኡንቲንቲ ሄዋፔ ዳንዲዳ፣ ጋሊላና አቋዴ ቤዲኖ፤ ዮሱሲ ባሪ ዳዒያሳ ኦኒኔ ኤራና ማላ ኮዪቤና። 31 አዪሲ ጎፔ፣ ኢ ባሪና ካሊያዋንታ «ታና፣ አሳ ናዓ፣ አሳይ አሳው አሊዳ አማናኔ ዋቆና፤ ታኒ ቃሲ ሄዙ ጋላሳፔ ጉዪያን፣ ሃይቆዋፔ ዳንዳና» ያጌዳ ታማሪሴ።

32 ሺን ኡንቱንቶ ኢ ጊያዌ ጌሊቤና፤ ቃሲ ኣ ኦቻናዉካ ያዩዲና።

ኡባፔ ኣዲያዌ ኦኔ?
(ማት 18:1-5፤ ሉቅ 9:46-48)

33 ኡንቱንቱ ቁፊሪናሆማ ጊያ ካታማ ቤዲኖ፤ ሶይ ጌሌዳዋፔ ጉዪያን፤ ዩሱሲ ኡንቱንታ፡ «ኦጊያን ኣያ ፓሉሜቲቲ?» ያጊዴ ኦቹዲ። 34 ሺን ኡንቱንቱ ቢዴ ኦጊያን፡ «ኦ ጊዲን ኦ ኡባፔ ኣዲያዌ ኦኔ?» ያጊዴ ፓሉሜቲዲ ዲራው፡ ጮቡ ጌዲና። 35 ዩሱሲ ኡቲዴ፡ ታማኔ ላዑ ባሬና ካሊያዋንታ ዪሲዴ ኡንቱንታ፡ «ኦኒኔ ሲንሳው ኣዳና ኮኖፔ፡ ኡባፔ ጉዬ ኣዲዴ፡ ሄ ኡባው ቆማ ጊዲናው ቤሴ» ያጊዴ።

36 ኢቲ ጉላ ናባ ኦይቂዴ፡ ኡንቱንቱ ጊዲን ኤሴዳ፤ ሄ ጉላ ናባ ኢዲሚዴ ኡንቱንታ፡ 37 «ሃዋንቱ ማላ ጉላ ናናፔ ኢቱዋ ታ ሱንላን ሞኪያ ኦኒኔ ታና ሞኬ፤ ቃሲ ታና ሞኪያ ኦኒኔ ታና ኪቲዳዋ ሞኪያዋፔ ኣቲን፡ ታ ዓላላ ሞኬና» ያጊዴ።

ዩሱሲ፡ «ኦባ ኤቁቴና ኡራይ ኦ ባጋ» ያጊዴ
(ሉቅ 9:49-50)

38 ዮሃንሲ ኣ፡ «ታማሪሲያዎ፡ ኢቲ ኣሳይ ኔ ሱንላን ኢታ ኣያናቱዋ ኬሲያዎ ኦኒ ቤዒዴ፡ ኦ ባጋ ጊዴና ዲራው፡ ኣ ዲጌዶ» ያጊዴ።

39 ሺን ዩሱሲ ያጊዴ፤ «ኦኒኔ ታ ሱንላን ማላታ ኦሲዴ፡ ኤሌካ ታ ቦላ ኢታባ ሃሳያናው ዲንዳዪያዌ ባዪና ዲራው ዲጎፒቲ፤ 40 ኣዪሲ ጎፔ፡ ኦባ ኤቁቴና ኡራይ ኦ ባጋ። 41 ታኒ ሂንቲንቶ ቱሙዋ ኦዳይ፤ ሂንቲ ታዋንታ ኪሪሰቶሳዋንታ ጊዲያ ዲራው፡ ኦኒኔ ሂንቲንቶ ታ ሱንላን ቡሊያ ሃላ ኡሻናው ኣሞፔካ፡ ባሬ ጋቲያ ኣካናዎ።

ናጋራ ጋሱዋ
(ማት 18:6-9፤ ሉቅ 17:1-2)

42 «ታና ኣማኒያ ሃ ጉላቱዋፔ ኢቱዋ ባሌሊያ ኦናኔ፡ ጋጨያ ዋጋ ዋፃ ኣ ቆዲያን ቃቹዴ፡ ኣባን ኣ ኦሊያዌ ኣው ሎዓ። 43-44 ኔ ኩሺ ኔና ባሌላፔ፡ ቃንፃ ኦላ፤ ኔኒ ላዑ ኩሺያና * ቃሲ ኡባካ ቶዔና ጋናሚያ ታማን ጌሊያዋፔ፡ ዲፃ ኩሺያና ዴዑዋ ጌሊያዌ ኔው ሎዓ። 45-46 ኔ ጌዲ ኔና ባሌላፔ፡ ቃንፃ ኦላ፤ ኔን ላዑ ጌዲያና ኡባካ ቶዔና ጋናሚያ ታማን ዩኔቲያዋፔ፡ ደማ ጊዲዴ

* 9:43-44 ሃራ ጌሻ ማፃፋ ቢሌላቲ፡ ጉዲኒ ሙሌ ሃይቁናሳኔ ቃሲ ሙሌካ ቶዔና ጋናሚያ ታማን፡ ያጌ። 9:45፡ 47 ያለቲ።

ደዑዎ ጌሊያዌ ኔው ሎዓ። 47-48 ኔ አይፊ ኔና ባሌላፕ፣ ዎጫ ኦላ፤ ኔኒ ላዑ አይፊናና ኡባካ ቶዔና ጋናሚያ ታማን ዩጌቲያዎፕ፣ ኢቲ አይፊናና ያሳ ካዉቲላ ጌሊያዌ ኔው ሎዓ።

49 «ቁማን ማዲያ ዩጌያዎዳን፣ ታማይ አሳ ኡባ ቦላ ዩጌታና። 50 ማዲያ ሎዓ፤ ሺን ኢ ማልዓና ቆዮፕ፣ ዛሪዳ አ ዎቲ ማልዔላኒቲ? ሂንቲንቲን ማዲያ ደዖ፤ † ያቲዳ ኢቲ ኢቲዎና ሳርቲላን ደዒቲ» ያጌዳ።

10

ማቻቶ ዩዳናው ቤሴና
(ማት 19:1-2፤ ሉቅ 16:18)

1 ዩሱሲ ሄዎፕ ዳንዲዳ፣ ዮርዳኖሳ ሻፋፕ ሄፊንላ ባጋና ዪሁዳ ጋዲያ ቤዳ። ጮራ አሳይ ሺሬቲዳ እኮ ሺቂና፣ ካሴ ኢ ኦሊያዎዳንካ ሄ አሳ ታማሪሱዎ ደሚዳ።

2 ኢቲ ኢቲ ፓሪሳዎቲ ፓጫናው ዩሱሳኮ ዩዳ፣ «ኢቲ አሳይ ባሬ ማቻቶ ዩዳናው ኑሲ ሂጊ አዛዚ?» ያጌዳ አ ኦቼዲኖ።

3 ኢ ዛሪዳ፣ «ሙሴ ሂንቲንታ ዋጊ አዛዜዳ?» ያጌዳ።

4 ኡንቲንቲ፣ «ሙሴ፣ <ኢቲ አሳይ ባሬ ማቻቶ ፓሪማ ኢሚዳ ዩዳ> ጌዳ» ያጌዲኖ።

5 ዩሱሲ ዛሪዳ ኡንቲንታ፣ «ሂንቲንቲ ኦዲና ሲሴናዎንታ ጊዲያ ዲራው፣ ሙሴ ሃ አዛዙዎ ሂንቲንቶ ፃፊዳ። 6 ሺን ያሳይ ኮይሮ ሜዲያ ዎዳ፣ አቲማ አሳኔ ማጫ አሳ ኦሊዳ፣ ኡንቲንታ ማዲዳ። 7 ሄዎ ዲራው፣ ኢቲ አሳይ ባሬ አባኔ ባሬ ዳዮ አጊዳ፣ ባሬ ማቻቲና ኢቲዎ ጊዳ፤ 8 ኡንቲንቲ ላዓቲ ኢቲ አሾ ጊዲኖ፤ ሄዎ ዲራው፣ ኡንቲንቲ ኢቲ አሳ ጊዲያዎፕ ኢቲን፣ ላዑ አሳ ጊዲኪኖ። 9 ሄዎ ዲራው፣ ያሳይ ኢቲፕ ጋሌዳዎ አሳይ ሻኮፕ» ያጌዳ።

10 ኡንቲንቲ ሶይ ሲሚዳ ዎዳ፣ ዩሱሳ ካሊያዎንቲ ሃ ዩዉዎባ ዩሱሳ ዛሪ ኦቼዲኖ። 11 ዩሱሲ ኡንቲንታ፣ «ባሬ ማቻቶ ዩዲዳ፣ ሃራሮ አኪያ ኡራይ ኦኒኔ ኢዚና ዎሹሜ። 12 ቃሲ ማጫዉናካ ባሬ አሲናፕ ኬሳዳ ሃራ አሲና ጌሎፕ ዎሹማው» ያጌዳ።

† 9:50 ሂንቲንቲን ማዲያ ደዖ፣ ሃዎ ጉሳይ ዩሱሳን አማኒያዎንቲ ባሬንቲ አማኑዎፕ ዳንዶ ጋሱዎን ኡንቲንቲ ቦላ ሜቲ ጋኪንቶካ ኢቲ ኢቲዎና ሳርቲላን ደዳናው ቤሴ።

10:4 ዛር 24:1-4፤ ማት 5:13 10:6 ዶዎ 1:27፤ 5:2 10:8 ዶዎ 2:24

ዬሱሲ ጉላ ናና አንጄዳ
(ማጥ 19:13-15፤ ሉቅ 18:15-17)

13 ዬሱሲ ጉላ ናና ቦቻና ማላ፡ ኢቲ ኢቲ አሳይ ናና አኮ አሄዳ፤ ሺን ዬሱሳ ካሊያዋንቱ ሄ አሳ ሴሬዲኖ። 14 ዬሱሲ ሄዋ ቤዒዳ፡ ባሬና ካሊያዋንታ ሃንቄቲዳ፤ ኢንቱንታ፡ «ጉላ ናናይ ታኮ ዪያዋንታ ዲጎፒቲ፤ እዪሲ ጎፔ፡ ያሳ ካወቲላይ ሃዋንቱ ማላሳ። 15 ታኒ ሂንቲንቶ ቱሙዋ ጋይ፤ ያሳ ካወቲላ ጉላ ናናዳን እኬና ኡራይ ኦኒኔ ሄ ካወቲላ ኡባካ ጌሌና» ያጌዳ። 16 ጉላ ናና ኢዲሚዳ፡ ባሬ ኩሺያ ኢንቱንቱ ቦላ ሁጲያን ሁጲያን ዋሊዳ፡ ኢንቱንታ አንጄዳ።

ሚሻ ሲቁሳይ አሂያ ሜቱዋ
(ማጥ 19:16-30፤ ሉቅ 18:18-30)

17 ዬሱሲ ባናው ኬሴዳ ዋዳ፡ ኢቲ ቢታኒ ዋዳዴ ዪ አ ሲንላን ጉልባቲዳ፡ «ሎ? ታማርሲያዎ፡ ሜዲና ዴቦዋ ላታናው ታኒ አያ ኦሎ?» ያጌዳ አ ኦቼዳ።

18 ዬሱሲ፡ «አዪሲ ታና ሎ? ጋይ? ያሳ ዓላላፔ አቲን፡ ሃራ ሎቡ ኦኒኔ ባዋ። 19 ያሳ አዛዙዋ፡ <ዋዲ፤ ዋሹዋ፤ ወደ፤ ዋርዲዋ ማርካቶ፤ ጨዋ፤ ኔ አባኔ ኔ ዳዮ ቦንቻ» ያጌያዋ ኤራሳ» ያጌዳ።

20 ቢታኒ ዬሱሳ፡ «ታማሪሲያዎ፡ ታኒ ሄዋ ኡባ ናናቲላፔ ዶማዴ ሃዒ ጋካናወካ ናጋይ» ያጌዳ።

21 ዬሱሲ ቢታኒያ ዶሴዳ፤ አ ጫዲ ያሊዳ፡ «ኔው ኢቲባይ ፓጩዳ፤ ባዴ ኔው ዴዲያባ ኡባ ዛልዳዳ፡ ሄ ሚሻ ሂዩሳው እማ፤ ኔን ሳሉዋን ዴሬታና። ያቶዋፔ ጉዪያን ያዴ ታና ካላ» ያጌዳ።

22 ሺን ቢታኒ ሄዋ ሲሲዳ፡ ኢ ዳር ዴሬ ገዲያ ዲራው፡ ባሬ ሶምዒያ ዲሚሲዳ፡ ናሹቲናን አገዴ ቤዳ።

23 ዬሱሲ ባሬና ካሊያዋንታ ዩሺ አሏ ያሊዳ፡ «ዳር ዴሬ አሳይ ያሳ ካወቲላ ጌላናው ዋኒ ሜታንዴሻ!» ያጌዳ።

24 አ ካሊያዋንቱ አ ሃሳያ ሲሲዳ ማላሌቲዲኖ፤ ሺን ዬሱሲ ቃሲካ ኢንቱንታ፡ «ናቶ፡ ያሳ ካወቲላ ጌላናው ዋቲ ሜታንዴሻ!»

* 25 ዴሬ አሳይ ያሳ ካወቲላ ጌላናዋ፤ ጋሉ ማርፒያ ያዲያና አቆናዌ ማታቲ» ያጌዳ።

26 ዬሱሳ ካሊያዋንቱ ማላሌቲዳ፡ «ያቲና፡ ኦኒ አታናው ዳንዳዪያዋ?» ያጌዳ ኢቲ ኢቲዋ ኦቼዲኖ።

10:19 ኬስ 20:12-16፤ ዛር 5:16-20 * **10:24** ዋቲ ሜታንዴሻ፡ ሃዋ ኢቲ ኢቲ ቢሉላይ ባሬው ዴዲያባን አማኔቲያ አሳ ያጌ።

27 ዩሱስ ኡንቴንታ ጫዲ ጭሊዳ፡ «ሃዌ ያሳው ዳንዳዬቲያዋፔ ኣቲን፡ ኣሳው ዳንዳዬቲና፤ ኣዩሲ ጎፔ፡ ያሳው ኡባባይካ ዳንዳዬቲ» ያጌዳ።

28 ጳዲሮሲ ዩሱሳ፡ «ቤዓ፤ ኮኒ ኩባ ኡባ ኣጊዳ፡ ኔና ካሌዶ» ያጌዳ።

29 ዩሱሲ፡ «ታኒ ሂንቴንቶ ቱሙዋ ጋይ፤ ታ ዲራዉኔ ዋንጋላ ሚሺራቹዋ ዲራው፡ ጎሊያ ዋይ ኢሻቱዋ ዋይ ሚቻቱዋ፡ ዋይ ኣዉዋ ዋይ ኣቶ ዋይ ማቻቶ፡ ዋይ ናና ዋይ ጋዲያ ኣጌዳ ኣሳይ ኦኒኔ፡ 30 ሃዒ ሃ ዋዲያን ጭቱ ዳኩዋፔ ዳሪያ ጎሌቱዋ፡ ኢሻቱዋ፡ ሚቻቱዋ፡ ኣቶ፡ ናና፡ ጋዲያ፡ ቃሲ ሜቱዋካ ኣካናዋ። ሲንሳፔ ያና ዋዲያንካ ሜዲና ዳዑዋ ኣካናዋ። 31 ሺን ጮራቱ ሃዒ ሲንሳን ዳዒያዋንቱ ጉዬ ኣቆና፤ ቃሲ ጮራቱ ሃዒ ጉዬን ዳዒያዋንቱ ሲንሳው ኣቆና» ያጌዳ።

**ዩሱሲ ባሬና ጋካና ሜቱዋባኔ ሃይቁዋባ ሄዜንሉዋ ኦዳዳ
(ማት 20:17-19፤ ሉቅ 18:31-34)**

32 ኡንቴንቱ ዩሩሳላሜ ቢዳ፡ ኦጊያን ዳዒኖ፤ ዩሱሲ ባሬና ካሊያዋንቱ ሲንሳና ሃሜቲ። ኡንቴንቱ ማላሌቲዲኖ፤ ኣ ካሊያዋንቱ ያዬዲኖ። ዛሪዳ ታማኔ ላዑ ባሬና ካሊያዋንታ ጋዩ ኬሲዳ፡ ባሬና ጋካናባ ዲማዪዳ ኡንቴንቱሲ ሃዋዳን ያጊዳ ኦዳዳ፤ 33 «ቤዒቲ፤ ኮኒ ዩሩሳላሜ ሃዒ ኬሶይቲ፤ ያኒ ታና፡ ኣሳ ናና፡ ቁሳቱዋ ካፓቱዋሲኔ ሙሴ ሂጊያ ታማርሲያዋንቱሲ ኣሊዳ ኢማና። ኡንቴንቱ ታ ቦላን ሃይቁዋ ፒርዳ ፒርዳና፤ ቃሲ ኣዩሁዳ ጊዳና ኣሳሲካ ታና ኣሊዳ ኢማና። 34 ሄ ኣዩሁዳ ጊዳና ኣሳይ ታ ቦላ ቁሊጫናኔ ጩቻና፤ ታና ሊሱዋን ሸጫናኔ ዋቆና፤ ታኒ ቃሲ ሄዙ ጋላሳፔ ጉዩያን፡ ሃይቁዋፔ ዳንዳና።»

**ያዩቆቢኔ ዮሃኒሲ ዋሴዳ ዋሳ
(ማት 20:20-28)**

35 ዛቢዲዮሳ ናናይ ያዩቆቢኔ ዮሃኒሲ ዩሱሳኩ ዩዳ፡ «ታማሪሲያዋ፡ ኮኒ ኔና ዋሲያባ ኡባባ ኮሲ ኦላሪኪ» ያጌዲኖ።

36 ዩሱሲ ኡንቴንታ፡ «ታኒ ሂንቴንቶ ኣያ ኦሎ?» ያጌዳ።

37 ኡንቴንቱ ኣ፡ «ኔ ቦንቾ ካዉቲላን ኔኒ ኡቲያ ዋዳ፡ ኦፔ ኢቱዋ ኔፔ ኡሼቻ ባጋና ቃሲ ኢቱዋ ሃዲርሳ ባጋና ኡቲሳሪኪ» ያጌዲኖ።

38 ሺን ዩሱሲ ኡንቴንታ፡ «ሂንቴንቱ ኣያ ዋሳናው ቤሲንቶካ ኤሪኪታ፤ ታኒ ኡሻናው ቤሲያ ሜቱዋ ፀዓ ኡሻናው ዳንዳዩቲ?»

ቃሲ ታኒ ፃማቄታናው ቤሲያ ዒንቃታ ተ ፃማቄታናው ዳንዳዪቴ?» ያጌዲ።

39 ሄዋፔ ጉዬ ኡንቱንቱ ዛሪዳ፥ «ኤ ዳንዳዪቶ» ያጌዲኖ።

ዬሱሲ ቃሲ፥ «ታኒ ኡሻናው ቤሲያ ሜቱዋ ፀ-ዓ ሂንቱ ኡሻና፤ ታኒ ፃማቄታናው ቤሲያ ዒንቃታካ ሂንቱ ፃማቄታና። 40 ሺን ታፔ ኡሼቻ ባጋናኔ ሃዲርሳ ባጋና ኡታናዋንታ ደሪያዌ ታና ጊዲኬ፤ ሺን ሄ ሳዓይ ያሳይ ኢማናው ገገሲ ዋሌዳዋንቱሳ» ያጌዲ።

41 ዮኮ ታው ዬሱሳ ካሊያዋንቱ ሄዋ ሲሴዳ ዋዳ፥ ያዩቆባኔ ዮሃንሳ ሃንቄቲዲኖ። 42 ዬሱሲ ኡንቱንታ ኡባ ባሬኮ ዌሲዳ፥ ሃዋዲን ያጌዲ፤ « ኣዪሁዳ ጊዳናዋንታ ሞዲያዋንታ) ጊዳ ቆፒያዋንቱኔ ሄዋንታ ካሌሊያ ኣሳቱ ባሬንቱ ኣሳ ሞዲያዋ ኤሪታ።

43 ሺን ሂንቱ ጊደን ሄዋ ማላ ጊዳና፤ ሂንቱ ጊደን ዋጋታና ኮዪያ ኦኒኔ ሂንቱንቶ ቆማ ጊዳናው ቤሴ። 44 ቃሲ ሂንቱ ጊደን ኡባፔ ቦላ ጊዳና ኮዪያ ኦኒኔ ሂንቱ ኡባው ኣዪሌ ጊዳናው ቤሴ። 45 ኣዪሲ ጎፔ፥ ሃራይ ኣቶ ታኒ፥ ኣሳ ናዓይካ፥ ኣሳው ኦላናውኔ ጮራቱዋ ዋዛናው ዬዳዋፔ ኣቲን፥ ኣሳይ ታው ኦላና ማላ ያቤይኬ» ያጌዲ።

ዬሱሲ ቆቃ ባርፃሞሳ ኣይፊያ ፓሌዳ

(ማጎ 20:29-34፤ ሉቅ 18:35-43)

46 ኡንቱንቱ ኢያርኮ ጊያ ካታማ ቤዲኖ፤ ዬሱሲ ባሬና ካሊያዋንቱናኔ ጮራ ኣሳና ኢያርኮፔ ኬሲሺን፥ ዒሞሳ ናዓይ ቆቃይ፥ ባርፃሞሳ ጊያዌ፥ ኦጊያ ደናን ዋሲዳ ኡቴዳ። 47 ባርፃሞሳ ናዚሬቲያ ዬሱሳ ጊዳዳዋ ሲሴዳ፥ ባሬ ኮሻ ቶቁ ኦሊዳ፥ «ዳዊቲ ናዓ ተ ዬሱሳ፥ ታና ማራሪኪ!» ያጉሳ ደሜዳ።

48 ጮራ ኣሳይ ኣ፥ «ሃይዛ!» ጊዳ ሃንቄቲዳ።

ሺን፥ ኢ ባሬ ኮሻ ካሴዋፔካ ዳሪሲ ቶቁ ኦሊዳ፥ «ዳዊቲ ናዓው፥ ታና ማራሪኪ!» ያጌዲ።

49 ዬሱሲ ኦጊያን ኤቂዳ፥ «ኣ ሃ ዌሲቲ» ያጌዲ።

ኡንቱንቱ ቆቃ፥ «ኣይኔ ባዋ፤ ዳንዳ ኤቃ፤ ኔና ዌሴ» ያጊዳ ዌሴዲኖ። 50 ቆቃይ ባሬ ማዩዋ ኦሊ ኣጊዳ፥ ጉፒ ዳንዲ ኤቂዳ፥ ዬሱሳኮ ቤዳ።

51 ዬሱሲ ኣ፥ «ታኒ ኔው ኣያ ኦላናው ኮያይ?» ያጌዲ።

ቆቃይ፥ «ታማሪሲያዎ፥ ታኒ ዌላናዋ ኮያይ» ያጌዲ።

† 10:38 ዒንቃታ፡ ሃዋ ጉሳይ ዬሱሳ ጋኬዳ ሜቱዋ ፀ-ዓ ጉሳ። † 10:47 ዳዊቲ ናዓ፡ ኣዪሁዳ ኣሳቱ ያሳን ኦኩቶዌ ዳዊቲ ዜሬላፔ ዬሌታናዋ ያጊዳ ቆፒያ ዲራው፡ ያሳን ኦኩቶዌ «ዳዊቲ ናዓ» ያጌቲ ዌሴቴ።

52 ዩሱሲ አ፡ «ባ፤ ኔ አማኑ ኔና ፓሌዳ» ያጌዳ። ኤሌካ አ አይፊ ያሊ አገና፡ ኦጊያን ዩሱሳ ካሊ አጌዳ።

11

ዩሱሲ ዋልቃማ ቦንቹዋን ዩሩሳሌም ጌሌዳ
(ማት 21:1-11፤ ሉቅ 19:28-40፤ ዮሀ 12:12-19)

1 ኡንቱንቱ ዩሩሳሌም ማቲዳ፡ ዳብሬ ዛይቲ ዳሪያ ማታን ዳዒያ ቤቴፋጌኔ ቢታኒያ ጋኬዲና፤ ዩሱሲ ባሬና ካሊያዋንቱፔ ላዑዋ ሲንሳው ከቲዳ፡ 2 «ሂንቱንቱ ሲንሳን ዳዒያ ሂራ ቤቲ፤ ያ ጌሎሳና ኦኒኔ ኡባ ቶጊቤና ቃሹዋን ዳዒያ ሃሬ ማራ ሂንቱ ዳማና፤ አ ቢሊ ሃ አኪዳ ዩቲ። 3 ኦኒኔ ሂንቱንታ፡ <ሃዋ አዩሲ ኦሊቲ?> ያጊዳ አቸፔ፡ ሳዳው * ሃዌ ኮሼ፤ ኤሌካ ዛሪ ሃ ዩዳናዋ) ያጊቲ» ያጌዳ።

4 ኡንቱንቱ ቢዳ፡ ሃሬ ማራ ፔንጊያ ማታን ኦጊያን ቃቺ ዋሌዳዋ ዳሚዳ ቢሌዲና። 5 ሄዋን ኤቄዳ ኢቲ ኢቲ አሳቱ ኡንቱንታ፡ «ሃሬ ማራ ዋታናው ቢሊቲ?» ያጌዲና። 6 ዩሱሳ ካሊያዋንቱ ዩሱሲ ባሬንታ አዘዘዳዋ ኦዲና፡ አሳቱ ዩዲ አጌዲና። 7 ኡንቱንቱ ሃሬ ማራ ዩሱሳኮ አሂዳ፡ ባሬንቱ ማዩዋ አ ዘኪያን ዋሌዲና፤ ዩሱሲ ሄ ሃሬ ማራ ቶጌዳ። 8 ጮራ አሳይ ባሬንቱ ማዩዋ ኦጊያን ሃዳዳ፤ ቃሲ ሃራንቱ ሚላ ሃይላ ካር ካሪዳ፡ ኦጊያን ሃዳዲና። 9 ዩሱሳፔ ሲንሳና ሃሜቲያ አሳይኔ አ ጌዲዋ ካሊያ አሳይ ባሬንቱ ኮሻ ቶቄ ኦሊዳ፡

«ዖሳይ ጋላቲቶ!

ጎዳ ሱንሳን ዩያዌ አንጄቲዳዋ።

10 ጎዳ ሱንሳን ዩያ ኑ አዉዋ
ዳዊቲ ካዉቴላይ አንጄቲዳዋ።
ሳሉዋ ኡባፔ ቦላ ሳሉዋን
ዳዒያ ዖሳይ ጋላቲቶ»
ያጌዲና።

11 ዩሱሲ ዩሩሳሌም ቢዳ፡ ጌሻ ጎሊያ ጌሌዳ፤ ቃሲ ኡባባ ዩዩ ዩዩ ያሌዳዋፔ ጉዩያን፡ ሳዓይ ቃሚያ ዲራው፡ ታማኔ ላዑ ዩሱሳ ካሊያዋንቱና ቢታኒያ ቤዳ።

ዩሱሲ ሽቄዳ ባላሲያ ሚላቶ
(ማት 21:18-19)

* 11:3 ጎዳ፡ ሃዋ ጉሳይ ሃሪያ ጎዳ። 11:9 ማዘ 118:25-26

12 ዋንቱላ ጋላሲ ኡንቱንቱ ቢታኒያፔ ኬሲዳ ቢሺን፣ ዩሱሲ ኮሻቱዳ። 13 ሃኩዋን ኢቲ ባላሲያ ጊያ ሚላቶ ሃይላ ማያ ኡቴዳወኖ ቤዒዳ፣ ኦኒ ኤሪ ኢ ቦላ ኣይፊ ቤቶፔኔ ጊዳ፣ ቤዓናው ኢዚኮ ቤዳ፤ ሺን ኢዚኮ ኢ ቢያ ዋዳ፣ ሃይላ ፃላላፔ ኣቲን፣ ኣይኔ ኣይፊያ ዳሚቤና፤ ኣዩሲ ጎፔ፣ ባላሲ ኣይፊያ ዋዲ ጋኪቤና። 14 ዩሱሲ ሄ ባላሳቶ፣ «ኔፔ ሺሬቲዳ ሜዲናው ኦኒኔ ኣይፊያ ዋፖ» ያጌዳ። ዩሱሳ ካሊያዋንቱ ኢ ጊያዋ ሲሴዲኖ።

ዩሱሲ ጌሻ ጎሊያን ዛሊዒያዋንታ ኬሴዳ
 (ማጥ 21:12-17፤ ሉቅ 19:45-48፤ ዮሀ 2:13-22)

15 ኡንቱንቱ ዩሩሳላሚ ቤዲኖ፤ ዩሱሲ ጌሻ ጎሊያ ጌሊዳ፣ ሄዋን ዛሊዒያዋንታኔ ሻሚያዋንታ ካሬ ዩዳርሱዋ ደሜዳ፤ ቃሲ ሚሻ ለሚያዋንቱ ፃራጴዛኔ ደጎሙዋ ዛሊዒያዋንቱ ኦይዲያ ኣሊ ዩጊዳ፣ 16 ኦኒኔ ኣዩንቶ ቶኪዳ፣ ጌሻ ጎሊያ ጊቢያ ጊደና ኣዳናዋ ዲጌዳ። 17 ዩሱሲ ኣሳ ሃዋዲን ያጊዳ ታማሪሴዳ፡ «ፆሳ ማፃፋን፣ ታ ጎሊ ኣዩሁዳ ጊዳና ኣሳይ ኡባይ ፆሳ ዋሲያ ጎሌ ጌቲታና» ያጌቲዳ ፃፊቲ ኡቴዳ፤ ሺን ሂንቲ ኣ ቦንቃንቻቱ ቆሴቲያ ጎንጎሉዋ ኬሴዲታ።»

18 ቄሳቲዋ ካፓቱኔ ሙሴ ሂጊያ ታማርሲያዋንቱ ሄዋ ሲሲዳ፣ ኣ ዋዳና ኦጊያ ኮሻ ደሜዲኖ፤ ሺን ጮራ ኣሳይ ኢ ታማሪሲያዋን ማላሌቲያ ዲራው፣ ኣው ያዩዲኖ።

19 ሳባይ ኦማርሴዳ ዋዳ፣ ዩሱሲኔ ኣ ካሊያዋንቱ ካታማፔ ጋፃ ኬሴዲኖ።

ባላሲያ ጊያ ሚላታ ሚላዲ
 (ማጥ 21:20-22)

20 ኡንቱንቱ ዋንቱላ ጋላሲ ጉራ ኦጊያና ኣዲዳ፣ ሄ ባላሳታ ፃጴዋና ሚላዲጌዳወኖ ቤዒዲኖ። 21 ጳይሮሲ ሃሳዩዳ፣ «ታማሪሲያዋ፣ ቤዓ፤ ኔን ሸቄዳ ባላሳታ ሚላዲጋዲ» ያጌዳ።

22 ዩሱሲ ዛሬዳ፣ ኡንቱንታ ሃዋዲን ያጌዳ፤ «ፆሳ ኣማኒቲ። 23 ታኒ ሂንቲንቶ ቱሙዋ ጋይ፤ ኦኒኔ ባሬ ዋዛናን ሲዲናን ባሬ ጌዳባይ ሃናናዋ ኣማኒዳ፣ ሃ ዳሪያ፣ ሩዳዳዳ ኣባን ኩንዳ) ጎፔ ሃናና። 24 ሄዋ ዲራው፣ ፆሳ ሂንቲ ዋሲያባኔ ኦቲያባ ኡባ ኣኪዲጎዋዲን ኣማኒቲ፤ ሂንቲ ኣካና። 25 ፆሳ ዋሳናው ሂንቲ ኤቂያ ዋዳ፣ ሳሉዋን ዳዒያ ሂንቲ ኣጫ ሂንቲ ናጋራ ኣቶ ጋና ማላ፣ ኦኒኔ ሂንቲንታ ናቄዳባይ ዳፆፔ፣ ኣው ኣቶ ጊቲ። 26 ሺን ኣሳ ናጋራ

11:17 ኢሳ 56:7፤ ኤርሞ 7:11

ሂንቲ አቶ ጋና ጳዮፔ፣ ሳሉዋን ዳዲያ ሂንቲ አጫካ ሂንቲ ናጋራ ሂንቲንቶ አቶ ጌና።»

ዩሱሲ አያ ማታኒ ኦሴ ጊያ ኦሻ
(ማጥ 21:23-27፤ ሉቅ 20:1-8)

27 ኡንቲንቲ ቃሲካ ዩሩሳሌም ቤዲኖ፤ ዩሱሲ ጌሻ ጎሊያን ሃማቲሺን፣ ቁሳቱዋ ካፓቱ፣ ሙሴ ሂጊያ ታማሪሲያዋንቲኔ ጨማቱ ዩሱሳኮ ዩዲኖ። 28 አ፣ «ኔኒ ሃዋ ኦሳናው ኔው አይ ማታይ ዳዲ? ዋይ ኔው ሃ ማታ ኢሜዳዌ ኦኔ?» ያጌዲኖ።

29 ዩሱሲ ዛሪዬ ኡንቲንታ፣ «ታኒካ ሂንቲንታ ኢቲባ ኦቻና፤ ታው ኦዲቲ፤ ታኒ ቃሲ ሃዋ አይ ማታን ኦሳይታንቶ፣ ሂንቲንቶ ኦዲና። 30 ዮሃኒሲ ፃማቂያ ማታ ኦኬዳዌ ያሳፔዬ ዋይ ኦሳፔ? ታው ኦዲቲ» ያጌዲኖ።

31 ኡንቲንቲ ባሪንቲ ጊደን ፓሉማ ደሚዳ፣ «ኦኒ፣ <ያሳፔ ዩዳ> ያጎፔ፣ ኢ ኦና፣ <ያቲና፣ ዮሃኒሲ ኦዳዳዋ ኦዲሲ ኦማኒቤይከቲ?> ያጋና። 32 ሺን፣ <ኦሳፔ ዩዳ ጋኔ?> » ያጌዲኖ፤ ቃሲ ኦሳይ ኡባይ ዮሃኒሲ ናቢያ ገዳዳዋ ኤሪያ ዲራው፣ ኦሳው ያዩዲኖ። 33 ሄዋ ዲራው፣ ኡንቲንቲ ዩሱሳው፣ «ኦኒ ኤርኮ» ያጊዳ ዛሪዲኖ፤

ዩሱሲ፣ «ታኒካ ሃዋ አይ ማታን ኦሳይታንቶ፣ ሂንቲንቶ ኦዲኬ» ያጌዲኖ።

12

ዋዪኒያ ቱራ ቶኪያ ኦሳንቻቱዋ ለሚሱዋ
(ማጥ 21:33-46፤ ሉቅ 20:9-19)

1 ዩሱሲ ኡንቲንቶ ኦዲዋ ለሚሱዋን ያጊዳ ደሚዳ፤ «ኢቲ ቢታኒ ዋዪኒያ ጊያ ቱራ ቶኪዳ፣ ዲርሳ ዩሺ ኦሴዳ ዲራዳ፤ ቃሲ ሄ ዋዪኒያ ጉሚዲያ ኦሳካ ቦኬዳ፤ ሄዋ ናጊያ ኦሳው ናጊያሳ ኬዳዳ፤ ሄዋፔ ጉዩያን፣ ኮሳ ኦሴያ ኦሳው ኢሚዳ፣ ሃራ ጋዴ ቤዳ።

2 ዋዪኒያ ኦይፊያ ማዲያ ዋዲ ጋኪና፣ ባሪና ጋኪያዋ ኦኪዳ ያና ማላ፣ ኢቲ ቆማ ባሪ ኮሳዋቱዋኮ ኪቲዳ። 3 ኮሳ ኦሴያዋንቲ ኦ ቆማ ኦይቂ ዋዲዳ፣ ኩሼ ሜላ ዩዳዲኖ። 4 ላዔሉዋ ሃራ ቆማ ኡንቲንቲኮ ኪቲዳ፤ ኡንቲንቲ ሄ ቆማ ሁጲያ ጳልቂዳ ፖኪሲ ዩዳዲኖ። 5 ዋዪኒያ ቱራ ጎዳይ ቃሲካ ሃራ ቆማ ኪቲዳ፤ ሄ ቆማ ዋዲዲኖ፤ ቃሲ ሃራ ጮራቱዋካ ሄዋዲን ኦሴዲኖ፤ ኢቲዋ ኢቲዋ ዋዲዳ፣ ሃራቱዋ ዋዲዲኖ።

12:1 ኢሳ 5:1-2

6 «ዎዲኒያ ቱራ ጎዳው ኪታናው ኡባፔ ወርሴላን ኢ ዳሪ ሰቋያ አ ናዓ ፃላላይ አቴዳ፤ ኢ፡ <ኡንቱንቱ ታ ናዓ ቦንቹናን ኣጊኪኖ> ጊዳ፡ ባሬ ናዓ ኡንቱንቱኮ ኪቴዳ።

7 «ሺን ኮላ ኦሴያዎንቱ ባሬንቱ ጊዳን፡ <ላታናዌ ሃዎ፤ ቢዳ አ ዎዲይቲ፤ አው ዴዒያዌ ኑዎ ጊዳና!> ያጌዲኖ። 8 ናዓ ኦይቂ ዎዲዳ፡ አ አጋ ዎዲኒያ ቱራ ጊዳፔ ጋፃ ኬሲ ኦሌዲኖ።

9 «ሲሚ ዎዲኒያ ቱራ ጎዳይ ዎታኔ? ዪዳ ሄ ኮላዎቱዎ ዎዲ ወርሲዳ፡ ዎዲኒያ ቱራ ኮላ ኦሴያ ሃራ አሳው ኢማናዎ።

10-11 ገምቢያዎንቱ ካዲ ኢዳዳ ሹቻይ

ጎዳ ፃጶዎ ሚኒሲያ፡ ኡባፔ አዲያ ሹቻ ጊዳዳ።

ሃዌ ጎዳይ ኦሴዳዎ፤ ቃሲ ኦናካ ማላሊሲያዎ) ያጊያዎ ያሳ ማፃፋፔ ናባቢቤይኪቲ?» ያጌዳ።

12 ቄሳቱዎ ካፓቱ፡ ሂጊያ ታማሪሲያዎንቱኔ ጨማቱ ዬሱሲ ሄ ለሚሱዎ ባሬንቱን ለሚሴዳዎ ኤሬዳ ዲራው፡ አ ኦይቃናው ኮዬዲኖ፤ ሺን አሳው ያዪዳ፡ ባሺ ቤዲኖ።

ጊራ ጊራኔ አጋኔ ጊያ ኦሻ (ማት 22:15-22፤ ሉቅ 20:20-26)

13 ቃሲ አ ሃሳያፔ ባላ ዳማና ማላ፡ ፓሪሳዎቱዎፔኔ ሄርዲሳ ባጋቱዎፔ * አማራዳዎንቱ አኮ ኪቲና ዪዳ፤ 14 «ታማሪሲያዎ፡ ኔኒ ቱሙዎ ሃሳዪያዎኔ አሳፔ አሳ ሻኬናዎ ኦኒ ኤሬቶ፤ አዪሲ ጎፔ፡ ኔኒ አሳ ዲማያካ፤ ቃሲ ያሳ ኦጊያ ቱማቱላን ታማሪሳ። ኦኒ ሮማ ካቲያ ቄሳሬው ጊራ ጊሪያዌ ዎጌዬ ዎጋ ጊዳኔ? ጊራ ጊራኔዬ ዲጋኔ?» ያጌዲኖ።

15 ሺን ኡንቱንቱ ሎዓ ማላቲያ ኢታ አሳ ጊዳዳዎ ዬሱሲ ኤሪዳ፡ «ታና አዪሲ ፓጩቲ? ኢቲ ሳንቲሚያ ሃ ታኮ አሂቲ፤ ታኒ አኔ ቤናና» ያጌዳ። 16 ኡንቱንቱ አው አሄዲኖ፤ «ሃ ማላይኔ ሱንሳይ ኦዌ?» ያጊዳ ኡንቱንታ ኦቹዳ።

ኡንቱንቱ፡ «ቄሳሬዎ» ያጌዲኖ።

17 ዬሱሲ ዛሬዳ ኡንቱንታ፡ «ያቶፔ፡ ቄሳሬዎ ቄሳሬሲ፡ ያሳዎ ያሳሲ ኢሚቲ» ያጊና ኡንቱንቱ አባ ማላሊቲዲኖ።

12:10-11 ማዘ 118:22-23 * 12:13 ሄርዲሳ ባጋቱዎ፡ ሃዎንታ ጉሳይ ሄዎዳ ዳዒያ ካወቱላ ፖሌቲካ ባጋና ካሴ ዎጋ ሄርዲሳኔ አ ናዓ ሄርድ አንቲጳሳ ባጋቱዎኔ ኡንቱንታ ካሊያ አሳቱዎ።

ሃይቁዋፔ ዴንዲዋ ኦሻ
(ማት 22:23-33፤ ሉቅ 20:27-40)

18 ሃይቁዳ አሳይ ዴንዴና ጊያ ሳዲቃዋናቱዋፔ ኢቲ ኢቲ አሳቱ ዩሱሳኮ ዩዴ፣ ሃዋዳን ያጊዴ፣ አ ኦቼዲና፤ 19 «ታማሪሲያዎ፣ ሙሴ ኑሲ ሂጊያ ፃፊዴ፣ ለማቻቶ አኩዳ አሳይ ናዓ ዩሌናን ሃይቆፔ፣ ሄ ሃይቁዳዋ አሻይ አ ማቻቶ ላቲዴ፣ ባሬ አሻው ናዓ ዩላናው ቤሴ) ያጊያዋ ፃፊዴ። 20 ኢቲ ዎዴ ላፑ አሻቱ ዴዒያዋንቱፔ ባይራይ ማቻቶ አኩዴ፣ ናዓ ዩሌናን ሃይቁዳ። 21 ላዔሊያ አሻይ ኢዞ አኩዳ፤ ኢካ ናዓ ዩሌናን ሃይቁዳ፤ ሄዜንሊያዊካ ሄዋዳን ሃኔዳ። 22 ላፑናቱካ ኢዞ አኩዴ፣ ናዓ ዩሌናን ሃይቁዲና፤ ኡባፔ ጉዩያን፣ ቃሲ ሄ ሚሺራታ ሃይቃዲ። 23 ያቲና፣ ሃይቁዳ አሳይ ሃይቁዋፔ ዴንዲያ ዎዴ፣ ኢዞ ኡንቱንቱፔ ሃቃዎ ማቼ ጊዳኔ? አዩሲ ጎፔ፣ ላፑናቱካ ኢዞ አኩዲና»።

24 ዩሱሲ ዛሬዴ ኡንቱንታ፣ «ሂንቱንቱ ባሌቲያዎ፣ ያሳ ማፃፋቱዎኔ አ ዎልቃ ኤሬና ዲራሳ! 25 አዩሲ ጎፔ፣ ሃይቁዳ አሳይ ሃይቁዋፔ ዴንዲያ ዎዴ፣ ሳሉዋን ዴዒያ ከታንቻቱዋ ማላ ጊዳናፔ አቲን፣ አቲማ አሳይኔ አኬና፤ ማጫ አሳይኔ ጌሌና። 26 ሺን ሃይቁዳዋንቱ ዴንዲዋባ ጊዳፔ፣ ሙሴ ማፃፋን ፃፊቲዳ ፃራጋይ ሚያ ቡራባ ኦዲያ ሳዓን፣ ያሳይ ሙሳ፣ ስታኒ አብራሃሜ ያሳ፣ ዩሳቃ ያሳ፣ ያዩቆባ ያሳ) ጊዲያዋ ኡባካ ናባቢቤይኪቲ? 27 ኢ ፓፃ ዴዒያዋንቱ ያሳ ጊዲያዋፔ አቲን፣ ሃይቁዳዋንቱ ያሳ ጊዴና፤ ሂንቱ ዳሪሲ ባሌዲታ» ያጌዳ።

ኡባፔ አዲያ አዛዙዋ
(ማት 22:34-40፤ ሉቅ 10:25-28)

28 ሂጊያ ታማሪሲያዋንቱፔ ኢቲ ኡንቱንቱ ፓሉሜቲያዋ ሺቂዴ ሲሴዳ፤ ቃሲ ዩሱሲ ኡንቱንቶ ሎዎ ዛሬዳዋ ሲሲዴ፣ «አዛዙዋ ኡባፔ አዲያ አዛዙ ሃቃዎ?» ያጊዴ ዩሱሳ ኦቼዳ።

29 ዩሱሲ ዛሬዴ፣ አ «አዛዙዋ ኡባፔ አዲያ አዛዙዋ፣ ሲሲራዔሊያ አሳይ ሲሲቲ፣ ጎዳይ ኑ ያሳይ ኢቲ ጎዳ። 30 ሂንቱንቱ ጎዳ ሂንቱ ያሳ ሂንቱ ኩሚንሳ ዎዛናፔ፣ ሂንቱ ኩሚንሳ ሺዎፑዋፔ፣ ሂንቱ ኩሚንሳ ቆፋፔ፣ ሂንቱ ኩሚንሳ ዎልቃፔ ሲቂቲ» ያጌ። 31 ቃሲ አዛዙዋ ኡባፔ አዲያ ላዔንላ አዛዙ ሃዋ፤ ስኒ ኔ ሸሩዋ ኔ ሁጲያዳን ሲቃ) ጊያዋ፤ ሃዋንቱፔ አዲያ ሃራ አዛዙ ባዋ» ያጌዳ።

12:19 ዛር 25:5 12:26 ኬስ 3:6 12:29 ዛር 6:4-5 12:31 ዎግ 19:18

32 ሂጊያ ታማሪሲያዊ ዩሱሳ ያጌዳ፤ «ታማሪሲያዎ፣ ቱሙዋ ጋዳ፤ ኔኒ <ፆሳይ ኢቲ ፆሳ ፃላላ። ኣፔ ኣቲን፣ ሃራይ ባዋ> ጌዳዊ ቱማ። 33 ፆሳ ኩሚንሳ ዋዛና፤ ኩሚንሳ ቆፋፔኔ ኩሚንሳ ዋልቃ፤ ደሲያዊኔ ቃሲ ባሬ ሸሩዋካ ባሬ ሁጲያዳን ሲቋያዊ፣ ጉዲያ ያርሹዋ፤ ሃራ ያርሹዋ ኡባ፤ ኣጼ» ያጌዳ።

34 ዩሱሲ ሂጊያ ታማሪሲያዊ ዛሩ ኣጼ ኤራንቻ ኣሳ ዛሩዋ ጊዳዳዋ ቤዒዳ፣ «ኔኒ ፆሳ ካዉቲላ፤ ሃካቤይካ» ያጌዳ፤ ሄዋ፤ ጉዲያን፣ ዩሱሳ ሃራባ ኣቻናው ኦኒኔ ፃሊቤና።

«ዩሱሲ ኦ ናዔ» ያጌያ ኦሻ
(ማት 22:41-46፤ ሉቅ 20:41-46)

35 ዩሱሲ ጌሻ ጎሊያን ታማሪሲዳ፣ «ሂጊያ ታማሪሲያዋንቲ ኪሪሰቶሳ ዋቲ ዳዊቲ ናዓ ጊና? 36 ዳዊቲ ባሬና ጌሻ ኣያናይ ሃሳዪሲና፣

ሳዳይ ታ ጎዳ፣ «ታኒ ኔ ሞርኬቱዋ ኔኒ ዩጳ ኤቋያባ ኣሳና ጋካናው፣ ሃዋን ታ፤ ቦንቹታዳ ኡሼቻ ባጋና ኡታ» ጌዳ፤ ያጌዳ። 37 ዳዊቲ ባሬ ሁጲው ኪሪሰቶሳ፣ «ሳዳ» ጊዳ ፃሪ፤ ያቲና፣ ኪሪሰቶሲ ዋኒዳ፣ ዳዊቲ ናዓ ጊዳ?» ያጌዳ። ጮራ ኣሳይ ዩሱሲ ጊያዋ ናሼቻን ሲሴዳ።

ዩሱሲ፣ «ሙሴ ሂጊያ ታማሪሲያዋንቲና ናጌቲቲ» ያጌዳ
(ማት 23:1-36፤ ሉቅ 20:45-47)

38 ዩሱሲ ታማሪሲዳ፣ «ሂጊያ ታማሪሲያዋንቲና ናጌቲቲ፤ ኡንቲንቲ ኣዲሳ ማዳዋ ማዲዳ ዩዪያዋኒ ጌያ ሄራንካ ኣሳይ ኡንቲንታ ቦንቹዳ ሳርቲያዋ ደሲና። 39 ኡንቲንቲ ኣዪሁዳ ዋሳ ጎሌቱዋን ዳሪ ሎዒያ ኦይዲያ ደሲና፤ ቃሲ ኣሳይ ባሬንታ ኣማላቲላን ሞኪያሳንካ ቦንቹ ሳዓ ደሲና። 40 ኡንቲንቲ ኣምዔቲ ጎሊያ ቦንቋዳ፣ ባሬንቶ ሎዓ ማላታናው ፆሳ ዋሳ ኣዲሲና፤ ኡንቲንቲ ኡባ፤ ኣጼያ ሙራ ኣካናዋንታ» ያጌዳ።

ኣምዓቲ ሚፀ-ዋታ
(ሉቅ 21:1-4)

41 ዩሱሲ ጌሻ ጎሊያን ኣምታ ዩጊያ ሳፀኒያ ማታን ኡቲዳ፣ ኣሳይ ባሬ ሚሻ ሄ ሳፀኒያን ዩጊያዋ ቤዒዳ፤ ጮራ ዲሬ ኣሳይ ዳር ሚሻ ሄ ሳፀኒያን ዩጌዲና። 42 ኢቲ ሂዬሳ ኣምዓታ ያዳ፣ ኢቲ ሳንቲሚያን ላሚቴያ ላዑ ሴምቤራቱዋ ሄ ሳፀኒያን ዩጋዲ።

43 ዬሱሲ ባሬና ካሊያዋንታ ያሲዳ፡ «ታኒ ሂንቴንቶ ቱሙዋ ጋይ፤ ኢሞታ ሳፀኒያን ዬጌዳ አሳ ኡባፔ ሃ ሂዬሳ ኣሞዓታ ዳሪሳዴ ዬጋዲ። 44 ኣዩሲ ጎፔ፡ ሃራቱ ኡባይ ባሬንቶ ፓላሄዳ ሚሻፔ ዬጌዲኖ፤ ሺን ኢዛ ባሬ ፓጫፔ፡ ባሬው ዳዒያ ዳዑዋ ሙሉካ ኢማ ኣጋዲ» ያጌዳ።

13

ዮሱሲ ጌሻ ጎሊ ኮሌታናዋ ካሴቲዳ ኦዳዳ
(ማት 24:1-2፤ ሉቅ 21:5-6)

1 ዮሱሲ ጌሻ ጎሊያፔ ኬሲሺን፡ ኣ ካሊያዋንቱፔ ኢቱ ኣ፡ «ታማሪሲያዎ፡ ሃዌ ኣይቤ ሎ? ሹቻቴንቶኔ ቃሲ ኣይቤ ሎ? ሹቻ ጎላቱዋ ቤዓይ!» ያጌዳ።

2 ዮሱሲ ዛሬዳ፡ «ሃ ዋልቃማ ሹቻ ጎላቱዋ ቤዓይ? ሃ ጎላቱዋን ዳዒያ ኢቲ ሹቻይኔ ኣቴናን ኡባይ ኮሌታና» ያጌዳ።

ጎዳይ ያናፔ ካሴቲዳ ጋካና ዬዳርሱዋኔ ዋዪያ
(ማት 24:3-14፤ ሉቅ 21:7-19)

3 ዮሱሲ ጌሻ ጎሊያፔ ሂኒ ባጋና ዳብሬ ዛይቲ ዳሪያ ቦላን ኡቲዳ ዋዴ፡ ጳዒርሲ፡ ያዪቆቤ፡ ዮሃኒሲኔ ኢንዲራሲ ባሬንቱ ያላላ ኣኮ ዪዴ ኣ፡ 4 «ሄዌ ኣዉዴ ሃናኔንቶ፡ ኩሲ ኦዳሪኪ፤ ቃሲ ሄዌ ኡባይ ፖሌታና ዋዲያ ኤሪሲያ ማላቱ ኣያ ጊዳኔ?» ያጌዳ ኦቹዲና።

5 ዮሱሲ ቃሲ ኡንቴንቶ ሃዋዳን ያጌዳ፡ ኦዲዋ ደሜዳ፤ «ሂንቴንታ ኣኒኔ ባሌጱና ማላ ናጌቲቲ። 6 ጮራ ኣሳቱ ታ ሱንላን፡ ታኒ ኪሪሰቶሳ» ያጌዳ ያናዋ፤ ጮራ ኣሳ ባሌላና። 7 ማታን ዳዒያ ኦላ ኮሻኔ ሃኩዋን ዳዒያ ኦላ ኦዲዋ ሂንቴ ሲሲያ ዋዴ፡ ሂርጎፔ፤ ሄዋ ማላባይ ሃናናው ቤሴ፤ ሺን ዉርሴላይ ቢራ። 8 ኣዩሲ ጎፔ፡ ኢቲ ጋዴ ኣሳይ ሃራ ጋዴ ኣሳና ኦሌታና፤ ቃሲ ኢቲ ካዉቴላይ ሃራ ካዉቴላና ኦሌታና፤ ቢታ ቃላይ ኡባሳን ዳዳና፤ ኮሻይካ ዳዳና፤ ሺን ሄዌ ኮይሮ ዬሉዋ ኦይላ ማላ።

9 «ሺን ሂንቴ ሂንቴንቱ ሁጳው ናጌቲቲ፤ ኣዩሲ ጎፔ፡ ኣሳይ ሂንቴንታ ኦይቂዳ፡ ፒርዳ ጎሌው ኣሊዳ ኢማና፤ ቃሲ ባሬ ኣዪሁዳ ዋሳ ጎሌቱዋኒካ ሂንቴንታ ሊሱዋን ሸጫና፤ ጋዲያ ሞዲያዋንቱ ሲንላኒኔ ካታቱዋ ሲንላን ታ ዲራው ሂንቴ ማርካታናው ኤቃና። 10 ሚሺራቹዋ ቃላይ ኮይሮና ኣሳው ኡባው ኦዲቲዲጋናው ቤሴ። 11 ኡንቴንቱ ሂንቴንታ ፒርዳ ጎሌ ኣሂያ ዋዴኔ ኣሊዳ ኢማያ ዋዴ፡ ዋቲ ሃሳያንቴንቶ ኮይሮና ሂርጎፔ፤ ሄ ሳቲያን ያሳይ

ሂንቴንቶ አሚያባ ሃሳዬቴ። አዩሲ ጎፔ፣ ጌሻ አያናይ ሃሳያናፔ አቴን፣ ሃሳዩያዋንቱ ሂንቴንታ ጊዲኪታ።

12 «ኢሻይ ባሬ ኢሻ፣ አዉ ባሬ ናባ ዎቋሳና፤ ቃሲ ናናይ ባሬንቱ አዎቱዎ ቦላኒኔ ባሬንቱ አዬቱዎ ቦላ ዴንዲዴ፣ ኡንቴንታ ዎቋሳና።

13 አሳይ ኡባይ ሂንቴንታ ታ ሱንሳ ዲራው ኢፃና፤ ሺን ዉርሴላይ ጋካናው ገንጨያዌ አታና።

ዩሩሳሌሜ ጋካና ዎልቃማ ኢታ ሜቱዎ

(ማት 24:15-28፤ ሉቅ 21:20-24)

14 «ሺን ናቢያ ዳኔል ኦዴዳ ባሻ ቱናቴላይ ኤቃናው ቤሴናሳን ኤቁሺን ሂንቴ ቤዒያ ዎዴ፣ ሄዌ ዋጊያዌንቶ፣ ናባቢያዌ አኬኮ፤ ዩሁዳ ጋዲያን ሄ ዎዴ ዴዒያዋንቱ ዴሪያኮ ቤቲኖ። 15 ጎሊያ ሁጲያን ዴዒያ ኡራይካ ኢቲባ አካናው ዲጌ ዎቋዴ፣ ባሬ ሶይ ጌሎፖ። 16 ጋዴን ዴዒያዌካ ባሬ ማዩዎ አካናው ጉዬ ሲሞፖ።

17 ሄ ዎዴ ሻሃራ ማጫዋንቶ ኑንሊያ ማጫዋንቶ አዬር። 18 ሺን ሃዌ ኡባይ ሃኒያ ዎዲ ባልጉዎ ጊዴና ማላ፣ ያሳ ዎሲቴ፤ 19 አዩሲ ጎፔ፣ ያሳይ ሳባ ኮይሮ ሜዴዳዎፔ ደሚዴ፣ ሃሩ ጋካናው፣ ኡባካ ዴዒቤና ሜቱ፣ ቃሲ ሃዎፔ ሲንላዉካ ኡባ ዴዒና ሜቱ አሳ ቦላ ሄ ዎዴ ዴዒና። 20 ጎዳይ ሄ ጋሳሳቱዎ ፓይዱዎ ጉሊያዌ ባዌንቶ፣ አሳ ጊዴዳ ኦኒኔ አቴና፤ ሺን ኢ ባሬ ዶሬዳ አሳቱዎ ዲራው፣ ሄ ጋሳሳቱዎ ፓይዱዎ ጉሊዳ።

21 «ሄ ዎዴ ኦኒኔ ሂንቴንታ፣ <ቤዒቴ፤ ኪሪሰቶሲ ሃዎን ዴዒ> ዎይ፣ <ቤዒቴ፤ ኪሪሰቶሲ ሃዎን ዴዒ> ያሳፔ፣ ሃዎ አማኖፒቴ።

22 አዩሲ ጎፔ፣ ዎርዳንቻ ኪሪሰቶሳቱኔ ዎርዶ ናባቱ ዴንዲዴ ባሬንቶ ዳንዳዬቶፔ፣ ሃራይ አቶ ያሳይ ዶሬዳዋንታካ ባሌላናው ማላታኔ ማላሊሲያባ ቤሳና። 23 ሺን ሂንቴ ናጌቲቴ፤ ታኒ ሂንቴንቶ ኡባባ ካሴታዴ ኦዳዲ።

ኪሪሰቶሳ ላዒንሎ ዩሳ

(ማት 24:29-31፤ ሉቅ 21:25-28)

24 «ሺን ሄ ዎዴ ሄ ዎዩያፔ ጉዩያን፣ አዎይ ቋማና፤

አጌናይ ፖዒያዎ አጋና፤

25 ያሊንታቱ ሳሉዋፔ ኩንዳና፤

ቃሲ ሳሉዋን ዴዒያ ዎልቃቱካ ቃዴታና።

13:14 ዳን 9:27፤ 11:31፤ 12:11 13:19 ዳን 12:1፤ ሳፅ 7:14 13:24
ኢሳ 13:10፤ ሂዝ 32:7፤ ኢዩ 2:10፣ 31፤ 3:15፤ ሳፅ 6:12 13:25 ኢሳ 34:4፤
ኢዩ 2:10፤ ሳፅ 6:13

26 ህ ዎዴ ታኒ፡ አሳ ናዓይ፡ ዎልቃማ ዎልቃናኔ ቦንቹዋና ሻሪያ ጊደና ዪሺን፡ ኡንቱንቱ ቤዓና። 27 ህ ዎዴ ታኒ ኪታንቻቱዎ ሳዓ ኦይዲ ባጋ ኪታና፤ ሳዓ ጋፃፔ ሳሉዎ ጋፃ ጋካናው፡ ያሳይ ደሬዳ አሳ ሺሻና።

ዎዲያ ዉርሱላይ ጋኬዳዎ ማላታ ቤሲያ ባላሲያ ሚላቶ (ማት 24:32-35፤ ሉቅ 21:29-33)

28 «ለሚሱዎ ባላሳቶ ጊያ ሚላቲፔ ታማሪቲ፤ ባላሳታ አጨያ ዎዴኔ ኢዚ ሃይላይ ሃይቲያ ዎዴ፡ ቦኒ ማቴዳዎ ሂንቲ ኤሪታ። 29 ሃዎዳንካ ሂንቲ ህ ኡባባይ ሃኒያዎ ቤዲያ ዎዴ፡ ኢ * ማታቲዬ ፔንጊያ ሸቄዳዎ ተ ኤሪቲ። 30 ታኒ ሂንቲንቶ ቱሙዎ ኦዲይ፤ ሃ ኡባባይ ሃናና ጋካናው፡ ሃ ዎዲያ ዬሌታይ ሃይቄዲጌና። 31 ሳሉኔ ሳዓይ አዳና፤ ሺን ታ ቃላይ ኡባካ አዴና።

ዉርሱላ ጋላሳኔ ሳቲያ ኦኒኔ ኤሬና (ማት 24:36-44)

32 «ሺን ህ ጋላሳኔ ህ ሳቲያ አዉዎ ፃላላፔ አቲን፡ ሃራይ አቶ ሳሉዎን ዴዲያ ኪታንቻቱዎ ጊዲና፡ ዎይ ታና ናዓ ጊዲናካ ኦኒኔ ኤሪያባይ ባዎ። 33 ህ ዎዲ አዉዴ ጊዳኔንቶ፡ ሂንቲ ኤሬና ዲራው፡ ናጌቲቲ፤ ሚኒቲ፤ ያሳ ዎሲቲ። 34 ታ ዩሳይ ባሬ ጎሊያ አጊዴ፡ ኦጊያ ቢያ ቢታኒያ ማላ፤ ቢታኒ ባሬ ቆማቱዎሲ ሁጲያን ሁጲያን ኦሱዎ አሚዴ፡ ኡንቱንታ ባሬ ኦሱዎሲ ካፖ ኦሌዳ፤ ቃሲ ካሪያ ናጊያዎካ ሚኒሲዴ ናጋና ማላ አዛዜዳ።

35 «ሃዎ ዲራው፡ ሚኒቲ፤ አዪሲ ጎፔ፡ ጎሊያዉ አማርሳ ጊዲና፡ ዎይ ቃማ ቢላህ ጊዲና፡ ዎይ ኩቱ ዎሲያ ዎዴ ጊዲና፡ ዎይ ጉራ ዎንቱማላና ጊዲና አዉዴ ያኔንቶ፡ ሂንቲ ኤሪኪታ። 36 ሂንቲንቱ አኬኬናን ኢ ዮፔ፡ ሂንቲንታ ጌሚዲሸዳዎንታ ዴሚና ማላ ሚኒቲ። 37 ታኒ ሂንቲንቶ ኦዲያዎ አሳ ኡባው ኦዲይ፤ ሚኒቲ።»

14

ኪሪሰቶሳ ቦላ ማቄቲዲኖ (ማት 26:1-5፤ ሉቅ 22:1-2፤ ዮሀ 11:45-53)

1 ፓሲጋ ባላ ጊያዎ ቦንቹያ ጋላሳይኔ ጫሊቤና ኡኪላ ሙሳ ቦንቹያ ባላ ጋላሳይ ጋካናው ላዑ ጋላሳይ አቴዳ፤ ቄሳቱዎ ካፓቲኔ

13:26 ዳን 7:13፤ ሳፀ 1:7 * 13:29 ኢ፡ ዬሱሳ ጉሳ። † 13:29 ማቲዬ ፔንጊያ ሸቄዳዎ፡ ጉሳይ፡ ዬሱሳ ዩሳይ ማቴዳ ጉሳ።

ሂጊያ ታማርሲያዋንቱ አሳይ ኤሬናን ዬሱሳ ኦይቂዴ ዋጳና ኦጊያ ኮዪኖ። 2 «አሳይ ዋላሳ ከሴና ማላ፣ ፓሲጋ ቦንቺያ ጋላሲ ሄዋ ኦሎኮ» ያጌዲኖ።

ዬሱሳ ሸቱዋ ኦኬዳ ሚሺራቶ
(ማጥ 26:6-13፤ ዮሀ 12:1-8)

3 ዬሱሲ ቢታኒያ ጋዲያን ኦሎዋ ሃርጊያ ሲሞና ሶዪን ቁማ ማናው ኡቲዳ ዎዴ፣ ኢቲ ሚሺራታ ቢልቃሲያ ኩሜዳ ናርደሳ ጊያ ዳሪ ኣልዎ ሸቱዋ * አካዴ ያዲ፤ ሄ ቢልቃሲያ ሚንጻዴ ሸቱዋ ዬሱሳ ሁጲያን ቲጋዲ። 4-5 ሄዋን ዴዲያ አሳፔ ኢቲ ኢቲ ሃንቂቲዴ፣ «ሃ ሸቱዋ ጮ ኣያው ባዪዛይ? ሃ ሸቱዋ ሄዙ ጻቲ ቢራ ሳንቲሚያን † ዛለዲዴ፣ ሚሻ ሂዬሳው ኢማናው ዳንዳዬቲ» ያጊዴ ባሬንቲ ጊደን ሃሳዪኖ፤ ያቲዴ ሄ ሚሺራቶ ዳሪሲ ሃንቂቲዲኖ።

6 ሺን ዬሱሲ ሃዋዳን ያጌዳ፤ «ሃ ሚሺራቶ ኣይኔ ጎፒቲ፤ ኢዞ ኣዪሲ ሚቶሊቲ? ኢዞ ታው ሎዎባ አሳዲ። 7 ሂዬሳቲ ኡባ ዎዴ ሂንቲንቲና ዴዲኖ፤ ሂንቲ ኮዬዳ ዎዴ ኣዉዴኔ ኡንቲንታ ማዳናው ዳንዳዪታ፤ ሺን ታኒ ኡባ ዎዴ ሂንቲንቲና ዴዲኬ። 8 ኢዞ ባሬው ደንዳዬቲዳዎ አሳዲ፤ ቃሲ ታ አሳቲሳይ ሞጌታናፔ ካሴታዴ ሞጎ ጊሲሳናው ሸቱዋ ኦካዲ። 9 ታኒ ሂንቲንቶ ቱሙዋ ኦዲይ፤ ሳዓ ኡባን ዎንጋላ ሚሺራቸዋ ኦዲያሳን ሃቃኒኔካ፣ አሳይ ኢዞ ቆፓና ማላ፣ ሃ ኢዞ ኦሎዳዌ ኦዴታና» ያጌዳ።

ዪሁዳ አሰቆሮቲ ዬሱሳ አሊዴ ኢማናው ዞሬታ ኤኖ ጌዳ
(ማጥ 26:14-16፤ ሉቅ 22:3-6)

10 ታማኔ ላዐ ዬሱሳ ካሊያዋንቲፔ ኢቲ ዪሁዳ አሰቆሮቲ † ጊያዌ፣ ዬሱሳ ቄሳቲዋ ካፓቲዎሲ አሊዴ ኢማናው ኡንቲንቲኮ ቤዳ። 11 ኡንቲንቲ ሄዋ ሲሴዳ ዎዴ ናሽቲዴ፣ «ኮኒ ኔው ሚሻ ኢማና» ያጌዲኖ፤ ዪሁዳ አሰቆሮቲ ዬሱሳ አሊዴ ኢማናው ኢንጃቲያ ዎዲያ ዎቸ።

ዬሱሲ ባሬና ካሊያዋንቲና ፓሲጋ ቁማ ሜዳ
(ማጥ 26:17-25፤ ሉቅ 22:7-14፣ 21-23፤ ዮሀ 13:21-30)

14:1 ከሰ 12:1-27 * 14:3 ዳሪ ኣልዎ ሸቱዋ፣ ጉሳይ ሎይሊ ሳዊያዎ ጉሳ።
† 14:4-5 ቢራ ሳንቲሚያ፣ 6:37 ጻሊቲ። 14:7 ዛር 15:11 † 14:10 ዪሁዳ አሰቆሮቲ፣ 3:19 ጻሊቲ።

12 ጫሊቤና ኡኪላ ሚያ ባላ ጋላሳ ቦንቺያ ኮይሮ ጋላሲ፡ ፓሲጋ ቁማ ማናው ደርሳ ሹኪያ ዎዴ፡ ዩሱሳ ካሊያዋንቱ ኣ፡ «ፓሲጋ ቦንቺያ ጋላሲ ኔኒ ማና ቁማ ኮኒ ሃቃ ቢዴ ገሊሳኔ?» ያጊዴ ኦቹዲኖ።

13 ዩሱሲ ባሬና ካሊያዋንቱ፤ ላዓቱዋ ሃዋዲን ያጊዴ ኪቲዳ፤ «ካታማ ቢቲ፤ ሂንቲ ቢሺን፤ ኦቹዋን ሃላ ቶኬዳ ኢቲ ቢታኒ ሂንቲንቱና ጋኬታናዎ፤ ኣ ካሊቲ። 14 ኢ ቢዴ ጌሊያ ጎሊያዉዎ፡ ታማሪሲያዌ ኔና፡ «ታኒ ታና ካሊያዋንቱና ፓሲጋ ቁማ ማናው ታ ኣማላ ኪፊሊ ሃቃኔ?» ያጌ፡ ያጊቲ። 15 ጎሊያዉ ሂንቲንታ ፖቂያ ቦላን ዴዒያ ገሊ ኡቲዳ ኣኮ ኪፊሊያ ቤሳና፤ ሄዋን ኮሲ ገሊሲቲ» ያጌዳ።

16 ሄ ላዑ ዩሱሳ ካሊያዋንቱ ኬሲዴ፡ ካታማ ቤዲኖ፤ ዩሱሲ ባሬንቶ ኦዴዳዋዲንካ ኡባባ ዴሚዴ፡ ፓሲጋ ቁማ ገግሴዲኖ።

17 ሳዓይ ኦማርሲያ ዎዴ ዩሱሲ ታማኔ ላዑ ባሬና ካሊያዋንቱና ያ ቤዳ። 18 ኡንቲንቲ ኡቲዴ ሳምፓፔ ቁማ ሚሺን፡ ዩሱሲ ኡንቲንታ፡ «ታኒ ሂንቲንቶ ቱሙዋ ኦዳይ፤ ሂንቲንቲፔ ኢቲ ታናና ሚያዌ፡ ታና ኣሊዴ ኢማናዋ» ያጌዳ።

19 ኣ ካሊያዋንቱ ሎይሊ ሲሴቲና፡ ሁጲያን ሁጲያን ኣ፡ «ቱሙ ታኔሻ?» ጊያዋ ደሚዲኖ።

20 ዩሱሲ ዛሬዳ፡ «ኢ ሃ ሂንቲንቲ ታማኔ ላዓቱዋፔ ኢቲዎ፤ ኢ ታናና ኢቲፔ ቱሻናው ባሬ ዳቡዋ ሻታን ዩዲያዎ። 21 ታኒ፡ ኣሳ ናዓይ፡ ያሳ ማፃፋይ ሃይቃና ጌዳዋዲን ሃይቃና፤ ሺን ታና፡ ኣሳ ናዓ፡ ኣሊዴ ኢሚያ ኡራው ኣዩሮ፤ ሄ ኡራይ ዩሌቲናን ኣቲዴንቶ፡ ኣው ሎዓ ሺን» ያጌዳ።

ጎዳ ካዉዋ ኣኪያ ዎጋ

(ማት 26:26-30፤ ሉቅ 22:14-20፤ 1ቆር 11:23-25)

22 ኡንቲንቲ ሚሺን፡ ዩሱሲ ዳቡዋ ኣኪዴ፡ ያሳ ጋላቲዳ፤ ሄ ዳቡዋ ሚንሊዴ፡ ባሬና ካሊያዋንቶ ኢሚዴ፡ «ሄይቲ፤ ሃዌ ታ ኣሹዋ» ያጌዳ።

23 ፀዓ ኣኪዴ፡ ያሳ ጋላቲዴ፡ ኡንቲንቶ ኢሚዳ፤ ኡባይ ሄ ፀዓፔ ኡሹዲኖ። 24 ዩሱሲ፡ «ሃዌ ኦራላ ጫቁዋን § ጮራ ኣሳ ዲራው ጉኪያ ታ ሱላ። 25 ታኒ ሂንቲንቶ ቱሙዋ ኦዳይ፤ ታኒ ያሳ

14:18 ማዘ 41:9 § 14:24 ኦራላ ጫቁዋ፡ ያሳይ ባሬ ኣሳሲ ዩሱሳ ሃይቁዋ ባጋና ቃላ ጌሊዳ ኦራላ ቃላ ጫቁዋ፡ ሄዌካ ኣ ጋኪያ ፀዓ፡ ኢ ባሬ ሱላ ጉሲዴ ኣሊ ኢሚዳ ኣ ደዑዎ፡ ሄዌካ፡ ኦ ኤጫ ኣሳቲላይ ኡባይ ላሚቲና፡ ኦራዒዳ ያሳ ሂጊ ኦ ዎዛናጊ ፃፊቲዳዋ ኦዴ። 14:24 ኬስ 24:8፤ ኤርሞ 31:31-34

ካውቴላን ኦራላ ዋዪኒያ ኤሳ ኡሻና ጋላሳይ ጋካናው፡ ላዕንሉቶ ሃ ዋዪኒያ ኤሳ ኡባካ ኡሺኬ» ያጌዳ።

26 ማዚሙሪያ ዩዌዳዋፕ ጉዩያን፡ ዳብሬ ዛይቲ ዳሪያ ቤዲኖ።

ጳጳሮሲ ካዳናዋ ዩሱሲ ካሴቲዳ ኦዳዳ

(ማት 26:31-35፤ ሉቅ 22:31-34፤ ዮሀ 13:36-38)

27 ዩሱሲ ባሬና ካሊያዋንቶ፡ «ሂንቴንቴ ኡባይ ታና ዩጊዴ ዋፃኒታ፤ እዩሲ ጎፔ፡ ያሳ ማፃፋይ፡

፡ያሳይ ደርሳ ሄሚያዋ ዋቋና፤

ሄዋፕ ጉዩያን ደርሳይ ኡባይ ላሌታና ጌ

ያጌዳ። 28 ሺን ታኒ ሃይቁዋፕ ዳንዳዳዋፕ ጉዩያን፡ ሂንቴንቴፕ ካሴታይ ጋሊላ ባና» ያጌዳ።

29 ጳጳሮሲ ዛሪዳ፡ «ኡንቴንቴ ኡባቲ ኔና ዩጊዴ ቦፔካ፡ ታኒ ኔና ሙሌካ ዩጊኬ» ያጌዳ።

30 ዩሱሲ ጳጳሮሳ፡ «ታኒ ኔው ቱሙዋ ኦዳይ፤ ሃቺ ቃማ ኩቱ ላዔሉቶ ዋሳናፕ ካሴ፡ ኔን ታና ሄዙ ጌዴ ካዳናሳ» ያጌዳ።

31 ሺን ጳጳሮሲ ካሴዋፕካ ሚኒሲዳ፡ «ታኒ ሃሪይ ኣቶ፡ ኔናና ኢቲፕ ሃይቁንቶካ፡ ኔና ሙሌካ ካዲኬ» ያጌዳ። ቃሲ ሃሪቱ ኡባቲካ ሄዋዳን ጌዲኖ።

ዩሱሲ ጌቴሴማኒያን ዋሴዳ

(ማት 26:36-46፤ ሉቅ 22:39-46)

32 ጌቴሴማኔ ጊያ ሳዓ ቤዲኖ፤ ዩሱሲ ባሬና ካሊያዋንታ «ታኒ ያሳ ዋሳናሲ፡ ሂንቴንቴ ሃዋን ኡቲሺቲ» ያጌዳ።

33 ዩሱሲ ጳጳሮሳ፡ ያዩቆባኔ ዮሃኒሳ ባሬናና ኣፌዳ፤ ዳሪ ካዮቲዳኔ ሜቶቲዳ። 34 ቃሲ ኡንቴንታ፡ «ታኒ ሃይቃና ጋካናዉካ ካዮታይ፤ ሃዋን ታኪሺቲ፤ ጌሚዒሾፕፕቲ» ያጌዳ።

35 ጉላ ሲንሳኮ ሸቂዳ፡ ሳዓን ጉፋኒዳ፡ ዳንዳዩቲያዋ ጊደፔ፡ ሄ ዋዲ ባሬፕ ኣቋና ማላ፡ ያሳ ዋሴዳ። 36 ቃሲካ፡ «ኣባቦ፡ * ታ ኣቦ፡ ኡባባይ ኔው ዳንዳዩቲ፤ ሃ ፀዓ ታፕ ዲጋ፤ ሺን ኔ ሸኒያዳን ሃኖፕ ኣቲን፡ ታ ሸኒያዳን ሃኖፕ» ያጌዳ።

37 ዩሱሲ ባሬና ካሊያዋንቴኮ ሲሚ ዩዳ፡ ጌሚዒሾዳዋንታ ዳሚዴ ጳጳሮሳ፡ «ሲሞና፡ ጌሚዒሻዲ? ኔን ኢቲ ሳቲንቶኔ ናጋናው ዳንዳያቤይኪ? 38 ፓጩያን ሂንቴ ጌሌና ማላ፡ ናጌቲቲኔ ያሳ ዋሴቲ፤ ኣያናይ ጊጊ ኡቲዳ፤ ሺን ኣሹ ዳቡራንቻ» ያጌዳ።

14:27 ዛክ 13:7 * 14:36 ኣባ፡ ጉሳይ ግሪኬ ቃላንካ «ኣባ» ጊዲያ ዋዳ፡ ኣራማዪኬ ቃላኒ «ኣባ» ጊያዋ።

39 ቃሲካ ቢዳ ካሴዋዳንካ ያሳ ዋሴዳ። 40 አ ካሊያዋንቱኮ ጉዬ ሲሚዳ ኢ ዪያ ዋዳ፣ ገሚዲሼዳዋንታ ዳሜዳ፤ ኢንቱንቱ አይፊያ ገሚዲሹ ጎዚ ዋሌዳ ዲራው፣ አው አያ ሃሳዪኖንቶካ ኤሪቤይኪኖ።

41 ሄዜንሉዋ ኢንቱንቱኮ ዪዳ፣ «ሃዲ ጋካናወካ ገሚዲሼቲኔ ሸምፕቲ? ገዳና፤ ዋዲ ጋኬዳ፤ ቤዲቲ፣ ታና፣ አሳ ናዓ፣ ናጋራንቻ አሳቱዋ ኩሺያን አሊዳ ኢሚያ ዋዲ ጋኬዳ። 42 ዳንዲና ቦይቲ፤ ቤዲቲ፣ ታና አሊዳ ኢሚያዌ ሃዌኩ ጋኬዳ» ያገዳ።

ዩሱሲ ባሬ ዋርኬቱዋ ኩሺያን ኦይቄቲዳ
(ማት 26:47-56፤ ሉቅ 22:47-53፤ ዮሀ 18:3-12)

43 ዩሱሲ ሄዋ ቢሮ ሃሳዪሺን፣ ታማኔ ላዑ አ ካሊያዋንቱፔ ኢቲ፣ ዪሁዳ አስቆርቲ፣ ኤሌካ ጋኪ ዋዴዳ፤ ቃሲ ቄሳቱዋ ካፓቱ ሂጊያ ታማሪሲያዋንቱኔ ጨማቱ ከቲና፣ ማሻኔ ፃምዓ ኦይቄዳ ጮራ አሳይ አናና ኢቲፔ ዩዳ። 44 ዩሱሳ አሊ ኢሚያዌ ሄ ጮራ አሳው፣ «ታኒ ዩሪያዌ አ፤ አ ኦይቄዳ ሎይሊ ናገዳ፣ አፊቲ» ያገዳ ማላ ኦዲ ዋሌዳ።

45 ዪሁዳ አስቆርቲ ታኮሳናካ ዩሱሳኮ ሸቄዳ፣ «ታማሪሲያዋ» ያገዳ ዩሱሳ ዩሪ አኬዳ። 46 ሄ ጮራ አሳይ ዩሱሳ ሚኒሲ ኦይቄዳ። 47 ሺን ማታን ኤቄዳዋንቱፔ ኢቲ ባሬ ጨቢያ ሾዲኔ ቄሳቱዋ ኡባቱዋ ካፑዋ ቆማ ሾጨዳ፣ አ ሃይላ ቃንዲ ኦሌዳ።

48 ዩሱሲ ዛሪዳ፣ ሄ ሸቄዳ ጮራ አሳ፣ «ታና ቦንቃንቻ ኬሲዳ፣ ቦንቃንቻ ኦይቄያዋዳን ኦይቃናው ጨቢያኔ ፃምዓ ኦይቄዳ ዩዲቲ? 49 ታኒ ጌሻ ጎሊያን ታማሪሳዳ፣ ጋላሳን ጋላሳን ሂንቱንቱና ዳዒያ ዋዳ ታና ኦይቄቤይኪታ፤ ሺን ያሳ ማፃፋቱ ገዳዌ ፖሌታናው ቤሴ» ያገዳ።

50 ዩሱሳ ካሊያዋንቱ ኡባቲ አ ዩገዳ ቢ አገዲኖ።

51 ናፃላ ፃላላ ማዬዳ ኢቲ ያላጋ ቢታኒ ዩሱሳ ካሊያዋ አሳይ ኦይቄዳ። 52 ሺን ሄ ቢታኒ ናፃላ ኦሊዳ፣ ካሎ ዲራ ዋዳዳ።

ዩሱሳ ፐርዲያ ሻንጋቱዋኮ አፊዲኖ
(ማት 26:57-68፤ ሉቅ 22:54-55፣ 63-71፤ ዮሀ 18:13-14፣ 19-24)

53 አሳይ ዩሱሳ ቄሳቱዋ ኡባቱዋ ካፑዋ ሶይ፣ ቄሳቱዋ ካፓቱዋ ኡባቲ፣ ጨማቲኔ ሂጊያ ታማሪሲያዋንቱ ሸቄዳሳ አፊዲኖ። 54 ጴጋርሲ ቄሳቱዋ ኡባቱዋ ካፑዋ ዲርሳ ገዲዋ ጋካናሲ ሃኩዋን አ ካሌዳ፤ ያኒ ናገያዋና ታማ ካሺዳ፣ ኡቲ አገዳ።

55 ቁሳቱዋ ካፓቱኔ ህዋን ሸቁዳ አሳይ ኡባይ ዩሱሳ ዎጳናው አ ቦላ ማርካ ኮዬዲኖ፤ ሺን አይኔ ዳሚቤይኪኖ። 56 አዩሲ ጎፔ፣ ጮራ አሳቱ አ ቦላን ዎርዲዎ ማርካቲዲኖ፤ ሺን ኡንቱንቱ ማርካቲላይ ኢቲ ማላ ጊደና።

57-58 ኢቲ ኢቲ አሳቱ ዳንዲ ኤቂዳ ዩሱሳ ቦላ፡ «ኢ፡ ሩታኒ አሳይ ኬጃዳ ሃ ጌሻ ጎሊያ ኮላዳ፡ አሳይ ኬጂቤና ሃራ ጌሻ ጎሊያ ሄዙ ጋላሳ ጊደን ኬፃና፣ ጊሺን፡ ኩኒ ሲሴዶ» ያጊዴ ዎርዲዎ ማርካቲዲኖ። 59 ሺን ሃራይ አቶ ኡንቱንቱ ማርካቲላይ ህዋን ኢቲ ማላ ጊዲቤና።

60 ቁሳቱዋ ኡባቱዋ ካፑ አሳ ኡባ ሲንላን ዳንዲ ኤቂዳ ዩሱሳ፡ «ሃዋንቱ ኔና ሞቲያ ሞቶ ኔው ዛሪያባይ ባዌ?» ያጊዴ ኦቹዳ።

61 ሺን ዩሱሲ ጮው ጊዴ፡ አይኔ ዛሪቤና፤ ቁሳቱዋ ኡባቱዋ ካፑ አ፡ «አንጃቲዳ ያሳ ናዓይ ኪሪሰቶሲ ኔኔ?» ያጊዴ ላዔንሉዎ ኦቹዳ።

62 ዩሱሲ ዛሪዳ፡ «ኤ፡ ታና፤ ሂንቱ ታና፡ አሳ ናዓ፡ ዎልቃማ ያሳፔ ኡሺቻ ባጋና ኡቲዳዒሺናኔ ሳሉዎ ሻሪያና ዪሺን ቤዓና» ያጊዴ።

63 ቁሳቱዋ ኡባቱዋ ካፑ ባሬ ማዩዎ ፔጲ ኦሊዳ፡ «ኩና ሃዋፔ ሲንላን አዩሲ ሃራ ማርካ ኮሺ? 64 ሂንቱንቱ አ ቦሪያ ሲሴዲታ፤ ሂንቱ ቆፋይ አዩ?» ያጊዴ፤ ኡንቱንቱ ኡባይ፡ «ኢ ሃይቃና ቤሴ» ያጊዴ አ ቦላ ፒርዴዲኖ።

65 ኡንቱንቱፔ ኢቱ ኢቱ አ ቦላ ጨሽላ ዶሜዲኖ፤ አ አይፊያ ካሚ ዳቹዳ፡ «ኔና ዳቹዳዌ ኦኔ? አኔ ቲምቢቲያ ኦዳ!» ያጊዲኖ፤ ቃሲ ናጊያዎንቱካ አ ቂንፃሊያ ባቂዳ አፊዲኖ።

ጳዊርሲ ዩሱሳ ካዳዳ
(ማጥ 26:69-75፤ ሉቅ 22:56-62፤ ዮሀ 18:15-18፤ 25-27)

66 ጳዊርሲ ዲርሳ ጊደን ሂርኪና ዳዒሺን፡ ቁሳቱዋ ኡባቱዋ ካፑዎ ማጫ አሺካራቱዎፔ ኢቲና ያዲ። 67 ጳዊርሲ ታማ ካሺያዎ ቤዓዳ፡ ጫዳ ጃላዳ፡ «ኔኒካ ናዚሬቲያ ዩሱሳና ኢቲፔ ዳዓ» ያጋዲ።

68 ሺን ጳዊርሲ፡ «ኔኒ ጊያዌ አዩንቶ ታኒ ኤሪኬ፤ ታው አኬኬቲና» ያጊዴ ካዳዳ፤ ያቲዳ ዲርሳ ፔንጊያኮ ኬሴዳ፤ ኩቱካ ዋሴዳ። †

14:62 ዳን 7:13 14:64 ዎግ 24:16 † 14:68 ኩቱካ ዋሴዳ፡ ሃ ቃላይ ቤኒ ቢሉቲዳ ኢቲ ኢቲ ቢሉላኒ ባዎ።

69 ሄ አሺካራታ ጳጳሮሳ ቤዓዳ፥ አ ማታን ኤቁዳ አሳቱዋ፥ «ሃ ቢታኒካ ኡንቱንቱና ዴዔ» ጋዴ ጉጃዴ ኦዲዋ ደማዲ። 70 ሺን ጳጳሮሲ ቃሲካ ካዳዳ።

ጉላ ጋሚዒሺን፥ ማታን ኤቁዳ አሳቱ ላዔንሉዋ ጳጳሮሳ፥ «ኔኒ ቱማ ኡንቱንቱና ኢቲፔ ዴዔ፤ አዪሲ ጎፔ፥ ኔኒ ጋሊላ ጋዲያ አሳ» ያጌዲኖ።

71 ሺን ጳጳሮሲ፥ «ታኒ ሄዋ ሂንቱ ጊያ ቢታኒያ ኤሪኬ!» ያጌዴ ባሬና ሺቃኔ ጫቁዋ ደማዳ።

72 ኤሊካ ኩቱ ላዔሉዋ ዋሲ አጌዳ፤ ጳጳሮሲ ባሬና ዩሱሲ፥ «ኔኒ ኩቱ ላዔሉዋ ዋሳናፔ ካሴ ሄዙ ጌዴ ታና ካዳናሳ» ጌዳዋ ሃሳዪዳ፥ ዳሪ ዩኬዳ።

15

ዩሱሳ ጲላዖሳኮ አፌዲኖ

(ማጥ 27:1-2፥ 11-14፤ ሉቅ 23:1-5፤ ዮሀ 18:28-38)

1 ዋንታ ጉራን ኤሊካ ቁሳቱዋ ካፓቱ ጨማቱዋናኔ ሙሴ ሂጊያ ታማሪሲያዋንቱና ሄዋን ሸቁዳ አዪሁዳ ሻንጋቱዋ ኡባና ማቁቲዳ፥ ዩሱሳ ቃቺ አፌዳ፥ ጲላዖሳው አሊዳ አሜዲኖ።

2 ጲላዖሲ አ፥ «ኔኒ አዪሁዳቱዋ ካቲ?» ያጌዴ ኦቼዳ።

ዩሱሲ ዛሪዳ አ፥ «ኔ ጊያዋዳና» ያጌዳ።

3 ቁሳቱዋ ካፓቱ ዩሱሳ ዳርባን ሞቲዲኖ። 4 ጲላዖሲ ሺሬቲዳ ዩሱሳ፥ «ኔው ዛሪያባይ ባዌ? ኡንቱንቱ ኔ ቦላ ዋዪሳ ሞቲዋ አሂንቶ ቤዒኪ?» ያጌዴ ኦቼዳ።

5 ሺን ዩሱሲ ሃራባ ዛሬናን ኢጻና፥ ጲላዖሲ ማላሌቲዳ።

ዩሱሳ ቦላ ሃይቁዋ ፒርዴዲኖ

(ማጥ 27:15-26፤ ሉቅ 23:13-25፤ ዮሀ 18:39-40፤ 19:1-

16)

6 ጲላዖሳው ፓሲጋ ባላ ቦንቺያ ጋላሳን አሳይ ኮዪያ ኢቲ ኡራ ቃሹዋፔ ቢሊያ ዋጋይ ዴዔ። 7 ሄ ዋዴ ኢቲ ባርባና ጊያ ቢታኒ ዋላሳ ኬሲዳ ሺምቼዋ ዋዴዳ አሳቱዋና ኢቲፔ ቃሽ ጎሊያን ዴዔ። 8 ሸቁዳ ጮራ አሳይ ጲላዖሲ ካሴ ኤራቶዋዳንካ ባሬንቶ ማርታ ኦላና ማላ፥ አ ኦቼዲኖ። 9 ጲላዖሲ አሳ ዛሪዳ፥ «ታኒ ሂንቱንቶ አዪሁዳቱዋ ካቲያ ቢሊያዋ ኮዪቲ?» ያጌዴ ኦቼዳ። 10 አዪሲ ጎፔ፥ ቁሳቱዋ ካፓቱ ዩሱሳ ቃናቲዳ አሊ አሜዳዋ ጲላዖሲ ኤሬዳ።

11 ሺን ቄሳቱዋ ካፓቱ ዩሱሳ ኮታ ባርባና ቢላናዳን፣ ሄ ሺቄዳ አሳይ ጲላዖሳ ዋሳና ማላ፣ አሳ ማቄዲኖ። 12 ጲላዖሲ ላዔንሱዋ ዛሬዳ፣ «ያተና፣ ሃ አዪሁዳ ካቲያ ሂንቲንቱ ጊያዋ ዋቶ?» ያጌዳ።

13 አሳይ ጲላዖሳው ዛሬ ዛሬ ባሬንቱ ኮሻ ቶቁ ኦሊዳ፣ «አ ካቃ» ያጌዲኖ።

14 ጲላዖሲ አሳ፣ «አዪሲ? ኢ አይ ኢታባ ኦሴዳ?» ያጌዳ።

ሺን አሳይ ካሴዋፔካ ባሬ ኮሻ ቶቁ ኦሊዳ፣ «አ ካቃ» ያጌዲኖ።

15 ጲላዖሲ አሳ ናሼቻናው ኮዪዳ፣ ባርባና አሳው ቢሌዳ፤ ያቲዳ ሊሱዋን ዩሱሳ ዋታዳራቱዋን ሾጪሲዳ፣ ካቃና ማላ ኡንቲንቶ አሊ ኢሜዳ።

ዋታዳራቱ ዩሱሳ ቂሊጩዲኖ

(ማት 27:27-31፤ ዮሀ 19:2-3)

16 ሄዋፔ ጉዪያን፣ ዋታዳራቱ ዩሱሳ ጋዲያ ሞዲያዋ ጊቢያ አፊዳ፣ ሃራ ዋታዳራቱዋ ኡባ ኢቲፔ ጻሴዲኖ። 17 ቃሲ ዘዖ ማዩዋ አ ማዪዜዲኖ፤ አጉንጎላ አኪሊሊያ ጊቢሲዳ፣ አ ሁጲያን ዋሴዲኖ።

18 ሄዋፔ ጉዪያን አ፣ «አዪሁዳቱዋ ካቲው፣ ሳርታይ ኔው ጊዶ» ያጊ ሳርቲዳ፣ አ ቂሊጩዋ ደሜዲኖ። 19 ዩሱሳ ሁጲያ ማቃ ፃምዓን ሾጩዲኖ፤ ቃሲ አ ቦላን ጩቹዲኖ፤ ጉልባቲዳ አው ጎዪኔዲኖ። 20 አ ቦላ ቂሊጩዳዋፔ ጉዪያን፣ ዘዖ ማዩዋ አፔ ቃሬ አኪዳ፣ አ ማዩዋ አ ማዪዜዲኖ፤ ያቲዳ ማሰቃሊያ ቦላን ሚሲማሪያን ጲሺዳ፣ አ ካቃናው አፊዲኖ።

ዩሱሳ ካቄዲኖ

(ማት 27:32-44፤ ሉቅ 23:26-43፤ ዮሀ 19:17-27)

21 ኡንቲንቱ ቢዳ፣ ኢሰኪንዲራኔ ሩፎሳ ዩሌዳ አወዋ፣ ኢቲ ሲሞና ጊያ ቄሬና ጋዲያ አሳይ፣ ጋፃፔ ካታማ ዪያዋና ጋኬቲዳ፣ ዩሱሳ ማሰቃሊያ ዋልቃን ቶሴዲኖ። 22 ያቲዳ ጎልጎታ ጌቲቲያሳ ዩሱሳ አፊዲኖ። «ጎልጎታ» ጊያዌ «ሁጲያ ጎሲያሳ» * ጊያዋ።

23 ካዋራ ጊያ ጳሊ ዋላኬቲዳ ዋዪኒያ ኤሳ ዩሱሳው ኡሻናው ኢሜዲኖ፤ ሺን ኢ ኡሼናን ኢፄዳ። 24 ኡንቲንቱ አ ካቄዲኖ፤ ቃሲ ኦና ኦና ጋካኔንቶ ኤራናው አ ማዩዋ ሻኪዳ፣ ሳማ ዩጌዲኖ።

25 ኡንቲንቱ አ ካቄያ ዋዳ፣ ዋንታፔ ሄዙ ሳቲ።

26 «አዪሁዳቱዋ ካቲያ» ያጊ አ ሞቲያ ፃፋ ፃፊቲ ኡቲዳ።

27 ዩሱሳና ላዑ ካዪሳቱዋ ኢቲዋ አፔ ኡሼቻ ባጋና፣ ቃሲ ኢቲዋ

15:21 ሮሞ 16:13 * 15:22 «ሁጲያ ጎሲያሳ» ጌቲቲያዌ፣ አሳ ሁጲያ ማላቲያ ሹቻይ ሄዋን ዳዒያ ዲራው፣ ሁጲያ ጎሲያሳ ጌቲቲዳ። 15:24 ማዝ 22:18

አፔ ሃዲርሳ ባጋና ማስቃሊያ ቦላ ሚሲማሪያን ጳጢያ ካቁዲኖ።
28 ያሳ ማፃፋይ፡ «ኢታባ ኦሴዳ አሳቱዋና ኢ ፓይይቲዳ» ያጌያዋ ፖሌቲዳ።

29 እጊያና አዲያ አሳይ ዩሱሳ ካዲዳ፡ ባሪንቱ ሁጲያ ቃሊዳ ቦራዲኖ፤ «ሲሚ፡ ጌሻ ጎሊያ ኮላዳ ሄዙ ጋላሳ ጊደን ኬዲያዎ፡

30 እኔ ማስቃሊያ ቦላፕ ዋዳዳ፡ ኔ ሁጲያ አሻ» ያጌዲኖ።

31 ሃዋዳንካ ቄሳቱዋ ካፓቱ ሙሴ ሂጊያ ታማሪሲያዋንቱና ኢቲፔ ዩሱሳ ቦላ፡ «ሃራ አሳቱዋ አሼዳ፤ ሺን ባሪና አሻናው ዳንዳዬና፤ 32 ኮሪ ቤዒዳ አማናና ማላ፡ ከሪሰቶሲ ኢስራዔሊያ ካቲ፡ እኔ ማስቃሊያ ቦላፕ ሃዒ ዋዳ» ጊዳ ቂሊጩዲኖ። ቃሲ ሃራይ አቶ፡ እናና ማስቃሊያ ቦላ ሚሲማሪያን ጳጢያ ካቁቲዳዋንቱካ አ ቦላ ቂሊጩዲኖ።

ዩሱሳ ሃይቁዋባ

(ማት 27:45-56፤ ሉቅ 23:44-49፤ ዮሀ 19:28-30)

33 ኡሱፑን ሳቲያፔ ደሚዳ፡ ኡዲፑ ሳቲያ ጋካናው፡ ጋዲያ ኡባይ ጳሚዳ። 34 ኡዲፑ ሳቲያን ዩሱሲ ባሪ ቃላ ቋቁ ኦሴዳ፡ «ኤሎሄ፡ ኤሎሄ፡ ላማ ሳባቂታኒ?» ተ ያጌዳ። ሄዋ ጊያዌ፡ «ታ ያሳው፡ ታ ያሳው፡ ታና አዩሲ አጋዲ?» ጊያዋ።

35 ሄዋን ኤቄዳ አሳፔ ኢቱ ኢቱ ሄዋ ሲሲዳ፡ «ቤዒቲ፤ ኤላሳ ዌሴ» ያጌዳ። 36 ሄ አሳፔ ኢቱ ዋዲ ዩዳ፡ ዘንዛ ማላቲያዋን ጨላ ዋዩሊያ ኤሳ ኩንሴዳ፤ ሄዋ ማቃ ጋቲማ ዌራን ዋሊዳ፡ «ዳዒሺቲ ኦኔ፤ ኤላሰ ማስቃሊያፔ አ ዋሳናው ያኔንቶኔ እኔ ቤዖይቲ» ያጌዳ ዩሱሳ ደናኮ ኡሻናው ሺሼዳ።

37 ዩሱሲ ቃላ ቋቁ ኦሴ ዋሲዳ፡ ሃይቁ አጌዳ።

38 ጌሻ ጎሊያን ቃሼቲዳ ጋሪዲ ቆሞፔ ዲጌ ጋካናው፡ ላቡ ኬሲዳ ፖሼቲ ዋዲዳ። 39 ማስቃሊያፔ ሲንላ ባጋና ሄዋን ኤቄዳ ኢቲ ዌቱዋ ካፑ፡ ሄዋ ኬና ዩሱሲ ዋሲዳ ሃይቁዳዋ ቤዔዳ ዋዳ፡ «ሃ ቢታኒ ቱሙ ያሳ ናዓ» ያጌዳ።

40 ሄዋን ሃኩዋን ኤቄዳ ዌሊያ አማራዳ ማጫዋንቱ ዳዒኖ፤ ኡንቱንቱ ጊደን ማግዳላ ጊያ ካታማፔ ዩዳ ማይራማ፡ ቲፋ ያዩቆባኔ ዮሳ ዳያ ማይራማኔ ሳሎማ ዳዒኖ። 41 ሄ ማጫ አሳቲ ዩሱሲ ጋሊላን ዳዒያ ዋዳ፡ አ ካሌዳዋንታኔ አ ማዳዳዋንታ፤

15:28 አሳ 53:12 15:29 ማዝ 22:7፤ 109:25፤ ማር 14:58፤ ዮሀ 2:19
† 15:34 «ኤሎሄ ... ላማ ሳባቂታኒ»: ሃ ቃላቲ ዩሱሲ ሃ አላሚያን አሹዋ ማዬዳ ሲሜራቲያ ዋዳ ሃሳዩቲያ አራማዬኬ ጌቲቲያ ቃላን ሃሴዬቶዋ። 15:34 ማዝ 22:1 15:36 ማዝ 69:21 15:38 ኬስ 26:31-36

ቃሲ ዬሱሳና ኢቲፔ ዬሩሳሌም ቤዳ ሃራ ጮራ ማጫ አሳቱ ሄዋን ደዒኖ።

ዬሱሳ ሞጉዋባ

(ማጥ 27:57-61፤ ሉቅ 23:50-56፤ ዮሀ 19:38-42)

42-43 ሳዓይ እማርሴዳ ዎዴ፡ ሄዋን ሺቄዳ አሳን ቦንቼቴዳ ኢቲ ዮሴፋ ጊያ ቢታኒ፡ ያሳ ካወቴላይ ያናዋ ናጊ ኡቴዳዌ፡ አርማቲያሳ ጊያ ካታማ አሳይ ዬዳ፤ ሄ ጋላሳይ ዎንቴላ ሳሞባታው ጊጌቲያ ጋላሳ ጊዴዳ ዲራው፡ ዮሴፎ ፃሊዴ ጰላያሳኮ ቢዴ፡ ዬሱሳ አጋ አካናው ዎሴዳ። 44 ጰላያሳ፡ ዬሱሴ ማንዒያንካ ሃይቄዲጌዳዎ ሲሴዳ ዎዴ ማላሌቴዳ፤ ቄቲዎ ካፑዎ ቄሲዴ፡ «ኢ ሃይቆዴፔ ጋማዒዴ?» ያጊዴ ኦቼዳ። 45 ጰላያሳ ዬሱሴ ሃይቄዳዎ ቄቲዎ ካፑዎፔ ሲሴዴ፡ አ አጋ ዮሴፎ አካናዳን ኡዴዳ። 46 ዮሴፎ ሞጉዎ ማዩዎ ሻሜዳ፤ ዬሱሳ አጋ ማስቃሊያፔ ዎሴ ማዩዎን ፃዒዴ፡ ሹቻ ዎጩዳ አሳ ሞጊያ ጎንጎሉዎ ጊዶን አ አጋ ዎሴዳ፤ ቃሲ ሄ ጎንጎሉዎ ዶናን ዎልቃማ ሹቻ ጎንዶርሲዴ ዎሴዳ። 47 ማግዳላ ካታማፔ ዬዳ ማይራማኔ ዮሳ ዳያ ማይራማ ዬሱሳ አጋ ኡንቲንቲ ሃቃን ዎሴንቶ ቤዒኖ።

16

ዬሱሴ ሃይቄዎፔ ዴንዴዳ

(ማጥ 28:1-8፤ ሉቅ 24:1-12፤ ዮሀ 20:1-10)

1 ሳሞባታይ አጴዳዎፔ ጉዩያን፡ ማግዳላ ካታማፔ ዬዳ ማይራማ፡ ያዩቆባ ዳያ ማይራማኔ ሳሎማ ቢዴ፡ ዬሱሳ አጋ አካናው ሺቲዎ ሻሜዳኖ። 2 ዎጋ ጋላሲ ዎንቴማላ ዳሮ ጉራን ፃልቄ ኬሲሺን፡ ሄ ጎንጎሉዎ ቤዲኖ። 3 ኡንቲንቲ ባሬንቲ ጊዶን ኢቲ ኢቲዎና፡ «ጎንጎሉዎ ዶናፔ ኑሲ ሹቻ ኦኔ ጎንዶርሲዴ ዲጋናዌሻ?» ያጊዴ ሃሳዩኖ።

4 ኡንቲንቲ ቄሊያ ዎዴ፡ ሄ ዳሮ ዎልቃማ ሹቻ ጎንዶርሲዲጌዳዎ ቤዒዲኖ። 5 ዬሱሴ ሞጌቴዳ ጎንጎሉዎ ጊዶ ጌሊያ ዎዴ፡ ኢቲ ዎዳላ ቢታኒ ቦላ ማዩዎ ማዩዴ፡ ኡሺቻ ባጋና ኡቴዳዎ ቤዒዴ ዳጋሚዲኖ።

6 ሺን ኢ ኡንቲንታ፡ «ዳጋሞፒቴ። ማስቃሊያ ቦላ ካቄቴዳ ናዚሬቲያ ዬሱሳ ሂንቲንቲ ኮዩያዎ ኤራይ። ኢ ሃዎን ባዎ፤ ዴንዲዲጌዳ። ኡንቲንቲ አ ዎሴዳሳ ሃዎ ቤዒቴ። 7 ሺን ቢዴ ዬሱሴ ባሬና ካሊያዎንቶኔ ጰዒሮሳው፡ «ዬሱሴ ሂንቲንቲፔፔ

ካሴቲዳ ጋሊላ ቤ፤ ኢ ሂንቲንቶ ኦዴዳዋዳንካ ሂንቲንቱ ኣ ያኒ ቤዓናን ያጊዴ ሃዋ ኦዲቲ» ያጌዳ።

8 ማጫ አሳቱ ያሻን ኮኮሪዳ፡ ዩሱሲ ሞጌቲዳ ጎንጎሉዋፕ ኬሲዳ ባቃቲ አጌዲኖ፤ ቃሲ ኡንቲንቱ ያዩዳ ዲራው፡ አሳው ሄዋ ኦሲኔ አይኔ ኦዲቤይኪኖ።

ማጫ አሳቱ ቢዳ፡ ባሬንቶ ኦዴቲዳባ ኡባ ጳዲርሳዉኔ አናና ዴዲያዋንቶ ቃንጻን ኦዴዲኖ፤ ሂዋፕ ጉዩያን፡ ዩሱሲ ባሬ ሁጳው ባሬና ካሊያዋንቱ ቦላ፡ ሜጲናው አሺያ ላሜቲና ጌሻ ሚሺራቹዋ ቃላ፡ አዋይ ሞኪያሳፕ ዉሊያሳ ጋካናው ከቲዳ።

**ዩሱሲ ማግዳላ ማይራሚው ቤቲዳ
(ማት 28:9-10፤ ዮሀ 20:11-18)**

9 ዩሱሲ ሃይቁዋፕ ዴንዴዳዋፕ ጉዩያን፡ ዋጋ ጋላሲ ጉራ፡ ላፕ ኢታ አያናቱዋ ኬሴዳ ማግዳላ ካታማፕ ዩዳ ማይራሚው ካሴቲዳ ቤቲዳ። 10 ኢዛ ባዴ ካሴ አናና ዴዲያዋንቶ፡ ቃሬቲዲኔ ዩኪዴ ኡቲዳዋንቶ ኦዳዲ፤ 11 ሺን ዩሱሲ ፓፃ ዴዲያዋንቱ ኢዚው ቤቲዳዋ ኡንቲንቱ ሲሴዳ ዋዴ፡ ኢዚ ኦዲዋ ቱማ ጊቤይኪኖ።

**ዩሱሲ ላዑ ባሬና ካሊያዋንቲሲ ቤቲዳ
(ሉቅ 24:13-35)**

12 ሄዋፕ ጉዩያን፡ ኡንቲንቲፕ ላዓቱ ካታማፕ ኬሲዴ ቢሺን፡ ኦጊያን ዩሱሲ ኮይርዋፕ ዲማቲዳ፡ ኡንቲንቶ ቤቲዳ። 13 ኡንቲንቱ ጉዩ ሲሚዳ፡ ሃራቱዋሲ ኦዴዲኖ፤ ሺን ሄዋንቱ ኡንቲንቱ ኦዲዋ ቱማ ጊቤይኪኖ።

**ዩሱሲ ታማኔ ኢቲ ባሬና ካሊያዋንቲሲ ቤቲዳ
(ማት 28:16-20፤ ሉቅ 24:36-49፤ ዮሀ 20:19-23፤ ከት**

1:6-8)
14 ጉዩፕ ታማኔ ኢቲ ዩሱሳ ካሊያዋንቱ ቁማ ሚሺን፡ ዩሱሲ ኡንቲንቶ ቤቲዳ። ኡንቲንቶ አማኑ ባይና ዲራው፡ ኢ ኡንቲንታ ሴሬዳ፤ ቃሲ ሃይቁዋፕ ኢ ዴንዴዳዋ ቤዴዳዋንቱ ኡንቲንቶ ኦዲኖ፡ ኡንቲንቱ አማኔናን ኢፃዳ ዲራዉኔ ኦዲና ሲሴናዋንታ ጊዲያ ዲራው፡ ኢ ኡንቲንታ ሴሬዳ።

15 ኢ ኡንቲንታ ሃዋዳን ያጌዳ፤ «አላሚያ ኡባ ቢዳ፡ አሳ ኡባው ዋንጋላ ሚሺራቹዋ ቃላ ኦዲቲ። 16 አማኖዌ፤ ፃማቁቶዌ አታና፤ ሺን አማኔናዋ ቦላ ያሳይ ፒርዳና። 17 ታናን አማኒያዋንቱ ሃ ማላታቱዋ ኦላናዋንታ፡ ኡንቲንቱ ታ ሱንጻን ኢታ አያናቱዋ ኬሳናዋንታ፤ ቃሲ ኡንቲንቱ ዲማ ዲማ ኦራሳ ቃላን ሃሳያናዋንታ። 18 ኡንቲንቱ ሾሻ ኦይቆፕካ፡ ዋይ ኣያኔ ዋጲያ ማርዚያ ኡሺንቶካ

ኢንቴንታ ቆሄና። ቃሲ ኢንቴንቱ ባሬንቱ ኩሺያ ሃርጋንቻቱዋ ቦላ ዋላና፤ ሄ ሃርጋንቻቱ ፓፃና» ያጌዳ።

ዩሱሲ ሳሉዋ ፑዴ ኬሴዳ
(ሉቅ 24:50-53፤ ኪት 1:9-11)

19 ጎዳ ዩሱሲ ባሬና ካሊያዋንቱና ሃሳዬዳዋፔ ጉዩያን፣ ያሳይ ኣ ፑዴ ሳሉዋ ኣፊና፣ ያሳፔ ኡሺቻ ባጋና ኡቴዳ። 20 ኣ ካሊያዋንቱ ቢዴ፣ ኡባሳን ዎንጋላ ሚሺራቹዋ ኦዴዲኖ። ጎዳይካ ኢንቴንቱና ኢቲፔ ኦሴ፤ ኢንቴንቱ ኦዲያ ቃላይካ ቱማ ጊዴዳዋ ኢንቴንቱ ኦሴያ ማላታቱዋን ኤሪሴዳ። *

* 16:20 ኢቲ ኢቲ ቤኒ ጌሻ ማፃፋቱዋን ሃ ፓይዳቱ ባዋ።

Ooratha Caaquwaa New Testament in Dawro (ET:dwr:Dawro)

copyright © 2011 Wycliffe Bible Translators, Inc.

Language: Dawro

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Dawro

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source
files dated 29 Jan 2022
585b63ca-b8e6-55c8-bfef-10bdc95ad69c